


*Upu Fou
a le
ALII*
2019



*Upu Fou
a le
ALII*

o le Tusi Paia mo se suiga

o le

Tusi Faitau Aso

Ianuari 01. 2019 - Iuni 31. 2019

2019



IBRA

Tusi Faitau Aso 2019

E fa'atalofa atu i le mamalu o le Ekalesia ae maise le aulia mai ma le manuia o lenei tausaga fou i le Alofa o le Alii. Talofa, talofa lava.

O lenei ua fa'aliliu atu le Tusi Faitau Aso e le tatou Ofisa o le Lamepa: le susuga ia **Emau Petaia FS** (Fepuari), le Faletua o **Usugafono Satele** (Mati), le susuga ia **Iese Faavaoga AK** (Aperila), le susuga ia **Eteuati Semaia AK** (Me), le susuga i le Failautusi Aoao ia **Nafatali Falealii FS** (Iuni), fa'apea ma lo'u tagata (Ianuari), i lenei tausaga.

Ia silafia, o le IBRA (International Bible Reading Association) ua talia e le Ekalesia fa'apea foi ma Ekalesia Kerisiano uma e avea ma Tusi e mafaufau ai tagata uma Kerisiano o le lalolagi ma avea ma ta'iala e fa'atino ai le Tapuaiga i aso ta'itasi o lenei tausaga. O Matāupu e pei ona fa'ailoa atu, o loo i ai lava le musumusuga a le Agaga e faitau ma fa'atusatusa i tōafa o loo tatou feagai ai ma le Atua fetalai mai.

O nisi o suiga i lenei tausaga:

- 1 O le a o'o atu le Tusi Faitau Aso i Kuata e 2. O le Kuata Muamua e amata atu ia Ianuari e oo ia Iuni; Kuata lona Lua, e amata atu ia Iulai e o'o ia Tesema.
- 2 Ua fa'apupu'u atu fa'amatalaga. O le a fa'aaogā pea ulutala, o manatu autū, ma le tusi faitau o aso ta'itasi, ae e ootoo atu manatu a tusitala e fa'amanino atu ai le feau o le tala lelei i le gagana Samoa. E le faigofie, ae fa'amoemoe o le a fa'alautele lava e oe le feau o aso ta'itasi e ala i le musumusuga a le Agaga, a o feagai ma lau tapuaiga.
- 3 O le a fa'ailoa aso tāua o le EFKAS, fa'atasi ai ma aso malolo tāua o loo fa'amanatuina e 'aulotu a le EFKAS o lo o aumau i Amerika, Amerika Samoa, Niu Sila, ma Ausetalia.

'Waiting, stillness, seeking, finding;' 'Faatalitali, filemū, sailiga, taunuuga.' O mafaufauga o le alii Fa'atonu o le IBRA, Nathan Eddy, e fa'apea, *"I lenei lalolagi ua tumu i feau ma galuega e le taofia. Peita'i, o nei upu ua valaauina ai i tatou ina ia tatou o 'ese mai le lalolagi ua tumu i feau ma galuega o loo tatou i ai. O le a se fa'aaliga o le a tatou maua, pe ā fa'atalitali ma le loto filemū ma sailiga ina ia maua le taunuuga?"*

O le tōafa, poo 'le nofo i le mea tuufua', ua fa'ailoa mai e le Tusi Paia o le olaga faigatā. Peita'i, o le tōafa foi o le nofoaga e toe fuafua ai lagona ma toe fa'afou ai manatu, e pei o Isaraelu na feagai ma le tōafa, lea na fa'atāsia ai ma avea ai i latou ma n'uu filifilia. I tala atu o le tōafa na lagona ai e Mose le fetalai mai o le Atua i le afi mumū. O le tōafa foi na saili atu ai le 'au perofeta i le Atua mo lona finagalo. E fa'apea foi Iesu, na ia maua le avanoa i le tōafa i

le taimi o ana fa'aosoosoga, na tapena ai ma saunia ai o ia mo le amataina o lana galuega.

I lenei tausaga, ua valaauina i tatou e le Tusi Faitau Aso (IBRA) ina ia sāvavali, fa'alogo, saili, ma ia maua le mea ua sãilia, a o tatou feagai ai ma tōafa faigatā i nei ona po. Tatou te maua lenei tōafa i totonu lava o le olaga i aso fai soo, i faigata ma puapuaga o le soifuaga, ae maise i le tele o feau ma galuega e lē uma. A tatou faitau ma fa'alogologo i le Afioga Paia a le Atua, tatou te maua ai le malosi ma le lototele e feagai ai ma luitau o le tōafa e fetaia'i pea ma i tatou. I le taeao ma le afiafi, i le malaga atu i galuega, po o le nofonono ai i moega ma tōfaga, o le fetalai mai o le Atua e ala i lana Afioga Paia, na te aumaia le fa'amoemoe ola mo i tatou a o tatou feagai ai ma tōafa faigata o lenei soifuaga. O le a se mea tāua ua e maua mai i le Tusi Paia i lenei aso e te feaga ai ma le faigata o le tōafa o loo e aumau ai? E fa'apefea ona suia ai lou olaga, lou 'āiga, lou nu'u ma lau ekalesia?

O nisi o manatu autū i lenei tausaga o le a faailoa atu i le Tusi Faitau Aso: “O le Mana o le Upu,” o “Musika i le Tusi Paia,” faapea, “Meaalofa o le Agaga.” O le a fa'ailoa atu foi, “Tinā ma Tamaita'i o le Tusi Paia” ma le lavelave o o latou lagona, “O le Taleni o le Tautalatala,” e talafeagai ma, “Tala Feso'otai o le Lalolagi,” fa'apea “Mafaufauga fa'ale-Tusi Paia.” O le a fa'ailoa atu foi, “O le Tusi Paia i Ata Tifaga,” fa'apea, “Tā'elega i le Matāfaga ma le Sami;” o faitauga mai le evagelia o “Luka,” “Filipi,” “Salāmo,” “Tanielu,” “Teuterenome,” fa'apea ma le “Roma 1-8.” O le a fa'amanatuina foi le 500 tausaga o le alii o Magellani, le tagata na faimalaga i le sami e fa'ataamilo le Kelope, na ia fa'alauiloa mai ai, “*O le lalolagi e feso'otai faatasi.*”

O le tatalo, ia maua sou avanoa e te alu'ese mai ai ma le anoanoa'i o galuega fai o lenei lalolagi i lenei tausaga. Ua fa'ailoa atu e le 'au Tusitala le tōafa o loo tatou feagai ai. Ia fa'atumu atu e le Alii lona Agaga a o e Faitau i lenei Tusi, ia maua le 'Upu Fou' a le Alii, i auala 'ese'ese ua ia fa'ailoa mai...

Ia manuia tele lau tapuaiga.

L.Nuusila.Samuelu, FS.ThM.BD.

“O le Mana o le Upu”

(The Power of the Word)

Aso Lua – Ianuari 1, 2019: “I le amataga” *(In the beginning)*

Tusi Faitau – Ioane 1:1-14

Matua – f.1: *‘Sa i le amataga le Upu, sa i le Atua le Upu, o le Atua foi le Upu’*

Ua fa’ailoa mai e le faievagelia o Ioane le tāua o le Afioga Paia a le Atua, o le Tusi ua avea ma fa’avae i lo tatou ola, a o se Tusi tāua e tataua ona manatua pea e pei ona tatou amata mai ai. O lagona ia o le loto ua tatala atu i le Atua o lē na faia i tatou ina ia foliga ia te ia. I upu tomua ia a le faievagelia, ua tatou iloa ai, ua liutino tagata le Upu, ma ua soifua ma aumau fa’atasi ma tagata.

O le asō, o le ulua’i aso o lenei tausaga fou. O le aso foi e fa’asino i amataga fou. O le ta’utinoga a le Tusitala, o le tatalo ma le faitauina o le Tusi Paia, ua ia iloa ai po o fea lava na te i ai i so’o se taimi ma so’o se vaipanoa, o le fesoasoani sili i le tagata: o le tatalo ma le faitauina o le Tusi Paia.

Ua amata la tatou savaliga. O le asō ua ta’ita’ina ai tatou, ma ua e iloa i lou olaga o mea tāua ua foa’i mai e Iesu, ua fa’atumuina ai o tatou loto i le fiafia. O le a se sāvali ua u’unai ai oe e le Alii a o e sāvalia le amataga o lenei tausaga fou?

Tatalo: Le Atua e o le Upu o le ola, fa’atasi mai Oe ia ou iloa atili ai ou foliga na e faia ai a’u, **Amene.**

Aso Lulu – Ianuari 2: “Ua valaau i tatou e le Upu” *(The Word calls us)*

Tusi Faitau – Ieremia 1:1-12

Matua – f.5: *“Na a’u iloa oe, a o lei faia oe e a’u i le manava; na a’u fa’apaiaina oe a o lei fanau mai oe, ...”*

O le Upu a le Alii ua o’o ia Ieremia, ae peita’i, e le i faigofie ia te ia ona talia . Na tauivi Ieremia ma le valaau a le Atua, ona ua ia silafia, o ia o se tagata e le talafegai ma le valaau. Ua na iloa tapula’a e le o’o i ai lona silafia. Faimai o le ata moni lea o le tagata ua valaauina – na te silafia lona maualo ma lona lē talafeagai ma le valaau. Pe a o’o ina vala’auina i tatou e pei fo’i o Ieremia, tatou te fa’ailoa manatu uma e lē talafeagai ai i tatou ma le valaau.

Peita’i, o le Atua na te silafia lo tatou agava’a faapea foi ma lo tatou vaivai. E fa’aaogā e le Atua lo tatou vaivai, fa’atasi ai mea uma ua tatou manatu e lē agava’a ai i tatou. O le iloa o lo tatou vaivai ma lo tatou fa’atauva, o agava’a tāua ia i le Atua, e fa’ailoa ai lona finagalo i le lalolagi.

Tatalo: Le Alii o loo soifua pea, ia ma’ati lau faalogo ma faailoa lou alofa ma le amiotonu i le lalolagi, **Amene.**

Aso Tofi – Ianuari 3: “O lou fa’asinomaga, ua valaau ai i tatou e le Upu”

Tusi Faitau – Teuterenome 30:1-16 (The Word calls us home)

Matua – f.14: *‘A e matuā lata mai lava le upu ia te oe, o i lou gutu, ma lou loto, ina ia e faia.’*

O le faitauga o lenei aso, o le pese ua fa’ailoa mai ai e le tusitala o Teuterenome le tāua o le nofo tumau o le Upu o le Atua i loto ma agaga o tagata. O le pese mālie e manatua pea i le tele o taimi i le olaga o le Isaraelu. O nisi taimi e pei o le upu ua e gālala e te fia inu ai, e pei o se vaipuna i le vao tu’u fua. E fa’apea foi se lagona pe a fa’atino ma ola ai, e maua ai le loto ua fa’amafanafanaina. A o le tāua o le ola tumau i le Upu, na te faasino mai ia i tatou le ala i lo tatou fa’asinomaga moni – o le Atua lea.

O le fa’asoa lea a le tusitala o Teuteremone i ona tagata sa avea ma pologa i le vaitau o le tafeaga. O le valaau i lona nu’u ina ia manatua le Atua, e ui o loo latou aumau ai i nu’u ese, a o le Atua o lo latou fa’asinomaga moni. E le gata e fa’aolaina ai i latou, a o le Upu e ola ai foi tagata uma o ē e fa’alogologo ma taofi mau i ai. Tatou te filifilia le ola, pe a tatou faitau i le Tusi Paia i taimi e o’o mai ai mea faigatā ma puapuaga o le soifuaga.

Tatalo: Le Atua paia e, seia e tusia lau Upu i lo’u loto pe a o’o ina ou loto vaivai a o ou feagai ai ma lo’u fa’asinomaga, **Amene.**

Aso Faraile – Ianuari 4: “O le Upu o le ‘oloa pito taugatā”

Tusi Faitau – Salamo 119:11-25 (The Word is a treasure)

Matua – f.11: *‘Ua ou teu i lo’u loto lau afioga, ina nei ou agasala ia te oe.’*

O le Salamo e 119, o le pese ‘au alofa mo le Isaraelu tapuai, e fa’avae i le tulafono a le Atua. O le pese ua lagia ma fa’asolo ana fuaupu i mata’itusi o le gagana Eperu. O lona tāua: e a’oa’oina ai le tagata ina ia manatua ala e atoatoa ai ma lelei ai lona soifua, e tusa ai ma le tulafono (Torah).

O le tulafono o loo fautua mai i mea e ao ona faia, ma mea foi e ao ona lē faia. E pei ona fa’ailoa mai e le faisalāmo, o le tulafono na te fa’ailoa mai le alofa o le Atua i le tagata, i le siosiomaga o loo ola ma soifua ai. O le agasala i le Atua ina ua lē usita’ia le tulafono, e ave’esea ai le tagata mai le puna o le ola. E mo’omia ta’iala e leoleoina ai i tatou, ma fa’asino mai le ala tatou te feagai ai ma le lalolagi. O mea ia tatou te maua mai i le tulafono.

Ua silafia e le faisalāmo, o le sa’olotoga moni e maua mai i le Atua, o lē ua mafuta fa’atasi mai ma ona tagata. O le ‘oloa aupito sili ona tāua, o a’oa’oga ua fa’ailoa mai i lana tulafono (Torah).

Tatalo: Le Atua e, o ala uma o le tulafono ua ou maua. Seia e ta’ita’ia a’u ina ia ou maua le ola e fa’avavau, **Amene.**

Aso Toonai – Ianuari 5: “O le Upu e liliu ai” (*The Word transforms*)

Tusi Faitau – Ioane 17:13-21

Matua – f.14: *‘Ua ou tu’u atu lau afitoga ia te i latou ...’*

Ua fa’ailoa mai e Ioane isi upu a le mavaega a Iesu, ua ia tatalo ai mo lona ‘ausoo ma ē o le a fa’aaauaina lana galuega. Ua silafia e Iesu, o le a feagai i latou ma fa’afitauli o le olaga ona o alii sili o le lalolagi. A o le Upu, na te puipuia i latou ma leoleo o latou ala, e mafai ai ona liliu le lalolagi e avea ma nofoaga tāua. O le Upu foi na te liliuina la tatou va’aiga i le lalolagi: o le nofoaga e mana’omia le fa’aolataga mai le Atua.

O le fa’amamafa a le tusitala, o le Upu ua i ai lo tatou ola moni. E le o se mea e tau fa’ailoa atu i upu ma tala, a o le olaga e tatau ona ola ai ma fa’atino i aso uma. O le tagata ua liliu e le Upu, ua fa’afouina i le alofa tunoa o le Atua.

Tatalo: Le Alii alofa e, faafetai ina ua e lē tuuese a’u i le tele o aso, ou te tuuina atu lou loto ma le mafaufau i lou tamāoaiga ua e foai mai, **Amene.**

(1) Faitauga mai ia Luka (*Readings in Luke*)

1 – O le Soifua mai ma Amataga (*Births and Beginnings*)

Aso Sa – Ianuari 6: “O tala mai aso ua mavae” (*Tale as old as time*)

Tusi Faitau – Luka 1:1-17

Matua – ff.3-4: *“O le mea lea ua ou manatu ai, ona ua ou matuā su’e i mea uma lava talu le amataga, ou te tusi fa’asolo atu ia te oe le atalii e, Teofilo, ina ia e silafia le tonu o tala ua a’oa’oina ai oe”.*

O lenei Aso Sa, e fa’amanatu ai e le tele o Ekalesia Kerisiano i lalolagi, le tausamiga o le Epifania (Epiphany) – e autū i le ‘au makoi na o mai e fa’ailoa Iesu, o ia o le Atua ua afio mai na te fa’aolaina le lalolagi. O faitauga i lenei vaiaso, o le a tatou va’ava’ai ai i le Evagelia o Luka, ma le fa’ataatiaga o le tala o le fa’aolataga, ina ia iloa ai e tagata Kerisiano ma tupulaga mulimuli mai le tala na tusitusia e i latou na va’ava’ai tino ia Iesu – a o le tala e tonu ma sa’o atoatoa – e fa’avae ai lo latou fa’atutua ia te ia.

E amata le tala a Luka i le ta’ita’iina atu o i tatou i se tasi o vaitau fa’apitoa o le tala faasolopito – le vaitau o le tagata e suafa ia Sakaria. O le taumafaiga lea a Luka e fa’ailoa mai, o le amataga o le Tala Lelei ia Iesu Keriso, e le i amata i se mea mamao i lugā i le lagi po o le vā teatea. A o le tala na amata i le lotoifale o loo ola ma soifua ai le tagata i aso fai soo. O le tala mai i aso ua mavae, ae talafeagai tonu foi mo i tatou i aso nei.

Tatalo: Le Alii e, seia e tatala lou loto ma la’u vaai a o feagai ma tusitusiga a Luka i lenei taeao, **Amene.**

Aso Gafua – Ianuari 7: “Ua taia le gūgū” (*Struck dumb*)

Tusi Faitau – Luka 1:18-25

Matua – f.18: “*Ona fai atu lea o Sakaria i le agelu, “Pe fa’apefea ona ou iloa le mea nei? Auā ua ou toeaina, o la’u ava foi ua loomatua o ia.”*”

O se aso ‘ese na o’o i le ositaulaga o Sakaria. Na alu i le malumalu e ofoina atu taulaga i le Atua. Peita’i, ua feagai ma le agelu o Kaperielu, ua ia aumaia se tala uiga’ese. O le mea e ofo ai, na toe fesiligia e Sakaria le agelu pe moni ia mea. Na fa’ateia ai Sakaria, ma lē magagana ai. Ua gūgū seia o’o i le aso e fanau ai le tama, ma aumaia o ia mo le peritomeina, na ia gagana ai, ma fa’ailoa atu le igoa o le atalii, o IOANE.

O le Atua ua faia lana galuega e fa’aolaina ai le lalolagi, i le fa’aaogaina so’o se tagata e faia galuega i le olaga e pei ona masani ai. Ua valaauina i tatou e pei ona soifua ai i aso uma, ina ia ofo i mea ua fa’ailoa mai, ia talitonu ma ia fa’apea ona galueaina mo le fa’ataunuaina. Po o e sauni ea mo lenei valaau?

Tatalo: Le Alii e, ia ou maua le malosi mai lau afio, ou te talitonu ai i lau fa’aolataga e liliu ai lou olaga ma laveaina ai, e ui i mea faigatā, **Amene.**

Aso Lua – Ianuari 8: “E leai se mea e lē mafaia” (*Nothing is impossible*)

Tusi Faitau – Luka 1:26-38

Matua – f.35: “*E afio ifo le Agaga Paia i luga ia te oe, e fa’amalumalu ifo foi ia te oe le mana o le Silisili ese; o le mea lea e ta’ua ai le tama paia e fanau mai, o le Alo o le Atua.”*”

E le fa’apito le silasila a le Atua i le tagata na te filifilia e faia lona finagalo – e o’o i tausaga o le tagata, o le ituaiga e sau mai ai, po o le soifuaga foi e ola ai – e pei ona fa’ailoa Kaperielu i le teine taupou i Nasareta. O le teine na te lei iloa se tāne, a ua filifilia e fanaua le Mesia – le Alo o le Atua.

Na avea Maria ma tinā talavou ua na talia le valaau mai o le Atua fai vavega. O lona talitonu ma lona fa’atuatua na ia tali atu ai, “*Faauta, o a’u nei o le auuuna a le Alii; ia faia ia te a’u e tusa ma lau fetalaiga.”*”

Ua valaauina i tatou i mea e le o’o atu i ai lo tatou iloa, e ta’ita’iina ai i tatou e le Agaga, e fa’alotele, ma fa’aupegaina i tatou ina ia tatou auuuna atu i auala ‘ese’ese ua ia fa’ailoa mai ai. O Maria na lē faia sona manatu ma se lagona i le valaau mai o le Atua, na o le faalogo ma talia. A o le Agaga o le Alii, na mafaia ai e Maria mea uma.

Tatalo: Le Alii e, fesoasoani mai ina ou talia lau valaau fa’afuasei mai. Ia pei o Maria na talia ma le loto maualalo ma le usita’i, ma talia le tamāoaiga o le Alii ua ofoina mai, **Amene.**

Aso Lulu – Ianuari 9: “Osooso ma le olioli” (*Jumping for joy*)

Tusi Faitau – Luka 1:39-56

Matua – ff.44-45: *“Faauta foi, ua o’o mai le leo o lou alofa i o’u taliga, ona osooso ai lea o le tama i lo’u manava ma le olioli. E manuia foi le fafine e talitonu, e taunuu mea ua fetalai mai ai le Alii ia te ia”*

E i ai se taimi na e fiafia ai ma osooso ma le olioli, ma ua e faalogo i lou tino ma lou loto ua e fa’agaetia ona o se meafou ua o’o mai? E i ai taimi o lo tatou ola pe a oo ina fiafia, ua le mafai ona taofia le olioli, ua aafia ai ma tagata o loo mātau mai. E faapea se va’aiga ia Maria ma Elisapeta ma Ioane, ona o le tala fiafia ua fa’ailoa mai e Kaperielu, ua taunuu valo’aga ma ua fa’amaonia.

O Maria na ia tauave le Mesia i lona manava. Ua momo’e atu ia Elisapeta ma fa’ailoa atu le perofetaga ua fa’amanuia mai ia te ia. A o Ioane, na tauave e Elisapeta i lona manava, ua osooso ma le olioli i le manava o lona tinā. O Maria ua vivii atu i le Atua i lana pese – o le Magnificat – o le pese ua tu’u fa’atasia e pei o le pese a Hana i le 1Sam 2. O le Pese i le Atua ua ia liliuina le lalolagi, auā ua ia tulei ifo alii nai o latou nofoālii, a ua fa’aeaina o ē mau lalo. O lenei tatalo o loo faia pea e le ‘au kerisiano i aso uma, o le alaga o le olioli. Ua fa’ailoa mai e Luka le Alii na te fa’aliliu le lalolagi i lona alofa.

Tatalo: Le Alii e, ia fa’atumuina lo’u loto e lou Agaga Paia i le osooso ma le olioli e pei o Maria, Elisapeta ma Ioane, **Amene.**

Aso Tofi – Ianuari 10: “E tāua le igoa” (*Names matter*)

Tusi Faitau – Luka 1:57-66

Matua – f.63: *“Ona fai atu lea o ia i se papatusi e au mai, ona tusi ai lea e ia, ua fa’apea, “O Ioane lona igoa.” Ona latou ofo uma ai lea”*

E te iloa le uiga o lou igoa? O atagia le uiga o lou igoa i lou olaga lena e te ola ai? E tāua tele le igoa. E le faigofie le galulue faatasi o matua ina ia maua se igoa mo fanau. O Sakaria ma Elisapeta, ua leva ona mafaufau i se igoa mo le la atalii. Ina ua la aumaia le tama e peritomeina, ua manatu tagata o le a fa’aigoa o ia i le igoa o lona tamā e pei ona masani ai. Peitai, ua fa’ailoa atu e Kaperielu ia Sakaria i le nalumalu, e fa’aigoa le tama ia Ioane, o lona uiga, *‘Ua ia te ia le aao o le Alii’.*

O Ioane sa soifua e tusa ma lona igoa. O le Atua foi ua fa’aolaina tagata i le olaga o lenei tama. E tele mea ua fa’ailoa mai ia te ia ma ona tagata, ina ia sāvavali e tusa ma ta’iala ua fa’asino mai, ina ia aveva ma teuteu ala o le Alii.

Tatalo: Fa’afetai le Alii ona ua e valaau mai ma fa’ailoa mai o lou igoa. Ia ou ola e tusa ma lou igoa ua e valaauina ai o a’u, **Amene.**

Aso Faraile – Ianuari 11: “O le perofeta fou” (*A new prophet*)

Tusi Faitau – Luka 1:67-80

Matua – f.76: “...*auā e te muamua atu i luma o le Alii e sauni i ona ala*”

O le tala a Kaperielu ma le fa'atumuina o Sakaria e le Agaga Paia. Ua ia molimoli mai perofetaga, ma fa'asoa mai le agaga o loo aumaia le fa'amoemoe ola i tagata. O mo'omo'oga ua fa'ataunuina, o le tama ua ia fusia i ona lima, o le tama na te teuteuina le ala o le Alii, e ala i le salamō mai le agasala, ma fo'i mai i le Atua ma ona ala.

O Sakaria ma Elisapeta ma lo la atalii ia Ioane, ua fa'atumuina i latou e le Agaga Paia. O le lu'i lea mo 'āiga uma. O le valaauina o Ioane na o'o ai ia te ia puapuaga, ma ave'eseina ai o lona ola e tagata ua lē matata'u i le Atua. O lona o'o atu i le vao tu'ufua ma mafuta ai ma le Alii, o taimi ia na sauni ai lona loto e tumau i le Alii ma lona fa'aioa mai. E fa'apea se va'aiga ua tatou iloa ia Ioane ma lana galuega, o le tagata ua sau na te teuteuina le ala o le Alii.

Tatalo: Fa'afetai ona o Ioane na o'o mai na teuteua le Ala o le Alii. Ia avea a'u ma tagata e fa'aioa atu lou finagalo i tagata, **Amene.**

Aso Toonai – Ianuari 12: “O la tatou ta'utinoga” (*Our manifesto*)

Tusi Faitau – Luka 4:14-30

Matua – f.18: “*Ua i o'u luga le Agaga o le Alii, auā ua na fa'auu mai ia te a'u e folafola le tala lelei i ē matitiva.*”

Ua tatou va'aia Iesu ma lana talaiga i Kalilaia, ua ia toe fo'i mai i lona nu'u, ma o'o atu i le sunako e tapua'i ai i le Atua. Ua faafuase'ia tagata ona ua ia fa'aioa atu, o Ia lenei ua taunuu ai le folafolaga e pei ona tusia e Isaia 61. O le tama ua fa'aioa atu, o 'ia ua fa'auuina e le Agaga o le Atua' na te faia le fa'aolataga mo i latou uma ua saisaitia mai le pologa ma le sauāina

Ua tumu ai le motu o tagata i le lē fiafia, ina ua ia fa'atusa o ia ia Elia ma Elisaia, fa'apea le fa'aioa atu o le fa'aolataga a le Atua mo tagata uma. O lea na taumafai ai isi e fa'atitō ifo Iesu i le tofē o le mauga, ona o le lē fiafia ona o faamanuiaga o le a latou lē maua.

O la tatou ta'utinoga e mulimuli i tulaga aao o le Alii, o le tala'iga o le fa'aolataga ua faia e Iesu mo tagata uma. I lenei vaiaso, ua tatou iloa le Agaga o le Atua ua fa'aaogāina ai tagata latou te fa'aioa vavega silisili 'ese a le Atua, ia fa'apea foi ona fa'amaligi mai o lona Agaga ina ua papatisoina i tatou, tatou te fa'aioa ai le fa'aolataga a le Alii, ua valaau i ai.

Tatalo: Faafetai ona o lou Agaga ua fa'atumuina ai a'u. Ia e fa'amalositia lo'u loto ina ia ou mulimuli i lau Afio ma faia lou finagalo, **Amene.**

(1) Faitauga mai ia Luka (*Readings in Luke*)
2 – Fa’asalalauina le Upu (*Spreading the Word*)

Aso Sa – Ianuari 13: “O le tala ua salalau!” (*News spreads!*)

Tusi Faitau – Luka 4:31-44

Matua – ff.40-41: *“O i latou uma sa i ai tagata mamai, ua latou aumaia i latou ia te ia.... ua pa’ipa’i tasi atu ona aao ia te i latou. Ua o atu foi temoni i fafo i e toatele, o alalaga, “O oe lava le Keriso, le Alo o le Atua.”*

Fa’amatala e Luka le lalolagi na pulea e Roma (2:1; 3:1), e pei o le lalolagi o lo’o pulea e Satani. O le Atua lava ma lona finagalo ua ia fa’ailoa mai, na te fa’aolaina ē ua fa’apologaina mai le malosi o alii sili o le lalolagi. I lenei vaiaso, ua valaauina i tatou ina ia ‘auai fa’atasi ma Iesu – ma iloa ana galuega mamana ua ia faia pea mo ona tagata.

I le Tusi a Levitiko, ua fa’amatala ai le aso ‘toe fa’atasia’ (atonement) ua osia ai le taulaga, ma ua lagona ai le pu ua ili i nu’u uma (25:4). I le tala a Luka, ua lagona e tagata le leo o le alaga, o Iesu ua fa’ailoa mai lona finagalo, ua o’o mai le Iupeli e pei ona valoia; o le aso e fa’asaoloto ai o ē puapuagatia ma saisaitia, ma fa’aolaina ai tagata mai le agasala. O lana galuega na atoa i lona maliu i le satauro, o ē uma sa avea ma fili ua fa’aumatia, ma lagona le leo o le alaga – o le aso o le ‘toe fa’atasia’ (atonement) ua manumalo ai le Alii.

Tatalo: Fa’afetai le Alii ua faaumatia le agasala ma le oti. Seia e faamanatu mai ina ia ou mulimuli i lau valaau, **Amene.**

Aso Gafua – Ianuari 14: “O tagata fai faiva” (*The fishermen*)

Tusi Faitau – Luka 5:1-11

Matua – ff.8-9: *‘Ua iloa e Simona Peteru, ona faapaū lea o ia i tulivae o Iesu, ua faapea atu, “Le Alii e, ina maliu ese atu ia oe ia te au, auā o a’u o le tagata agasala” Auā ua ofo o ia atoa ma i latou uma sa ia te ia, auā o le au i’a ua latou maua.’*

O le tala i tagata ua masani i le fai faiva, ae ua latou faalagolago ia Iesu, o le atalii o le kamuta, e maua ai i’a. Latou te le o iloa Iesu o le Atua liutino tagata, ae ina ua latou va’aia lona va fesootea ma le foafoaga fa’atasi ai ma le fa’aaliga o lana pule, o iina na latou iloa ai le tulaga ese o le Alii.

Ina ua iloa e Peteru, na muamua lava talosaga ia Iese e maliu ese. Ua iloa e Peteru o ia o le tagata e le talafeagai ma le mamalu silisili ese o le Atua. E tūua ia Iesu le tagata ua iloa lona fa’atauvaa. Auā e fa’aatoatoa e le Atua le lē lava o le tagata, e mafai ai ona fa’aaoga e tala’iina lona finagalo i le lalolagi.

Tatalo: Fa’afetai le Atua i lou fa’aaogaina o i matou, o tagata lē lava, **Amene.**

Fonotaga a Komiti

Aso Lua – Ianuari 15: “O le tagata Lepela” (*The leper*)

Tusi Faitau – Luka 5:12-16

Matua – ff.12-13: *“Fa’auta, o le tagata ua liloia i le lepela; ua iloa atu e ia o Iesu, ona faapaū fao ai lea o ia, ma aioi mai ia te ia, “Le Alii e, a e finagalo i ai, e mafai lava ia te oe ona faamamā ia te a’u.” Ona aapa atu lea o ia lona aao, ua pa’i atu ia te ia, ua faapea atu, “Ou te loto i ai; ia mamā oe.”*

O Iesu ma lona silisili ‘ese, e o’o i temoni ua latou silafia. O le ata lea i le silisili ‘ese o Iesu ma lana fa’aolataga. O le manatu o Isaraelu, e fete’ennai le oti ma le finagalo o le Atua, auā o le fa’ailoga lea o le eleelea ma le lē mamā. E fa’apea foi le va’aiga i tagata lepela, o tagata ua le mamā, le fa’ailoga o le oti. Peita’i, ua fa’aailoa mai e Ioane (Ioane 1:4), o le Atua na te fa’aolaina mea uma.

O le Atua ua afio mai i le lalolagi na te aumaia le fa’aolataga i ē ua ‘eleelea ma le mamā. O lona Agaga na te fa’atumuina loto o tagata, ma fa’aolaina tagata uma e ala i lona mafuta mai. E le gata e fa’amamā e le Atua le tagata ua ‘eleelea, a o le Atua foi e ala ia Iesu, ua ia ‘auai faatasi ma tagata ua le tauoloina ona o ma’i o le tino.

Tatalo: Fa’afetai le Alii ina ua e aumaia le ola. Fesoasoani mai ina ia ou tala’i le tala o lou mālō i ē ua mama’i ma lē tauoloina i lenei soifuga, **Amene.**

Fonotaga a Komiti

Aso Lulu – Ianuari 16: “O le tagata ma’i supa” (*The paralytic*)

Tusi Faitau – Luka 5:17-26

Matua – ff.24-25: *‘Ua fetalai atu ia i le supa, Ou te fai atu ia te oe, Tulai ia, ina ave lou moega, ma e alu i lou fale’ Ona tulai loa lea o ia i o latou luma, ua ave le moega na taoto ai, ona alu ai lea i lona fale, ua vivii atu i le Atua.’*

I lenei faitauga, ua fa’aailoa mai e Iesu le fa’aolataga e pei ona mua’i fa’aailoa i le Iupeli, i le fa’asaolotoina o le tagata supa mai le agasala. O le Iupeli o le taimi o le saolotoga – e saoloto ai le lauelele fa’atasi ai ma le tagata. O le fa’amoemoe o lenei saolotoga, o le toe fa’afou ma le toe fa’afoi o le lauelele ma le tagata i lona matagofie e pei ona i ai i le amataga.

O le fa’atinoga o le saolotoga lea o loo fa’atusa i le faamaloloina o le tagata ma’i supa, ina ua fa’atonu e Iesu e ave lona moega ma alu i lona ‘āiga ua fa’amaloloina. Ona tula’i ai lea ma alu i lona ‘āiga, ua vivii i le Atua, e pei ona faia ai o ia i le amataga. O le finagalo o le Atua e ala ia Iesu, lea ua faaalua i le ma’i supa – ia toe fa’afai le tagata i lona matagofie e pei ona i ai i le amataga.

Tatalo: Le Atua e, fa’auau pea lou fa’aliliuina o lo’u olaga, ma fa’aali mai pe fa’apefea ona avea a’u ma malamalama i isi, **Amene.**

Aso Tofi – Ianuari 17: “O le tagata ao lafoga” (*The tax collector*)

Tusi Faitau – Luka 5:27-38

Matua – ff.29-30: *‘Ua faia foi e Levi le faiga'ai tele māna i lona fale; sa i ai tagata ao lafoga....ma isi tagata ē na taoto e aai fa'atasi ma i latou. A o faresaio ma o latou tusiupu ua latou muimui i ona soo, ma faapea atu, “Se a le mea tou te aai ma feinu ai faatasi ma tagata ao lafoga ma ē ua agasala?”*

O loo fa'auau pea le galuega a Iesu mo ē matitiva. O le tagata mativa i le va'aiga fa'a-Sasae tutotonu, e mativa i lona siosiomaga. I le fa'aaogāina o le upu 'agasala,' ua faitauina ai Iesu fa'atasi ma tagata ao lafoga. E fa'apea se vaai ia Levi, o le tagata mativa, e mo'omia le fa'aolaina. O le tala fiafia ia Levi, ua afio mai Iesu na te fa'aola i ē matitiva. Na mulimuli Levi ia Iesu, ma tu'uina atu lona tamāoaiga e fa'atino ai le faiga'ai. Toatele le 'au ao lafoga ma ē matitiva sa 'auai, ua o mai e fa'alogologo i le tala lelei ua aumaia e Iesu.

O se tala fiafia lea i atunuu o loo tele ai le sauāina ma le olopalaina o tagata. O Iesu na afio mai mo e lē tauaolaina ma lē amana'ia i le gāsologa masani o le soifuaga. E toatele tagata fa'apea i nei ona aso.

Tatalo: O le tagata sa mamao ma le satauro ma le fa'aolaina, ia avea a'u ma tagata e tala'i atu le saolotoga mo ē ua lē taualoa, **Amene.**

Fa'apaia Malumalu “Ua Taunuu”

Aso Faraile – Ianuari 18: “O le ‘au aposetolo” (*The apostles*)

Tusi Faitau – Luka 6:1-16

Matua – ff.1-2: *‘O le tasi sapati ua ui atu ai o ia i tosaito, ona ooti ai lea e ona soo o 'au saitō, ua mili ai i o latou lima, ma aai ai. Ona fai mai lea o isi o le au faresaio, “Se a le mea tou te fai ai le mea e sa ona fai i le sapati?”*

O le Sapati i le Feagaiga Tuai, o le aso ua fa'asāina, e manatua ai le Alii o lē na faia o mea uma, fa'apea le aveina a'e o Isaraelu mai le nofo pologa i Aikupito. O le fa'amoemoe o Isaraelu, e i ai le aso e toe faia ai e le Atua le fa'aolaina o mea uma na ia faia, ma fa'asaoloto ai mai le pologa o le agasala. O le fa'amoemoe lea o le Sapati e pei ona i ai.

I lenei vaiaso, o loo fa'aailoa mai e Iesu le fa'ataunuuina o lea fa'amoemoe. Ua fa'aailoa lana pule i mea uma e ala i fa'amalologa, fa'apea le valaauina o le 'au fai faiva e tala'i le faaolaina o e ua saisaitia ona o le pule sauā. Sa taofi pea le 'au Faresaio i le uiga o le Sapati sa sau a'i. Ua latou le iloa ai le uiga o le galuega a Iesu, ma lona afio mai e faatino le uiga moni o le Sapati.

Tatalo: Le Alii e, o lē ona le malosi uma lava, faatupuina lo'u malosi e tatalo mo i latou ua galulue e faatino le alofa, **Amene.**

Aso Toonai – Ianuari 19: “Fa’amanuiaga ma mafatiaga”

Tusi Faitau – Luka 6:17-26 (Blessing and woes)

Matua – ff.17-18a: *‘Ua malii ifo o ia faatasi ma i latou, ona tu lea o ia i le mea laugatasi, ma ona soo e toatele, ma le motu o tagata e toatele mai Iutaia uma, ma Ierusalem, ma le itu i tai o Turo ma Saitonu, ua latou o mai e faalogologo ia te ia, ma ia faamaloloina o latou ma’i’*

O le faatomuaga lea o ‘faamanuiaga ma auega,’ e tele mea e mafai ona faatusa i ai. E pei o le alu atu o Mose i le mauga e feiloa’i ma le Atua, e faapea Iesu ma lona alu atu i le mauga e feagai ma le Atua i le tatalo. Na alu ifo foi Iesu mai le mauga ma valaauina soo e sefulu ma le lua (12), e pei ona filifili e le Atua o ituaiga e 12 o Isaraelu.

O ala o le Atua tatou te iloa ai lona finagalo. O i latou ua lē taliaina e isu, ua fusia faatasi ma faaolaina i le lalolagi fou ua aumaia e Iesu. O le va’aiga i le Atua ua a’oa’oina ai i tatou, e tatau ona tatou iloa a o tatou malaga faatasi ma Ia. O se olaga tāua o loo o’u taumafai ai ina ia o’u iloa le tala i le Atua ma lona faaali mai. O tala i tagata, na faapea ona latou iloa le malaga na malaga ai, faapea ma le tatalo i le Alii ina ia tautai le faigamalaga a ona tagata.

Tatalo: Faafetai le Alii ua fa’apupulaina o’u mata ou te iloa ai va’aiga matagā i le lalolagi. Ia e faapupulaina a’u ou te iloa ai lou fetalai mai, **Amene**

(1) Faitauga mai ia Luka (Readings in Luke)

3 – Po o oe ea leni? (Are you the one?)

Aso Sa – Ianuari 20: “Si fasi la’au ma le utupoto” (Sawdust and planks)

Tusi Faitau – Luka 6:27-42

Matua – f.41: *“Se a le mea e te vaai atu ai i si fasi la’au i le mata o lou uso, a e le iloa e oe le utupoto i lou lava mata?”*

O le fa’aleleiga, o se va’aiga tāua mo tagata ua fe’eseesea’i. I le amataga o le fa’aleleiga, e tofu le tagata ma le mea o loo manatu i ai e fia fa’ailoa atu i le isi. Peitai, e tatau i le tagata ona va’ai muamua i ona ia fa’aletonu. E pei o le tagata o loo va’ai i le fasi la’au o loo i le mata o lona uso, a ua le vaai muamua i le utupoto o loo i lona mata. E i ai taimi tatou te manatu ai e sa’o i tatou ae sese le isi. O le mea tāua, o le vaai muamua o le tagata ia ia te ia. A manino lou silasila ia te oe lava ia, e manino foi lou faalogo i mea lelei ua a’oa’o mai e isi. E fa’apea se lagona e mafuta lelei ai le ‘au kerisiano ma nonofo fa’atasi ai.

Tatalo: Le Alii e, sei e ‘eu ese le fasi la’au mai lo’u mata, ou te fautua lelei ai i lo’u uso o loo manaomia le fesoasoani, **Amene.**

Martin Luther King Jr. Birthday (Aso Malolo i Amerika)

Aso Gafua – Ianuari 21: “O fa’avae lelei” (*Good foundations*)

Tusi Faitau – Luka 6:43-49

Matua – ff.47-48: *‘O sē sau ia te au ma fa’alogo i a’u upu ma faia e ia, ou te fa’ailoa atu ia te outou lē ua tusa i ai o ia. E tusa o ia ma le tagata ua fai lona fale, ua ia eli maulalo, ua tu’u le faavae i luga o le papa; ona sau lea o le tafe, ua fafati mai le vaitafe i lea fale, ua le ma gaoioi ai lava; auā ua fausia lelei’*

E i ai le alaga upu e fa’apea, "e fafaga tama a manu i fuga o laau ma i’a, a e fafaga le tama a le tagata i upu ma tala." O lenei alaga upu o loo fa’ailoa mai ai le tāua o fa’avae lelei mo le fanau, auā o fanau e fafaga i upu ma a’oa’oga lelei a matua, e manuia ai lo latou ola tuputupu a’e.

E fa’apea le tagata fa’atuatua e fa’avae lona soifua ia Keriso, o ia o le papa, e le mafai ona maluelue ai le loto o le tagata pe ā o’o mai puapuaga. O Keriso ua tatou maua ai le fa’avae sili e atia’e ai a tatou fanau, fa’apea ai ma o tatou ‘āiga. Poo a lava fa’afitauli o le olaga e o’o mai, e lē fa’ageetia le tagata ua fausia lelei lona fa’avae ia Kerisio.

Tatalo: Iesu e, aumaia le poto mai lau afio, e faavae ai lo’u faatuatua, **Amene.**

Aso Lua – Ianuari 22: “Tau lava o sau fetalaiiga” (*Just say the word*)

Tusi Faitau – Luka 7:1-17

Matua – f.7: *‘O lea foi na ou manatu ai ou te le aoga ona ou alu atu ia te oe. A ia oo mai sau fetalaiiga, e faamaloloina ai la’u auauna.’*

O le tala i le ta’ita’i o le toaselau o loo atagia mai ai le maoa’e o le faatuatua lenei ta’ita’i. E talitonu le ta’ita’i, o le fetalaiiga a Iesu e malolo ai lana auauna. E fa’apea foi le talitonu o le ta’ita’i i le fa’atinoga o lana galuega pe a fai atu i ana fitafita. Silafia e le ta’ita’i le tāua o le upu fetalai. E tau lava o se upu e fetalai ai le Alii, ona malolo ai lea o lana auauna. Na matua ofo Iesu i lea faatuatua.

O le tala i le tinā ma lana tama ua oti, e ‘ese foi lea tala. Na ia le fa’ailoa ia Iesu ina ia faia se vavega mo lana tama ua oti. Peita’i, o ona loimata ma lona loto faanoanoa sa va’aia e tagata uma, fa’apea Iesu. A o loimata ua suia i le olioli, ina ua toe fa’aolaina e Iesu lana tama. E mautinoa, e lei valaau atu o ia Iesu, a o lona loto atoa, ua faia ai e Iesu le toe fa’aolaina o lana tama.

E silafia e Iesu o tatou loto, ma mea uma tatou te augani atu ai ia te ia. Pe tatou te lē faailoa atu pe ta’u atu foi, ua silafia e Iesu mea uma i o tatou loto. O iina e faivavega ai le Atua i lou soifua ma lo tatou ola, ona o lona alofa.

Tatalo: Le Alii e, seia e tali mai i mafaufauga o matou loto, ma ia o’o mai le upu a lau afio i mea uma matou te ola ai, **Amene.**

Aso Lulu – Ianuari 23: “Po o oe ea lenei?” (*Are you the one?*)

Tusi Faitau – Luka 7:18-35

Matua – f.19: *“Po o oe ea lē maliu mai, pe matou te faatali atu i se tasi?”*

O lo matou ‘āiga, ua galulue nei i le Ekalesia Faapotopotoga Kerisano Samoa i Fairfield i Ausetalia. Ou te fiafia tele e tusi tala mo le Aoga Aso Sa, fa'apea tala e tusa ma le kalena i Aso Sa, e pei o le aso Kerisimasi. Ou te fiafia foi e fa'amatalaina tala i le Aso Sa, ma valaauina tagata latou te fa'atinoa ia tala. Ua ou mautinoa lelei tagata e agavaa e fa'atinoa lea vaega ma lea vaega o le tala, fa'apea foi lo'u iloa o tagata e lelei le tautala i le gagana Samoa. Afai o se pese e fia usuina, ua ou iloa le tagata e lelei le leo e fa'atinoa lea vaega. Ae e i ai taimi ou te toe mafaufau ane ai, "O sa'o ea la'u filifiliga o le tagata lea e fa'atinoa lea vaega ma lea vaega o le tala?"

E foliga fa'apea se manatu sa ia Ioane le papatiso ina ua iloa Iesu, ma ua fesili ai po o ia o le Mesia ua afio mai. Na fa'ailoa atu e Iesu o a'oa'oga ma vavega na ia faia, ma ua mautinoa ai Ioane, o ia lea e pei ona folafolaina mai. Ua valaauina i tatou e fa'atino le olaga kerisiano i mea uma tatou te faia. O le fesili tāua, po o tatou faatinoa ia galuega ua vaalaauiina ai i tatou?

Tatalo: Le Alii e, sei e fa'ailoa mai o i matou o tagata ua valaauina e lau Afio, matou te fa'atino ai a'oa'oga e pei ona e a'oa'oina ai i matou, **Amene.**

Aso Tofi – Ianuari 24: “O le taulaga manogi lelei” (*A fragrant offering*)

Tusi Faitau – Luka 7:36-39

Matua – f.37: *‘Fa'auta foi, o le fafine o le aai, o ia o le fafine agasala, ua iloa e ia ua taoto o ia e taumafa i le fale o le faresaio, ona 'au mai lea e ia o le fagu alapasa ua tumu i le suauu manogi.’*

I le tausaga muamua i le Kolisi Faa-faifeau i Malua, sa i ai le moso'oi i talaane o le matou fale. O le laau e fua manogi manaia, ua fa'atumulia ai le sasala o le manogi i lo matou fale. A tu'ua atu, e faagae'etia lou loto i le fiafia i le manogi o le moso'oi.

O le u'u a le tinā i le fagu alapasa, o le suau'u manogi e silisili lona taugatā. Ina ua u'uina ai vae o Iesu, ua fa'atumulia ai le fale i le manogi matagofie. O le u'u ua sili lona taugatā, a o lea ua tuuina atu e le tinā ma lona loto atoa. Ua foai ma le loto malie i le Alii, ina ua avea o ia ma tagata o le mālō o le Atua. I le avea ai ma Kerisiano, tatou te taumafai ina ia maua le manogi silisili i le silafaga a le Atua. O lenei manogi e tupu pea ma fa'ateleina, pe a tutusa o tatou loto ma le finagalo o le Alii.

Tatalo: Le Alii e, aumai ia le lototele ina ia avea a'u ma manogi silisili i lou fa'afofoga mai, **Amene.**

Aso Faraile – Ianuari 25: “Lūlūina saitō” (*Sowing seeds*)

Tusi Faitau – Luka 8:1-15

Matua – f.11: “*O le fa’ataoto lenei: O le saitō, o le afioga lea a le Atua.*”

O le masani o le matou 'aulotu i le Aso Sa, a mae'a le lauga a le Faifeau, ona tula'i lea o le Failautusi ma fa'afeiloai i le faifeau, fa'apea le 'aulotu atoa ma ē ua asi mai. E fai ma le fa'afetai i le Faifeau mo le lauga, ma o le fa'apuga e masani ona fa'aogaina, “ia avea ma fatu e pa’ū i loto ma agaga, ina ia fua tele mai.” O le fa'apuga ua fa'atusa ai le lauga a le faifeau i le ata o le saitō ua luluina i le eleele. O le Upu a le Atua ua laugaina e le faifeau, ua lulu i loto ma agaga o tagata tapua'i e ala i la latou faalogologo. A o le fa'amoemoe maua, ia fua i le ola ma le soifua o tagata.

O le luluina o le saitō o le tala lelei, e lē faigofie i nisi o taimi. E i ai taimi ua fa'atetele mai ai sauniga o le vaiaso, o polokalame mo le a'oga aso sa, o tupulaga, o pese, le mafutaga a tinā ma tamā, ma isi porokalama fai a le 'aulotu. Peitai, a tatou faalagolago i le Alii ma le musumusuga a lona Agaga, ona tatou maua lea o le to'afilemū e ui i le tele o mea e fai. E fa'atuputeleina le fiafia i le loto, pe a va'avaai atu i saitō sa luluina, a ua fua tele mai.

Tatalo: Le Alii e, 'au maia ia te au le lototele e tōtōina ai lau Upu, ma lou Agaga na te fa'amalosi mai ia te a'u, **Amene.**

Australia Day (Aso fa'amanatu o tagata Ausetalia)

Aso Toonai – Ianuari 26: “O fea lou faatuatua?” (*Where is your faith?*)

Tusi Faitau – Luka 8:16-25

Matua – f.25: “*Ua fetalai atu o ia ia te i latou,*” *O ifea ea lo outou faatuatua?”*

I le 1990, na o mai ai lo matou ‘āiga mai Niu Sila e fai kerisimasi i Samoa. I lea vaiata, na agi ai le afā tele i Samoa. Ou te manatua a o teine itiiti, sa matou i ai i le ‘āiga o lo'u tinā i Apia i le taimi na agi ai le afā. O se taimi na ou lē nofo filemu ai ina ua va'ai atu i le lelea o apa o isi fale. O le matou ‘āiga potopoto, ua o mai faatasi ma tutu molī matagi ma tatalo, ma faalogologo i tala a toeiina. O le omai faatasi ma le mafuta faatasi o lo'u aiga, e peiseai o iina na maua ai le to'afilemū o lou loto. O le mafutaga a mātua ma aiga i taimi faigata, o iina na ou fa'atuatua ai i le faatasi mai o le Atua.

Ina ua iloa e le 'au soo le mana faivavega a Iesu, sa tataua ona latou maua le fa'atuatua e tuuina atu ai o latou loto ia te Ia. O le luitau foi lea mo i tatou: ia fa'atuatua ia Iesu ma talitonu ia te Ia, o lē e ona le malosi uma lava.

Tatalo: Fesoasoani mai ina ia matou iloa lou silisili 'ese ma lou malosi uma lava, ina ia lē ave'ese ai lo'u talitonu ma lo'u fa'atuatua ia te oe, **Amene.**

O le Tusi Paia i Ata Tifaga (*The Bible at the movies*)

1 – O Amataga Iloga (*Epic Beginnings*)

Aso Sa – Ianuari 27: “O le tausiga a le Atua” (*God’s care*)

Tusi Faitau – Salamo 140:1-13

Matua – ff.6, 12: *‘Na ou fai atu i le Alii, O oe lava lo’u Atua; le Alii e, ia e fa’afofoga mai i le leo o la’u aioi atu. Ua ou iloa e faia e le Atua le finauga mo e ua puapuagatia, o le fa’amasinoga o ē ua matitiva.’*

O le ata sauā o loo vaaia i le Salamo 140 – i mailei mata’utia, o le a’asa o le fa’aleagaina, ma fili ua togia i lua – masalo e telē se galuega e faia ai i nei ona aso e tapu’e ai ma faaali mai ai i se ata tifaga.

O lenei vaiaso ua amata ai se va’aiga fou e maimoa ai i le Tusi Paia e ala i le fa’aaliga o tala o ata tifaga. O le feau o loo aumaia i le tele o ata tifaga i nei ona aso, o feau e maua mai i totonu o le Tusi Paia. O iina tatou te mautinoa ai, e leai se esesega tele o tala o le Tusi Paia ma tala o loo faamatalaina i ata tifaga. A o tatou sāilia le loloto o tala o le Tusi Paia mai i ata tifaga, e tasi lava le mea tāua e fesootai ai le lua: “O le Atua na te tausia ona tagata.”

Tatalo: Le Alii e, seia e fa’afofoga mai i la’u alaga ina ia faia le amiotonu ma le alofa, i le lalolagi mafatia ma sāuaina, **Amene.**

Australia Day (Aso Malolo i Ausetalia)

Aso Gafua – Ianuari 28: “Ola tuputupu’a’e o le tagata” (*Evolution of a man*)

Tusi Faitau – Kenese 2:4-9

Matua – f.7: *‘Ona faia lea e le Alii le Atua o le tagata....ma ua mānava i ona pogaiisu o le mānava ola; ona avea ai lea o le tagata ma tagata ola’.*

O le ata ‘*Boyhood*,’ o loo fa’amatala ai le olaga o Mason, ma fa’afitauli o le olaga sa feagai ma ia i lona tuputupu a’e. O le tasi o manatu autū o loo fa’ailoa mai e le ata, e i ai mea e tutupu i le olaga e le mafai e le tagata ona pulea. Mo Mason: o le tete’a o ona matua, o fa’aletonu sa ola ai lona tamā, ma le toe faia o le to’alua a lona tinā – o mea ia sa le au i ai le pule ma le malosi o Mason, a o mea ia na matuā aafia ai lona ola tuputupu a’e.

Na mānava e le Atua le manava ola i le tagata. Peitai, e aafia le tulaga e agai ai le tuputupu a’e o le tagata i mea e tutupu i le soifuaga, aemaise o mea e le au i ai lona pule ma lona malosi. E pei o Mason, tatou te le iloa poo fea o le a tatou i’u i ai i lenei olaga. Ae afai na manavaina e le Atua le ola i le tagata, e i ai le faamoemoe e ta’ita’iina foi e le Atua le mea tatou te aga’i i ai.

Tatalo: Fa’afetai le Alii e, ona o le mānava ola ua matou maua i lenei olaga. Ta’ita’i mai i matou ina ia savavali e tusa ma lou finagalo, **Amene.**

Aso Lua – Ianuari 29: “O le tauiviga mo ‘aia tutusa” (*The fight for equality*)

Tusi Faitau – Kenese 2:18-24

Matua – f.18: *‘Ona fetalai mai foi le Alii le Atua, E le lelei ina toatasi o le tagata; ou te faia sona fesoasoani e tatau ma ia,’*

O le tala i le foafoaga ma le fa'aigoaina o le fafine – ‘o le fesoasoani’ – sa fai ma si’oga e taotaomia ai le ‘aia tutusa o fafine, mai lava i le amataga. O le ata, *‘Made in Dagenham,’* o se tasi lea o ata tifaga o loo fa’ailoa mai ai le tauiviga mo ‘aia tutusa sa feagai ma fafine i le laumua i Lonetona. Ina ua alu le solo tete’e a fafine ona o le itiiti o a latou tofogi faigaluega nai lo tamaloloa, sa tapunia ai pisinisi ma kamupani, ma afaina ai le mālō. O iina na iloa ai e tagata Lonetona le tāua o fafine.

E ‘aia tutusa uma alii ma tamaita’i i le foafoaga a le Atua. E gata loa la tatou va’ai i le tamaita’i o ia ua na o se “fesoasoani,” ona lē paleni lea o le lalolagi lea tatou te ola ai.

Tatalo: Fa’afetai le Atua mo i latou ua saili atu ma tauivi mo ‘aiā tutusa o tagata uma, o alii ma tamaita’i, i le lalolagi, **Amene**

Aso Tofi – Ianuari 30: “O le mala o le fa’aosoosoina”

Tusi Faitau – Kenese 3:1-13

(*The curse of temptation*)

Matua – ff.4-5: *‘Ona fai mai lea o le gata i le fafine, Lua te le oti lava; auā ua silafia e le Atua, o le aso lua te aai ai, e pupula ai o oulua mata; ona avea lea o oulua e pei ni atua o loo iloa le lelei ma le leaga.’*

O le atamai o le gata ma lona fa’atosina i le fafine e ‘ai le fua o le laau, o le va’aiga muamua lava lea i le fa’aosoosoga. E tele ata tifaga o loo fa’ailoa mai ai puapuaga ma faigata e aafia ai le tagata pe a pa’ū atu i faaosoosoga. A o ata e sili ona aanoa a latou a’oa’oga, o ata o loo fa’ailoa mai ai le tagata ua tete’e atu i fa’aosoosoga, e ui i le tele o faigata sa aafia ai, ma manumalo ai.

E fa’apea le ata mai Peretania e igoa o le: *“Brief Encounter.”* O le ata o se tinā e fai lona to’alua ma lana fanau, ae toe fai ma lana manamea fa’alilolilo. E fa’aali mai e le ata le tauiviga sa feagai ma le tinā ina ua fetosoa’ina ona lagona i le va ma lona to’alua ma lana fanau, ma lana manamea. Peita’i, e i’u ane le ata, ua malilie faatasi le tinā ma lana manamea e nonofo valavala, auā e leai se lumanai manuia e maua i le mafutaga fa’alilolilo o loo la faia. Tatou te tauivi pea ma fa’aosoosoga eeseese o le olaga, a o ia tauiviga, e ta’ita’iina pea i tatou e le Atua e fai le filifiliga tonu ma le filifiliga sa’o.

Tatalo: Le Alii e, ta’ita’ina i matou mai i fa’aosoosoga ma laveai i matou mai le leaga, auā e ou le mālō ma le mana, atoa ma le vi’iga e fa’avavau lava, **Amene.**

Aso Tofi – Ianuari 31: “Malūlūina i le tāfeaga” (*Frozen in exile*)

Tusi Faitau – Kenese 4:1-16

Matua – f.14: *‘Ua e tulia a’u i le aso nei ai le fogāeleele; o le a lilo a’u i ou fofoga; o le a avea a’u ma maumausolo ma faasevasevaloina i le lalolagi’*

O le fa’aaunuu o Kaino e ia lava, o se tasi lea o ata va’aia i totonu o le Tusi Paia e fa’aautu i le 'ola tāfea,' a o se olaga e sili ona lē fiafia ai le Atua. O le ata tifaga, “*Frozen,*” o le ata e autū i le ola tāfea, ina ua sola ese Elsa, le uso matua, mai i lona uso laitiiti, o Ana, ina ua iloa lona malaia: e liu ‘aia mea uma e pa’i atu ai ona lima. E ui na ola tāfea Elsa mai i lona uso ma ona tagata, ae sa le mavae ai le alofa o lona uso o Ana mo ia. I le i’uga o le ata, o le alofa fa’ale-uso o le tasi i le isi, na laveaiina ai i la’ua uma mai i isi faigata e tele.

E ui na sola ese Kaino mai i fofoga o le Atua, ae sa leoleo ma puipui pea e le Atua. O Kaino lava na filifilia le ola tāfea, ae sa tuliloa pea o ia e le alofa o le Atua. Soo se taimi tatou te sosola ese ai mai i mea e tutupu i le soifuaga, e saili mai pea ma si’osi’omia i tatou i le alofa o le Atua.

Tatalo: Fa’afetai le Atua i lou lē liliu’ese, e ui na matou liliu mai i lau afio. Seia e leoleo ma puipui mai i matou i lou alofa, **Amene.**

Aso Faraile – Fepuari 1: “Tete’e atu i le ‘au fa’alata” (*Denying the betrayers*)

Tusi Faitau – Mataio 26:20-29

Matua – f.24: *"E alu lava le Atalii o le tagata e pei ona tusia ia te ia; a o le tagata na te faalataina le Atalii o le tagata, oi talofa ia te ia. E lelei i lea tagata pe ana le fanau mai o ia."*

O le fa’alataina o Iesu e Iuta, o se taimi faigata lea mo le Alii. E i ai le talitonuga, o fa’atinoga uma e tusa ma le fa’alataina o Iesu, o fa’atinoga uma ia sa fuafua lava e Iuta. I le tala faasolopito, soo se vevesiga lava e tupu ona o le suafa o Iesu, e faatusaina lea i le mea sa faia e Iuta – o le faalataina lea o Iesu.

E i ai le ata tifaga, “*American History X,*” o lo’o fa’aalia ai le loloto ma le faigata o fe’eseeseaiga e mafua ona o le faailoga-lanu. O loo fa’aailoa mai e le ata se tasi o fa’alapotopotoga o tagata papa’e e igoa, o le “*Disciples of Christ,*” sa latou faia ni uiga matagā i tagata Kerisiano lanu, ae ta’u ai le igoa o Iesu. O se ata o lo’o fa’aali mai ai vevesiga ma fe’ese’eseaiga i le va o tagata, ae tuua’i i luga o le talitonuga fa’a-Kerisiano. O le vevesi ma le fe’eseesea’i, e le o ni uiga ia o le fa’a-Kerisiano ma i latou ua ofoina atu e mulimuli ia Iesu. O le fa’atusa lea o tagata ua latou fa’alataina Iesu ma lona alofa.

Tatalo: Iesu e, le Alii alofa, foa’i mai le malosi matou te tete’e atu ai i sauāga e tuua’i fua ai lou Suafa, **Amene.**

Aso Toonai – Fepuari 2: “Keriso e soloia ai pa”

Tusi Faitau – Efeso 2:14-22 (Christ who breaks down walls)

Matua – f.14: "Auā o ia lava o lo tatou leleiga, ua faia ia tasi ē sa fa'alua, ua na soloia foi le pa vaeloto o le feitaga'i sa vaeluaina ai."

Ua fa'aalia i le tala faasolopito le naunau o tagata ia tu'u eseese tagata lanu, ona o le talitonuga, e sili le tāua o le isi lanu nai lo le isi. E pei o le fasiotiga o tagata Iutaia i le pule a Hitilā, o le fasiotiga o tagata Musalema i Europa, ma sauāga i Rwanda – o sauāga mata'utia ia sa tutupu e tu'u eseese ai lanu. E fa'apea foi i Aferika i Saute ma le alii o Nelson Mandela. 43 tausaga o avea ma tulafono i Aferika i Saute le tu'u eseeseina o tagata papa'e ma tagata uli. O le tatalaina o Mandela mai le falepuipui i le 1991 ina ua atoa le 27 tausaga o saisaitia ai, o le amataga lea o le soloia i lalo o pa vaeloto sa ati i le va o tagata i Aferika i Saute.

E molimau le tala faasolopito ma mea e tutupu i lo tatou ola i nei ona aso, e fiafia tele tagata e ola fevaevae'i. Peitai, e manino lava le Feagaiga Fou ma lana molimau, o tagata uma ua tasi ia Keriso. O Keriso ua soloia ai i lalo pa vaeloto uma, ua tasi ai tagata uma ia te ia.

Tatalo: Le Atua e, talosia le lalolagi fe'eseesea'i, ia fai ma lalolagi e tasi i luma o lau afio e ala i le nonofo fealofani, **Amene.**

O le Tusi Paia i Ata Tifaga (*The Bible at the Movies*)

2 – Fa'asoa mai le Popcorn (*Pass the Popcorn*)

Aso Sa – Fepuari 3: “E afio le Atua i mea uma?” (*God is everywhere?*)

Tusi Faitau – Galuega 17:22-28

Matua – f.23: "Auā na ou ui ane, ma ou matamata i a outou mea paia, ona ou iloa atu lea o le fata ua tusi i ai, MO LE ATUA E LE ILOA. O lenei, o ia ua outou tapua'i i ai ma le lē iloa, ou te faailoa atu ai ia te outou."

E le uma le fia matamata i le ata, "Iron Man." O le olaga o Iron Man, e faatusaina i le olaga o Paulo: lona naunau e fai le mea sa'o, le liliuina o lona olaga ona o se fa'aaliga sa iloa i le ala, ma lona ofoina atu e laveai tagata vaivai ua moomia le fesoasoani. E tele lava ata tifaga o loo faailoa mai ai le feau ma aoaoga a le Tusi Paia. Ana tala'i Paulo i nei ona aso e faailoa "le Atua e le iloa" sa tapuai ai Atenai, e faaoga e Paulo ata tifaga e faamalamalama ai. O lenei vaiaso o le a tatou taga'i i ata tifaga mai le vaaiga o le Tusi Paia, ma taumafai e faailoa le Atua, lea e faimai Atenai, "e le iloa."

Tatalo: Le Alii e, fa'aali mai se ata tifaga e ta'ita'iina ai lo'u iloa o oe, o le Atua moni e to'atasi, **Amene.**

Aso Gafua – Fepuari 4: “O le Atua e silasila i mea uma” *(The all-seeing God)*

Tusi Faitau – Salamo 139:12-17

Matua – f.12: *Auā o le pouliuli o le pouliuli lava lea ia te ‘oe; e malamalama le po pei o le aso; e tusa lava ia te ‘oe le pouliuli ma le malamalama.*

Molimau le faisalāmo, e leai se mea e mafai ona vavae ese mai ai i tatou mai le alofa ma le silasila mai o le Atua. O Iesu o le malamalama e susulu atu i le pogisa, a o le pogisa na te taumafai e natia i tatou mai i le Atua. Peitai, o le natura masani o le tagata, e fialia e lafi i le pogisa.

O le ata, *“Tomorrowland: A World Beyond,”* o loo fa’aali mai ai tagata e nonofo i isi lalolagi, ae latou te iloa mai le lalolagi lea tatou te nonofo ai, ma mea e tutupu ai, atoa ma o lo tatou lumanai. Ua latou aumaia le fa’aaliga ina ia tatou liliu ese mai le olaga o loo tatou ola ai, auā e i’u i le malaia. Peitai, ua tetee ma le amana’ia e tagata ia faaaliga. E pei o le Atua, na te silasila mai ma silafia mea uma o le a tutupu i le olaga o le tagata. E taumafai lava le Atua ina ia laveaiina le tagata, a o le tagata e fialia pea e ola i le pogisa.

Tatalo: Fa’afetai le Atua i lou malamalama, ua e lavea’ina ai i matou, **Amene.**

Aso Lua – Fepuari 5: “O le Afioga a le Atua” *(The Word of God)*

Tusi Faitau – Isaia 40:1-8

Matua – ff.3-4: *“O le leo o lē ua alaga i le vao, inā teuteu ia outou le ala o le Alii; ia outou fa’alauateleina le ala tele i le vao lafulafuā mo lo tatou Atua. O vanu uma e fa’aeaina ia;...ma mea gaoā e fai ma mea laulelei.”*

O le *“Book of Eli,”* o se ata tifaga e maua gatā. E fa’aautu i le Kerisiano o loo soifua i se vaitau o le lumanai ua fa’aleagaina ai le lalolagi, o loo malosi ai le ola lē pulea o tagata, aemaise le leai o se ola talitonu ma se ola fa’atuatua i le Atua. A o Eli, e le gata e tauaso, ae e fa’atusa ia te ia le perofetaga a Isaia i le *“leo o lē ua alaga i le vao,”* talu ai le Tusi Paia o loo ia tauaveina. Sa leoleo ma puipui e Eli lenei Tusi Paia mai i tagata leaga ma tagata fao mea, seia o’o ina taunuu manuia lana malaga i lona i’uga.

E le taumate sa leoleo ma puipui le Atua ia Eli, ina ia saofia lana Upu e pei ona tauaveina. Ua aveese e le Atua mea faigata uma, ma fa’amalosia Eli ia fa’asaoina le Upu. O le finagalo foi lea o le Atua e pei ona molimau le perofeta o Isaia i lenei aso: o le teuteu ala. E le’i solomuli Eli i faigata ma puapuaga auā ua ia te ia le Upu, na ia tausia i le ao ma le po, ma na ia savali ai i le fa’atuatua i le Atua. O le leo o lē alaga ua faapea mai, e moni lava.

Tatalo: Le Alii e, ia tupu i lo’u loto le alofa e tau’ave au afioga. Fa’ailoa mai, ia ou lagona lou fetalai mai i au lava afioga, **Amene.**

Waitangi Day (Aso Malolo i Niu Sila)

Aso Lulu – Fepuari 6: “Ia fa’atoilaloina le leaga” (*Overcoming evil*)

Tusi Faitau – Salamo 37:1-11

Matua – ff.10-11: *“E toe itiiti, ona leai lea o le tagata amio leaga; e te mafaufau foi i le mea sa i ai o ia, a e leai lava. A o e agamalu, e fai mo latou le nuu; e fa’afiafia foi i latou ia te i latou ona o le manuia e tele.”*

O le ata, *“Rogue One: A Star Wars Story,”* o loo fa’ailoa mai ai le tala i nai tagata vaivai ma maulalo sa sauāina ma olopalaina i le pule sauā o tagata malolosi. E fa’amanatu mai e lenei ata le amataga o le faa-Kerisiano. Na amata e nai tagata maulalo sa sauāina e le mālō o Roma. O nei tagata maulalo, sa i ai le feau sa o latou naunau e fia tala’iina: o lona autū e maua ai e tagata uma le saolotoga. A talaiina lenei feau, na te suia mea uma. E ui i le tele o mea faigata sa faamata’u mai, ae sa ofoina atu le ola o nai tagata maulalo ia, ina ia tala’iina ma saofia ai lo latou feau.

O le fe’au tonu lea o loo tau’aveina pea e le Ekalesia Kerisiano e o’o mai i nei ona aso, e folafola ma tala’i le fe’au o le sa’olotoga e filemu ai le lalolagi uma. E valaau pea e le Atua tagata maulalo ma vaivai e tala’iina lona finagalo. E fa’aaupagaina foi e le Atua i latou e fa’atoilaloina le leaga.

Tatalo: Le Alii e, ia foai mai le malosi atoatoa e avea ai i matou ma au fitafita faamoemoeina, ia matou tau ma le manumalo e oo i le iuga, **Amene.**

Aso Tofi – Fepuari 7: “Amuia ē fa’atupuina le filemu”

Tusi Faitau – Mataio 5:1-16 (*Blessed are the peacemakers*)

Matua – f.9: *“Amuia e fa’atupuina le filemu; e ta’ua i latou o atalii o le Atua.*

O le ata o le *“Hacksaw Ridge,”* o loo fa’ailoa mai ai le mea moni na tupu. O le ata e autū ia Desmond Doss, o se fitafita o le Taua lona Lua a le lalolagi (WWII). Na fa’amanuiaina o ia, e ui ina mafatia i le tele o mea faigata. Sa avea o ia ma foma’i, ae sa tete’e atu i le tauaveina o le fana i le taimi o taua ina ua avea o ia ma tagata fa’atuatua. Na ia lavea’i i fitafita e 75 na manunu’a i le taua i Okinawa. O lea galuega laveai, na fa’apine ai Doss o le ulua’i fitafita i le tala faasolopito o Amerika i le fa’ailoga, *“Honor without firing a shot.”*

O le tagata fa’atupu filemu e lē tutusa ana a’upega ma a’upega a le lalolagi. E tau le Kerisiano i le a’upega o le tatalo ma le fa’alagolago i le mana o le Atua e faato’ilaloina ai so’o se fili i le lalolagi. E tau foi i lalo o le ta’ita’iga a lona Ta’ita’i ’Au Sili, o Keriso lea, e pule aoao i mea uma.

Tatalo: Le Alii e, fesoasoani mai ia avea a’u ma fa’atupu filemu i le lalolagi e pei ona e finagalo ai, **Amene.**

Aso Faraile – Fepuari 8: “O galuega lelei a le Atua” (*God’s good work*)

Tusi Faitau – Neemia 2:12-20

Matua – f.18: *“Ua ou ta’u atu foi ia te i latou i le aao o lo’u Atua sa lelei lava i luga ia te a’u....Ona fa’apea mai lea o i latou, Ina tula’i ia, ina tatou faia ia. Ona latou fa’amalolosi ai lea i lenei galuega lelei.”*

O le ata tifaga, “*Lego Movie*,” e autū i le tama e igoa ia Emmett, o le tufuga fau mea. Sa feteenai Emmett ma le tufuga sili amio leaga sa taumafai e foua le mālō. Ae mulimuli ane, na iloa e Emmett sa ia te ia lava le mana fa’a-tufuga sili, e fa’atoilalo ai le tufaga sili amio leaga.

O Neemia foi o le tufuga, sa galue i le toe fausia o Ierusalemā i le seneturi e lima TLM. E pei o Emmitt, sa ia Neemia le mana fa’a-tufuga e fa’atino ai le galuega sa valaauina ai. E le gata e toe fausia ai le ‘aai o Ierusalemā, a o le mana e foia ai foi faafitauli e tulai mai. E leai lava se isi tufuga sili, ua na o le Atua. Ae fa’asoa mai e le Atua lona mana ia te i tatou – o le mana fa’atufuga – ina ia avea ai foi i tatou ma tufuga e fausia ma fa’ataunuuna galuega lelei uma e pei ona valaauina ai i tatou e fa’atino.

Tatalo: Le Atua e, ia e foa’i mai le iloa ma le malamalama matou te faia ai galuega lelei uma, e ala i lou Suafa, **Amene.**

Aso Toonai – Fepuari 9: “O le Tamā ma le atalii” (*Father and Son*)

Tusi Faitau – Faataoto 19:18-23

Matua – ff.18-19: *“A’oa’i atu i lou atalii, manū o fai sou faamoemoe; a e aua le naunau lou loto ia oti ai o ia. O le tagata ita tele, e faasalaina o ia; aua afai e te lavea’i ia te ia, e te toe faapea foi.”*

O le ata tifaga o le “*Thor*,” e autū i le tamā ma le fa’asalaina o lona atalii. I le amataga o le ata, o Thor o se atalii sa malosi lona mimita ma lona ita, ae na fa’asala e lona tamā o Odin e a’oa’i ai. E tele mea e tutusa ai lenei ata ma le tala a le ‘au faievagelia i le va o Iesu le atalii, ma le Atua le Tamā. Ae tele foi mea e eseese ai. Na a’o’a’i ma fa’asala Thor e lona tamā, ina ia suia lona ita ma lona amio mimita. A o Iesu, na fa’amaulaloina e ia o ia lava. E le i mimita, ae sa agamalu. Na afio mai i le lalolagi ina ia laveai le tagata agasala, ae leai sana agasala na fai.

Ae e tutusa foi Thor ma Iesu, auā na la maua le manumalo ina ua ofoina atu o la soifua, e fa’aolaina ai isi tagata e toatele. O lo la ofoina atu, na fa’amautu ai o la tofi fa’a-Atalii, ma nofoia ai i le itu taumatau o la Tamā.

Tatalo: Fesoasoani mai i lau fanau fa’atuatua, e avea ai o i matou ma au fanau moni. Fa’amalosi mai lou Agaga Paia matou te molimau ai i lou alofa, **Amene.**

Filipi: 1 – Mana’oga o Paulo

(Philippians – 1 Paul’s Longing)

Aso Sa – Fepuari 10: “Galuega fa’aauauina” *(Work in progress)*

Tusi Faitau – Filipi 1:1-12

Matua – f.6: *"Ua 'ou mauiinoa lenei lava mea, o ia na amataina le galuega lelei i totonu ia te outou, e fa'aatoatoaina ai lava e ia e o'o atu lava i le aso o Iesu Keriso."*

O Filipi na tusia e Paulo mai i totonu o le fale puipui. O lona lagona fa'afetai ua mafua ai ona tautala i 'galuega lelei,' e fa'atatau lea i le meaalofa tupe na foa'i mai e Filipi. Ua fa'auigaina e Paulo lenei agalelei o se fa'aailoga ua tuu sa'o mai e le Atua, ma ua avea ai ma fa'amuamua i totonu o lana tusi. O le fa'aauauina ma le fa'alauteleina o lenei fa'atinoga, o le fa'aailoga lea o le tala lelei mai le Atua ua tupu ma ola i loto o tagata.

Afai ua lē maua sou malosi e fa'aauau ai le galuega e pei ona faia e Keriso, ona tatou iloa lea ua avea lenei fuai'upu e fai ma fa'amalosi loto, o loo i le Atua le malosi ma le mana e mafaia ai mea uma.

O lenei vaiaso o le a tatou vaavaai ia Paulo ma lona fa'amalosi mai a o feagai ai ma lu'itau. Sa faigofie ia te ia, auā sa taula'i pea lana va'ai ia Iesu.

Tatalo: Le Atua o le faavavau, ua fa'afiafia pea i matou i lou alofa. Ia matou tumau ai e talia lau fa'aolataga, nei e o'o i le faavavau, **Amene.**

Aso Gafua – Fepuari 11: “Faate’ia pe ofo?” *(Surprise, surprise?)*

Tusi Faitau – Filipi 1:13-18

Matua – f.18: *"O lenei, pe faapefea? E ui lava i faiga uma, pe faataga fai, pe fai ma le faamaoni, ua tala'iina atu ai Keriso, o le mea lea ua ou olioli ai."*

O le i ai o Paulo i le falepuipui, e foliga mai ua tulaga fa'aletonu ai lana galuega. Peita'i, ua lagona e Paulo le olioli, auā ua fa'aaoga lona i ai i totonu o le falepuipui e fai ma avanoa e tala'i ma fa'aailoa atu ai Iesu i isi tagata.

E leoleoina Paulo e se vaega fa'apitoa o fitafita Roma i taimi uma. Masalo o nisi taimi, e talatalanoa Paulo ma fitafita ia Iesu. A fesuia'i le leoleoga, ua fa'aopoopo isi tagata fou e talatalanoa ai ia Iesu. E fa'aletonu le nofoaga, ae va'ai Paulo i le mea lelei e mafai ona tupu mai ai. E le i faate'ia Paulo i lea nofoaga ua i ai nei. Anusa foi, o lona fa'atuatua e pogai mai i le satauro mataga – le faailoga o le faia'ina – ae na i'u i le manumalo ma le fa'aeaina? O faiga ia o le Atua – na te fulifaō mea fa'aletonu o le soifuaga, ina ia tupu mai ai se lelei.

Tatalo: Le Atua o lē fa'amatalaloto, fa'aailoa atili ia i matou lou finagalo. Ia matou iloa le loloto ma le maualuga o lou finagalo e fa'aailoa mai, **Amene.**

Aso Lua – Fepuari 12: “Suiga o le a o’o mai” (*A change is gonna come*)

Tusi Faitau – Filipi 1:19-26

Matua – f.19: *"O lea ou te olioli ai lava, auā ua ou iloa e i'u lea mea i lo'u lavea'iina, ona o la outou fa'atoga, ma le fesoasoani mai o le Agaga o Iesu Keriso."*

O le fa'apuga a Paulo, “auā ua ou iloa e i'u lea mea i lo'u lavea'iina,” o loo fa'ailoa mai ai lona mautinoa, e tupu mai le lelei ma lona tulaga fa'aletonu o loo i ai. E lua mea e fa'avae ai lona mautinoa. Muamua, o le fa'atoga o le 'au uso i Filipi mo ia, auā o le fa'atoga, na te suia ai mea e tutupu i le lalolagi. Lua, o le 'au fa'atasi mai o le mana o le Agaga Paia ia te ia.

E ui ina talia gatā i nei ona aso le ituaiga mautinoa sa atagia ia Paulo, ae telē se a'oa'oga o loo aumai ai, e fa'apea: o le valaauina o le Kerisiano, e lē na o le nofonofo ma fa'amoemoe ia tupu mai se mea lelei. Ae tatau ona fa'atoga i le Atua ma galue ma le loto atoa, e fa'atupu le mea lelei. Afai e manaomia ni suiga fou, e lē maua pe a nofonofo. Ae tatalo i le Atua ina ia maua le malosi ma le loto tele, e galue ai e fa'atino ia suiga.

Tatalo: Le Alii e, foa'i mai i o matou tagata ma le lalolagi se suiga fou e tāua, ia tusa ma lou finagalo, **Amene.**

Aso Lulu – Fepuari 13: “Naunau ia 'ese mai” (*Dare to be different*)

Tusi Faitau – Filipi 1:27-30

Matua – f.27: *"Tau ina ia tusa la outou amio ma le tala lelei ia Keriso, pe afai ou te alu atu ma feiloa'i ma outou, pe ou te nofo 'ese, ia ou iloa pea sina tala ia te outou, ua outou tumau i le agaga e tasi..."*

Fa'amamafa e Paulo le nonofo fa'atasi ma le mafuta faatasi o le 'au uso i Filipi. O lona agaga, ia maua le mafutaga loto fa'atasi. E tāua lea mo ē o loo tūtū mamao ma le ekalesia ma maimoa mai. Auā o Filipi, o le kolone o Roma e tu i le itumalo o Maketonia. O ē o loo nonofo ai sa avea ma tagatānu'u moni o Roma, a o lea ua nonofo mamao 'ese ma Roma. A o tu ma aga sa latou ola ai, e tulaga ese mai ē sa latou nonofo ma 'aumau faatasi i Roma.

E fa'apea foi i le va'aiga i le tulaga ese o le 'au kerisiano i Filipi. O i latou tagatānu'u o le Mālō o le Atua ua valaauina, ae ua aumau ma nonofo fa'atasi ma ē latou te le talitonu ia Iesu. O le mea lea e tāua ai le amio e faaalialia e le 'au Kerisiano, ina ia avea lo tatou amio e fai ma 'auala e liliu mai ai le 'au lē talitonu ia Iesu ma le tala lelei, o loo tūtū mamao ma maimoa mai.

Tatalo: Le Atua e, e sili lava lou atamai i mea uma ua iloa e le tagata. Ia matou iloa ma malamalama ia te oe, ma mulimuli ai, **Amene.**

Aso Tofi – Fepuari 14: “Taga’i i lou aganuu” (*Considering our culture*)

Tusi Faitau – Filipi 2:1-11

Matua – f.5: *“Ia ia te outou foi lenei manatu o ia Keriso Iesu...”*

O le aganuu o tagata Filipi, sa fa'amamafa ai le sailiga o le malosi ma le fa'alagolago o le tagata ia ia te ia lava mo le ola i aso fai soo. O le aganuu sa mitamita ai tagata Filipi, auā sa faavae mai i le tele o le tamāoaiga sa o latou maua i le aveva ai o i latou ma kolone o Roma. Peitai, o le feau a le Aposetolo mo le 'au uso i Filipi, e feteena'i le fa'amamafa a lo latou aganuu, ma le olaga e tatau ona ola ma soifua ai le tagata Kerisiano.

O le a lava le aganuu e ola ai ma ta'u ai le tagata Kerisiano, e tatau lava ia te ia ona fa'amamafa le manatu sa ia Iesu: o le loto maulalo ma le ofoina atu mo isi. O le a foi le aganuu e fai ma fa'asinomaga a le tagata Kerisiano i lenei lalolagi, e tatau lava ona fesili i taimi e fa'atino ai lona aganuu, “Fa'amata o talafeagai lo'u aganuu ma le manatu sa ia Keriso Iesu: *o lē sa uiga fa'atasi ma le Atua...a ua sasa'a atu o ia e ia lava?*”

Tatalo: Le Atua e, fa'ailoa mai tu ma aga e atagia ai o i matou o Kerisiano fa'amaoni, ina ia matou mulimuli e faia lou finagalo tonu, **Amene.**

Aso Faraile – Fepuari 15: “Tula’i i luga, tula’i ese” (*Stepping up, stepping out*)

Tusi Faitau – Filipi 2:12-18

Matua – ff.12b-13: *“... Ia outou galuea’iina pea lo outou fa’aolataga i le mata’u ma le gatete, e le gata ina o tatou nonofo ma outou, a e atili ai pe a ou lē i ai; auā o le Atua, o lo’o galue i totonu ia te outou...”*

O le matua o lenei aso o loo aumaia ai se taula’iga matagofie tatou te manatunatu ai i le fa'aiuga o lenei vaiaso, a o lamalama fa'aiu foi le va'aiga i le vaega muamua lea o le tusi ia Filipi. O le fa'amanatu a le Aposetolo, o le fa'atuatua ia Iesu e le o se mea e nofoa'i ai, ae tatau ona “*galuea’iina.*” E le o le galuea’iina mo le fa'amoemoe e saili ai le faaolaina, e leai, auā o le Kerisiano lava ia, ua uma ona fa'aolaina i ala i lona fa'atuatua ia Iesu. A o le “*galuea’iina,*” o lona uiga ia aveva a tatou galuega e fa'atino, e le gata e fa'ailoa atu ai le tuputele o lo tatou fa'atuatua, ae fa'aali mai ai foi le Atua e fa'amatala loto ia i tatou ta'ito'atasi le uiga o le fa'aolataga lea ua fa'aolaina ai i tatou.

E galuea’iina lava e oe lou fa'atuatua i le mea o loo e ola ma soifua ai. E lē faigofie. E i ai fesili tetele o le a tula'i mai ona o mea e tutupu i le soifuaga, aemaise pe a tutupu fita ma faigata. Ae a galuea’iina lou fa'atuatua ma le mata’u ma le gatete, o iina e te lagona ai le fa'atasi mai o le Atua ia te oe.

Tatalo: Ia fa'aaupagaina i matou i le potu ma le iloa o lau fa'aolataga – o le matagofie lea o le maimoaga i la le fa'atuatua, e i ai le oli'oli, **Amene.**

Aso Toonai – Fepuari 16: “O le a le aogā o uō?” (*What are friends for?*)

Tusi Faitau – Filipi 2:19-30

Matua – f.25: *"A ua ou manatu, e tatau ina auina atu ia te outou o Epaferoti, o lo'u uso lea ma le na ma galulue fa'atasi, ma le na ma matata'u fa'atasi, o la outou 'ave fe'au, ma lē auaua mai i lo'u mativa."*

O le so'oso'o tau'au fa'atasi i le tala lelei, o le isi lea autū o le tusi ia Filipi. O Epaferoti o le auaua mai i le ekalesia i Filipi sa avea ma 'ave fe'au e momolia le meaalofa ia Paulo a o i le falepuipui. Na ma'i tigaina o ia, a o lea ua malosi, ma toe 'auina atu e Paulo e momoli le tusi ia Filipi.

O le fa'atinoga o le galuega a Paulo, e galulue fa'atasi ma le 'au faatuatua e pei o se 'au aiga. O le fa'auauina o lana galuega tala'i, e fa'alagolago i ē o lo'o fesoasoani ia te ia. O le ta'ua o le igoa o Epaferoti i lana tusi, o lo'o fa'aalia ai lona agaga naunau e fia fesoota'i ma so'oso'o tau'au faatasi pea ma le 'au uso i Filipi. E fa'apea foi lo tatou galulue ai i le galuega a le Atua - e mana'omia le feso'ota'iga ma ē ua fesoasoani ma lagolago mai, aemaise lava i taimi o faigata ma puapuaga. O feso'ota'iga ia e tatau ona tausii ma fa'afailele.

Tatalo: Le Atua e, matou te fa'afetai ona o meaalofa ua matou maua e ala i ē ua matou fesootei faatasi ma lo latou fesoasoani mai i soo se ala, **Amene.**

Filipi: 2 – Ia Olioli e le Aunoa

(Philippians: 2 – Rejoice Always)

Aso Sa – Fepuari 17: “O le fa'atāua e sili atu” (*Surpassing value*)

Tusi Faitau – Filipi 3:1-11

Matua – ff.8-9: *"...Ua le aogā mea uma lava ona o le silisili ese o le poto i la Keriso Iesu lo'u Alii; ona o ia ua ou fa'aleaogaina mea uma, ma ou manatu o otaota lava ia mea, ina ia ou maua Keriso, ia maua foi a'u ua ia te ia...."*

Ua sauni Paulo e tautalagia faafitauli o loo feagai ma le Ekalesia i Filipi. A o le tu'ualalo muamua a le Aposetolo mo le 'au Kerisiano: ia outou olioli. O a fa'afitauli e tutupu mai i le galuega, e le fa'agaetia le tagata ua soifua i le olioli, aemaise le olioli e pogai mai ina ua maua *"le silisili ese o le poto i la Keriso Iesu."* O isi mea o le olaga e tausiniō ai le tagata (tamāoaiga, tofiga, pule, poto faale-mafaufau), o otaota e lē aogā. A o le olioli e pogai mai ina ua maua le poto silisili ese e iloa moni ai Keriso, o le fa'atāua lea e sili atu i mea uma. Mo Paulo, 'aua ne'i i ai se mea e toe fa'alavelave ia te ia ma lona naunau e iloa Keriso ma le mana o lona toetu manumalo.

Tatalo: Ua avea le malosi o le Tala Lelei ia Keriso ma malosi e sili atu i so'o se malosi ua ia te a'u. Le Alii e, ia ou tumau i lea malosi e faavavau, **Amene.**

President's Day (Aso Malolo i Amerika)

Aso Gafua – Fepuari 18: “Iloa ma fa’ailoa atu” (*Knowing and being known*)

Tusi Faitau – Filipi 3:12-16

Matua – ff.13-14: *"Ou te lē manatu ua ou maua, a o le mea e tasi ou te faia, ou te faagalologo i mea ua tuana'i, ou te momo'e punoua'i foi i mea o lumana'i, ou te tausisi atu i le fa'ailoga ia maua ai le tau'i na vala'auina ai a'u mai lugā e le Atua ia Keriso Iesu."*

O le olioli ina ua iloa Keriso, o le mea e fa'aaauu pea i aso uma. Fa'aaogā e Paulo le ata o le tagata momo'e e faamatala ai lea faamoemoe. E amata ina ua lafoa'i mea uma lē aogā o le soifuaga (*faagalologo i mea ua tuana'i*). E tauivi i taimi uma ma mea faigata e tula'i mai i le soifuaga (*momo'e punoua'i i mea o lumanai*). A o le faamoemoe: ia maua le tau'i mai le lagi – o le pale o le ola fa'atasi ma Keriso (*tausisi atu i le faailoga*).

O le tala lelei o loo tala'iina e Paulo, e autū ia Keriso ma lona laveaiina o le tagata mai le agasala; Keriso ua valaauina le tagata i le fa'aolataga; a o Keriso foi, e ala i le alofa tunoa o le Atua, na te aumaia le loto tele i le tagata e tatala atu ai lona loto, e talia le meaalofa o le faaolataga ua ia foa'iina fua mai.

Tatalo: Iesu Keriso e, ia fanaufouina lo'u olaga e ala i lou alofa tunoa, ina ia ou ola ai e fa'avavau, fa'avavau lava, **Amene.**

Aso Lua – Fepuari 19: “O le sesē o le fa’amamafa” (*The heresy of apathy*)

Tusi Faitau – Filipi 3:17–4:1

Matua – ff.20-21: *"A o lo tatou nu'u moni o i le lagi lea, o lo'o fa'atalitali mai ai ... le Alii o Iesu Keriso; na te liua o tatou nei tino fa'atauva'a, ia fa'ataatai i lona tino mamalu..."*

Ua fa'ailoa mai e Paulo le eseese o i latou sa soifua i lana fa'aaoga, ma i latou ua fai ma *"fili i le satauro o Keriso."* O i latou ia ua fai ma fili, ua latou fa'aleaogāina le tāua o le satauro. Fa'amamafa e Paulo le mana o le satauro o Keriso. O le satauro na fa'ailoa mai ai le alofa lavea'i ma le alofa ofoina mai o Iesu mo le tagata. Mo Paulo, o le satauro o le tapasā e avea ai le Kerisiano moni ma tagatānu'u o le Mālō o le Atua, e pei ona valaauina ai. O le satauro foi o le fa'aילו o le alofa tunoa e leai ni ona tua'oi, le fa'amagaloga e leai se mea e gata mai ai, ma le alofa ua atoatoa lelei - e leai se mea e tasi e mativa ai. O le satauro lea a Keriso o loo ola ma soifua ai le Aposetolo, a o lea ua fa'atalaaua atu i le 'au uso i Filipi e 'auai mai, latou te ola fa'atasi ai.

Tatalo: Ia avea Lou satauro e fai mo a'u, le Alii e. Ia ou lagona lou mafatia, ma ola ai. Ia ou maua le olioli ma le fiafia, ona o mea sili ua e saunia, **Amene.**

Aso Lulu – Fepuari 20: “Mafuta i le manatu e tasi” (*Sharing one mind*)

Tusi Faitau – Filipi 4:2-3

Matua – f.2: *“Ou te ‘ai’oi atu ia Evotia, ou te ‘ai’oi atu foi ia Sunetui, ia tasi lo la manatu i le Alii.”*

A o naunau Paulo i le ‘au uso i Filipi ina ia ola “*tumau*” i le Alii, sa le tu’ua ai lona alofa moni i le ekalesia, “*o ē ou te alofa ma naunau i ai,*” ua ia ta’ua, “*o lo’u fiafia ma lo’u pale*” (4:1). O lona naunau alofa mo le ekalesia, na apoapoa’i ai ina ia latou fesoasoani ia Evotia ma Sunetui, o nai tinā sa o la galulue fa’atasi ma le Aposetolo i le tala’iina o le tala lelei, a o lea ua feeseesea’i ma felotoa’i. E le o ta’ua pe aisea ua felotoa’i ai. A o le feau a le Aposetolo: ia tasi lo la manatu i le Alii.

E maua le manatu e tasi, pe a ola fa’atasi e fa’atino le valaau ua valaauina ai i latou. ‘Aua nei ‘avea fe’eseeseaiga e fai ma pa pupuni i lo latou mafuta fa’atasi. Ia fa’asili le mafutaga e galulue fa’atasi ai ona o le tala lelei. ‘Aua le fa’asilia mea ua ese’ese ai, a ia fiafia i le mafutaga e fealofani ai ona o le Alii.

Tatalo: Fesoasoani mai ia ou maua le fiafia e mafuta fa’atasi ai ma isi. Ia fa’ateleina ia te a’u le fiafia e fesoasoani i ē mafatia ma puapugatia, **Amene.**

Aso Tofi – Fepuari 21: “Ua latalata mai le Alii” (*The Lord is near*)

Tusi Faitau – Filipi 4:4-7

Matua – ff.6-7: *“Aua nei popole outou i se mea e tasi, a ia faailoa atu o outou mana’o i mea uma lava i le Atua, i le tatalo, ma le fa’atoga, atoa ma le fa’afetai. O le manuia foi mai le Atua, o lo’o silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu.”*

E lua mau tāua o le tala lelei o loo fa’ailoa mai e le Aposetolo i le faitauga o lenei aso: ia ola i le olioli mai le Alii, ma ia fultua mai le popole ma le atuatuvaale. E leai se mea o lenei olaga e tatau ona fefefe ai le tagata Kerisiano. O lona uiga, e leai foi se malosiga o le loto popole ma le atuatuvaale, auā o mea ia e pogai mai i le fefe o le tagata. O le fa’aolataga ua tatou maua e ala ia Iesu, o le mana lea na te laveaiina i tatou i taimi uma e o’o i le faavavau, mai i mea e fa’amata’u mai o lenei olaga. O fa’aילו ia o le Alii ua latalata mai.

I nei ona aso, e tupu le popole ona o se mea o loo mana’omia. A o lea ua fa’ailoa mai e le Aposetolo le a’upega e foia ai le popole, o le *faailoa atu i le Atua o tatou mana’o, i le tatalo, ma le fa’atoga, atoa ma le fa’afetai*. Ia faailoa i le Atua mea uma, auā o loo latalata mai o ia.

Tatalo: Ta’ita’i mai ia te a’u, ia ou fultua i manatu fa’asausili. Fa’apupula la’u va’ai ia ou iloa atili lau Afio, ma ia ou fiafia ai e fa’avavau. **Amene.**

Aso Faraile – Fepuari 22: “O le upu moni i soo se mea”

Tusi Faitau – Filipi 4:8-13

(The truth of wherever)

Matua – f.8: *“...O le toe upu lenei; o mea uma ua moni, o mea uma ua ta’uleleia, o mea uma ua tonu, o mea uma ua mamā, o mea uma ua matagofie, ma mea uma ua logoleleia, afai foi o se isi amio lelei, po o se tasi mea e viia, ia outou manatunatu i ia lava mea.”*

O le ola i le amio e tonu ma le amio e sa’o e pei ona apoapoai atu ai Paulo i le ekalesia i Filipi, e amata ina ua tonu ma sa’o le mea e manatunatu i ai le tagata fa’atuatua. O le manatu i mea lelei, o le amataga lea o le amio lelei e ola ai le tagata Kerisiano.

E galue le Atua mo le lelei o mea uma i taimi uma. O lona uiga, e le na o i totonu o le Ekalesia pe na o le ‘au Kerisiano e maua ai le lelei. Ae maua le lelei i totonu o mea uma, auā o mea uma e galue ai le Atua. O le galuega a le ‘au faatuatua, o le manatunatu i mea uma ia e maua ai le lelei.

Tatalo: Ia tatou ola i le malosi ma le alofa mai ia Keriso. Ia fusia i tatou i lona tamāoaiga i mea lelei uma, **Amene.**

Aso Toonai – Fepuari 23: “Taulaga e sasala lona manogi”

Tusi Faitau – Filipi 4:19-23

(A fragrant offering)

Matua – ff.19-20: *“A o lo’u Atua e fa’aatooa e ia ia te outou mea uma e matitiva ai outou, e tusa ma le faula’i o lona viiga, ia Keriso Iesu. Ia i le Atua lo tatou lava Tamā le vi’iga e fa’avavau fa’avavau lava. Amene.”*

Ua fa’ailo e Paulo le meaalofa tupe sa tau ‘aaoina e le Ekalesia, *“o mea manogi lelei, o le taulaga e talia ma le mālīe i le Atua”* (f.18), auā soo se taulaga e ofo mai mo le Atua, e ofoiina mai ma le loto atoa.

I le fa’aiuga o lana tusi (ff.10-23), ta’utino Paulo, o le to’afilemu lea ua ia ola ai, e pogai mai i lona fa’atuatua i le Alii. Ua iloa ola mativa, ua iloa foi ola mau’oa. O le mafuaaga ua mafai ai ona ola le Aposetolo i le olioli mai le Alii e le aunoa, ona ua *“mafaiā mea uma uma lava ona o ia ua fa’amalosi mai ia te a’u”* (f13). O le ola mautinoa lea o loo naunau ai Paulo mo le ‘au uso i Filipi. O le Atua lea e iloa ma alofa i ai le Aposetelo - le Atua foi lea o loo naunau le ‘au uso i Filipi e fia iloa ma fia auauna i ai, o le Atua lava lea e faimai ai Paulo, *“e fa’aatooa e ia te outou mea uma e matitiva ai outou.”*

E tusa poo le a le tele o mea tatou te matitiva ai, e itiiti pe a fa’atusatusa i le *“faula’i o lona viiga ia Keriso Iesu.”* E fa’aatoatoa e le Atua mea uma tatou te mananao ai; o le uiga moni lea o le “olioli o le Alii.”

Tatalo: Keriso e, o lau afio o lo’u malosi atoatoa lea. Fesoasoani mai i le vaivai o lo’u fa’atuatua, **Amene.**

Salāmo o le Afio A'e (Psalms of Ascent)

1 – Se'i tatou o a'e (Let us Go Up)

Aso Sa – Fepuari 24: “Tatalo mai le loto” (Prayer from the heart)

Tusi Faitau – Salamo 120

Matua – f.1: *"Na 'ou vala'au atu i le Alii i lo'u puapuaga, na ia tali mai foi ia te a'u."*

E masani ona malaga tagata Iutaia i le malumalu i Ierusalemā i taimi o tausamiga fa'amanatu. Talu ai o Ierusalemā o le 'aai e tu i luga o le mauga, e o a'e tagata pe a aga'i i le malumalu. O Salāmo o le Afio A'e, o pese ia e taulagi i le taimi e o a'e ai i le malumalu. E faigofie i le 'au o a'e ona fa'aaogā ia salāmo e fa'aleo ai o latou talotaloga i le Atua, auā e tele lagona eseese ma mea e tutupu i le soifuaga o loo lagi fa'apese mai ai.

O le Salamo 120, o upu a le tagata sulufa'i ua gase i faigā taua. E faigofie ona pu'e i le mafaufau, o upu ia e mai i le fofoga o le tagata sulufa'i, auā e le pese fa'apea se tagata o loo nofo filemu. E le maua ni manatu lelei pe afai e laualuga le loto i lagona o le ita; o le fefe foi e faatupuina ai le fa'amisa. O mea ia sa tutupu i ia ona aso, a o lea foi o loo tutupu i aso nei. O le tele o "Salāmo o le Afio A'e" o loo fa'aleo ai sa'afiafiga o le fia nofo filemu ma le fia nofo saogalemu. Fa'amanuia le Atua i talotaloga o loo lagi e nei Salāmo.

Tatalo: Le Atua alofa e, ta'ita'i mai ia matou maua lou filemu e ala i lou alofa. Ia matou tumau ai e o'o i le fa'avavau, **Amene.**

Aso Gafua – Fepuari 25: “O le u'u fa'amālōlō” (Healing balm)

Tusi Faitau – Salamo 121

Matua – f.1: *"E fa'asaga a'e o'u mata i mauga, e o'o mai ai lo'u fesoasoani."*

O aso anamua sa saili ai le Atua i luga o tumutumu mauga. O luga i le mauga sa fausia ai fata faitaulaga e tapua'i ai i le Atua. O luga i le mauga o Sinai na fa'aali ai le Atua ia Mose ma auina mai ai ana tulafono. O le liua foi o Iesu lea sa molimauina e le 'au soo, na tupu i luga o le mauga. Leitia o la a pese le faisalamo, *"e fa'asaga a'e o'u mata i mauga..."*

E leai so latou leo, a o mauga latou te molimau i le fa'amaoni ma le mausalī o le alofa o lē na faia i latou, ma valaauina i tatou. E le gagana mai, ae latou te aumaia le fa'amautinoa i taimi o faigata. E pei o se u'u fa'aMalolo, a pa'i mai latou te aumaia le faamafanafanaga i loto ua manu'alia i le lē talitonu ma le lē mautinoa ona o fa'aletonu e tutupu i le soifuaga.

Tatalo: Le Atua o lo'o afio i le mea silisili ona maualuga, fa'ailoa mai lou silisili 'ese. 'Aua ne'i o matou to'ilalo i le tiapolo ma ana 'au, **Amene.**

Aso Lua – Fepuari 26: “Tatalo mo le filemu i Ieruselema”

Tusi Faitau – Salamo 122

(Pray for peace in Jerusalem)

Matua – f.8: *"Ona o o'u uso ma a'u 'aumea mamae, ou te fa'apea atu ai lava, 'Ia ia te oe le manuia.'"*

O Ieruselema, o lona uiga i le gagana Eperu, o le 'aai o le filemu'. Ae peitai, i lana tala faasolopito, e leai se taimi na maua ai se filemu i Ieruselema. E tolu tapuaiga eseese o loo avea Ieruselema e fai ma o latou laumua: O le tapuaiga fa'a-Iutaia, o le tapuaiga fa'a-Kerisiano, ma le tapuaiga fa'a-Musalema. I le tala faasolopito, ua tele faiga taua ma soifua ua maumau ona o le vā feitagā'i o tapuaiga ia e tolu, i le sailia poo ai e pule i le 'aai o Ieruselema. E oo mai lava i nei ona aso, o loo tutupu pea vevesiga i totonu o Ieruselema.

O le tatalo mo le filemu i Ieruselema, o le tatalo foi lea mo le filemu i le lalolagi. A mafai e le 'au Iutaia, le 'au Kerisiano, ma le 'au Musalema ona ola fiafia i mea e 'eseese ai ma faia le fa'aleleiga, ona mafai lea ona tula'i mai ma manumalo le tagata i vevesiga ua lauiloa ai lona soifua i lenei lalolagi.

Tatalo: Le Atua mamalu e, foa'i mai lou malamalama i o matou loto faigata, ia matou iloa le filemu o lau Afio matou te tumau ai, **Amene.**

Aso Lulu – Fepuari 27: “Alofa mai” (Have mercy)

Tusi Faitau – Salamo 123

Matua – f.3: *"Ia e alofa mai, le Alii e, alofa mai ia te i matou; aua ua matuā inosia lava i matou."*

Tatou te manaomia le alofa mai o isi, e pei ona manaomia e le tōgā la'au le susulu mai o le La. E leai lava se tasi e atoatoa lelei pe sa'o i taimi uma. E tofu foi le tagata ma mea e sesē ai. O le mea lea e mana'omia ai le alofa mai o isi. O lou silafia ua e mana'omia le alofa mai, e va'ava'a lua lea ma lou silafia o lou fa'atauva'a, ma lou taliaina o tagata o loo mana'omia le alofa atu.

Mo le faisalāmo, e fa'apitoa lava le alofa mai o le Atua o loo ia sailia: o le alofa e mafai ona faafesaga'i ai ma ē inoino mai, o ē mimita i le tamāoagia, ma ē ua manatu o i latou ua sili ma atoatoa. O le inoino e tineia ai le agaalofa; a o le mimita, e sola ai lagona alofa mo isi. O amioga ia e lua, la te fa'alegaina le mamalu o le Atua na faia ai le tagata i lona fa'atusa paia.

Molimau le faisalāmo, o le mamalu o le Atua, o le autū lea o le mamalu o le tagata na ia faia. O lona fa'atusa paia na faia ai le tagata, faatasi ai ma lona alofa mai i le tagata, e mai le vavau e o'o atu i le fa'avavau. O le alofa mai o le Atua, e mafai ona tatou tutū ai, ma ola ai i le malamalama o lona alofa tunoa.

Tatalo: Le Atua alofa e, ia pupula mai lou malamalama e suluia ai lo matou pogisa. Ia fai lea ma pogai matou te susulu atu ai i isi, **Amene.**

Aso Tofi – Fepuari 28: “E ‘au le Atua ma i tatou” (*God is for us*)

Tusi Faitau – Salamo 124

Matua – f.2: “*Ana le se anoa le Alii na ia te i tatou, ina ua laga mai tagata ia te i tatou.*”

E ‘au le Atua ma i tatou. Pe i ai se isi mau e sili atu? O le Salāmo 124 o le pese o le manumālō o loo lagi fa’apese ai e le faisalāmo le olataga na ia maua mai i le Atua, ina ua fa’atoilalolina ona fili ma ana mailei. Peita’i, afai ua ‘au le Atua ma le faisalāmo, faamata e le o se fa’ailoga ea lea o le manatu fa’apito? O tatou tapuai ea i se Atua e faapito lona alofa i na o se vaega o tagata?

E lē fesiligia le ‘au o le Atua ma i tatou. O lona finagalo alofa lea na Ia faia ai le foafoaga. O ana fa’aaliga uma foi, e tulimata’i uma i le taunuuga lea. Peitai, e fa’asesē-gofie lava le tagata i le manatu, o taimi uma e tutusa ai lona mana’o ma le finagalo o le Atua. Ae e i ai taimi e lē faapea ai. A o ina tutupu faigata ma puapuaga o le soifuuga, o taimi ia e lagona ai le lē ‘au faatasi mai o le Atua. Peitai, a tatou toe tepa fa’alelei lava i tua, e i ai lava mea sa tutupu i lo tatou ola o loo mailoga ai tulaga ‘aao o le Atua, ma lana taumafaiga ina ia toe fa’afoi i tatou i le matagofie o le ola ua Ia saunia. Fa’afetai tele le Atua.

Tatalo: Le Atua ofoofogia e, foa’i mai le iloa ma le potō e auauna atu ai mo lau Afio. Ia avea lo matou valea e auala mai ai lou potō silisili ‘ese, **Amene.**

Aso Tatalo o le Lalolagi (World Prayer Day)

Aso Faraile – Mati 1: “**Fa’amanatuina le olioli**” (*Remembering joy*)

Tusi Faitau – Salamo 126

Matua – f.5: “*O ē lulu saito ma loimata, latou te selesele ma le alaga fiafia.*”

O le fa’amanatuina o se mea na tupu, o se ‘aupega e sili ona malosī. Mo tagata sa aafia i fa’anoanoaga ma le ola ua fa’atoilaloina, o le Salamo 126 o loo fa’amanatu mai ai le vaiata sa galue malosī ai le Atua e toe fa’afosisia le manuia i lona nuu. O lenei Salāmo, sa fai ma tauloto i totonu o le tapuaiga, e fa’amanatu ai le mea sa tupu i le tuana’i, ina ia tupu ai le faamoemoe ola e agai atu ai i le lumanai. E manatua le tuana’i, e fa’atonutonu ai le lumanai.

O tapuaiga uma e faia i le Atua, o le manatuaina lea o mea sa tutupu i le tuana’i, e totago a’e ai le faamoemoe mo le lumanai. E manatua ai mea lelei uma sa faia e le Atua mo i tatou. E fa’amanatuina ai le olioli ua tatou maua, ina ua avea i tatou ma fanau o le Atua ua liligi mai ai ana fa’amanuiga. Fa’afetai tele le Atua i lou fa’amanatu mai pea, ina ia ‘aua nei galo ia i matou.

Tatalo: Le Atua e, ia fa’amanatu mai pea lo’u tuana’i ma le fa’amoemoe na e vala’aua ai a’u, **Amene.**

Aso Toonai – Mati 2: “Malupuipua moni” (*True Security*)

Tusi Faitau – Salamo 127

Matua – f.5a: *“Amuia le tagata ua tumu ai lana utu”*

E mai i fea lo tatou malupuipua? A o le a foi le uiga o le malupuipua? O le upu e sau mai i le gagana Latina, o lona uiga, “filemu, faigofie, saoloto mai le popole, poo le malu mai i mea e afaina ai.” I le vaitau o le faisalāmo, o le malupuipua e maua i le malosi fa’a-fitafita, e pei ona pese ai le faisalāmo, *“Amuia le tagata ua tumu ai lana utu.”* I lenei vaitai i le 21 senituri, e manatu ni isi o le tamāoaiga e maua ai le malupuipua. A o atunuu ma faigāmālō, e mautinoa le malupuipua i le tele o mea tau faanukilia.

Fa’amanatu mai le faisalāmo, o le malupuipua moni e maua pe a ō gatasi o tatou manaoga ma o tatou galuega fa’atino, ma le finagalo o le Atua. Auā a o gatasi, ona malupuipua lea o tatou e le Atua, talu ai, o le fa’ataunuuna o lona finagalo e tutusa lea ma o tatou manaoga ma a tatou galuega fa’atino.

Tatalo: Le Atua moni ma le fa’amaoni, fa’aailoa mai ia te a’u le eseesea o le saogalemu moni mai lau Afio, **Amene.**

Salāmo o le Afio A’e (*Psalms of Ascent*)

2 – Ffilemu ma fa’alologo

(*Calm and Quiet*)

Aso Sa – Mati 3: “Malolo ma alofaina” (*Rest and resonance*)

Tusi Faitau – Salamo 131

Matua – f.2a: *“E moni, na ou ffilemu ma ou fa’alologo, fa’apei o le tama ua te’a ma le susu o lona tinā...”*

Sa i ai le manatu, o le Atua e ffilemu ma fa’alologo ai le loto o le tagata. Peitai, e pei ona molimau le faisalāmo, “na ou ffilemu ma ou fa’alologo...” Na amata mai e le faisalāmo, ae le o le Atua. O lona uiga, e mafai ona tatou maua le malologa i le alofa o le Atua, ae tatau ona tatou naunau ma filifili muamua i ai. Fa’aaogā e le faisalāmo le ata o le pepe meamea, ua le toe fa’alogologo i le susu a lona tinā. O le ata lea o le pepe ua fa’asolo ina matua, ae o loo moomia pea ‘aao alofa a ona matua e malolo ai. O i tatou e amata mea ma faia le filifiliga, ona maua ai le malologa filemu i le alofa o le Atua.

E manaomia foi le alofaina – le lagona o le amana’ia ma le tauoloaina e isi, e pei o le lagona a le tamaitiiti ina ua alofaina e ona matua. O le mealofa lea mai i le Atua, e mafai foi ona tatou foaiina atu i isi.

Tatalo: Le Atua e, valaau mai ia te a’u ina ia ou iloa ona tatala le faitotoa o lou maota mo isi o lo’o manaomia lau fesoasoani, **Amene.**

Aso Gafua – Mati 4: “O le afioaga o le Atua” *(The dwelling place of God)*

Tusi Faitau – Salamo 132

Matua – ff.4-5: “.. ou te le mafai ona moe o’u mata, pe matamoe o’u laumata, seia ou ou maua se mea e afio ai le Alii, o le afioga mo lē Malosi o Iakopo.”

Ua toe o se aga ona taunuu lea o le afio a’e i le malumalu. Ua iloa mamao atu foi e le faisalāmo le afioaga o le Atua. E ui i lona matagofie, a o le tāua o le malumalu, e le gata o le fa’ailoga va’aia o le ‘au faatasi mai o le Atua i ona tagata, a o le taunuuga o le folafolaga a le Atua ia Tavita, e nofoia e lona suli le nofoalii i Ieruselema pe a fa’amaoni i lana feagaiga. Peitai, ua le toe i ai se malumalu i le taimi nei, ma ua galo atu lona matagofie sa i ai.

A o le va’aiga fa’a-Kerisiano i le mea e afio ai le Atua, faimai e afio i le mea e sili ona vaivai ma fa’atauvaa i le foafoaga atoa: o le tino o le tagata. E afio le Atua i le mea e taula’i ai le fa’ale-Atua ma le fa’ale-tagata – i totonu o le tino. E moni ai la le mau tauave o le ‘au Kerisiano: o le Atua liutino tagata e ala ia Iesu Keriso.

Tatalo: Le Atua e, ia fai lo’u loto ma ou nofoaga mau, ia matou fesoota’i ai ma isi ma matou auauna fa’atasi atu ai i lau Afio, **Amene.**

Aso Lua – Mati 5: “O le manuia o le nonofo faatasi” *(The Blessing of unity)*

Tusi Faitau – Salamo 133-134

Matua – Salamo 133:1 “Faauta o le mea e matuā lelei ma le matagofie lava, pe a nonofo faatasi lava o uso.”

Ua taunuu le afio a’e ma ua tuvae nei i le malumalu. A o le taunuuga foi lea o le nonofo fa’atasi ua leva ona momo’o i ai i totonu o aiga aemaise ai le lalolagi. Mo le faisalāmo, o le Atua o le autū, o le pogai, ma lē na te amata mea ma faatupuina le nonofo faatasi, auā o lona finagalo lava lea mo le tagata.

O le nonofo faatasi e pua’ina ai le ola, ua fa’atusaina i le sau i Heremoni e tōtō ifo. O le nonofo fa’atasi foi e tafe mai ai fa’amanuiaga a le Atua, e pei o le suau’u e tafe ifo i le ava o Arona.

O le nonofo fa’atasi e le o se mea e mafai ona fa’amalosia i luga o tagata. Ae ua na o le alofa e matala ai le faitoto’a. O lou alofa i lou uso ma lou fa’asoa fa’atasi i mea lelei e manuia ai le lautele, o iina e maua ai le nonofo fa’atasi. E ui lava e tele mea tatou te eseese ai, ae ia tatou tūtū fa’atasi i le alofa ma le ola fetausia’i. O le agaga moni lea o le faisalāmo i ana upu, “*Se mea a matagofie o uso ae nonofo fa’atasi.*”

Tatalo: Le Atua e, a’oa’o mai ia te i matou, ina ia matou tūtū faatasi o le aiga e tasi i le alofa ma le loto maualo, **Amene.**

Soifuaga i le Tōafa fa'anei ona po (*Life in the modern desert*)
1 – O le ala i le tōafa: Luka 3-4 (*The way to the desert: Luke 3-4*)

Aso Lulu Lefulefu (Amataga o le Vaitau o le Leni)

Aso Lulu – Mati 6: “O le leo i le vao” (*A voice in the wilderness*)

Tusi Faitau – Luka 3:1-14

Matua – f.4b: “*O le leo o lē ua alaga i le vao, Ina teuteu ia outou le ala o le Alii, ia fa’alaualelei ona ala.*”

I lenei vaitau o le Leni, se’i o tatou amata i lē e autū ai le Leni: o Iesu lea. A o le i amata lana galuega, na muamua tu’umuli Iesu i le tōafa, na papatiso ai e Ioane, ma tauivi ai ma ona fa’aosoosoga. O le afio mai o le Atua i ona tagata, na muamua tala’i i le tōafa e ala ia Isaraelu. O Iesu foi, na fa’aiua lana galuega i le tōafa – le faatusa o le maliu ma le tu’ulafoaiina i luga o le satauro.

E leai ni mea fa’atosina i le tōafa. E leai foi se mea e mafai ona sola ai. I nei ona aso, masalo e leai se tasi na te fia tu’ua lona olaga ua masani ai ae tu’umuli e nofo i se tōafa. Peita’i, e mafai ona avea le tōafa ma tapenaga lelei e saunia ai le tagata mo le afio mai o le Alii. O auala e fa’aaogā ai e le Atua le tōafa, fa’atasi ai ma auala e fa’aaogā ai e le tagata lona poto masani e ola ai i totonu o le tōafa, o autū ia o lenei vaitau o le Leni.

Tatalo: Le Atua e, ta’ita’i a’u i le tōafa ou te fa’alogo ai ma le manino i lou si’ufofoga, ina ia ou taunuu ai i le nu’u o le folafolaga i le Eseta, **Amene.**

Aso Tofi – Mati 7: “O oe o lo’u atalii” (*You are my son*)

Tusi Faitau – Luka 3:15-22

Matua – f.21: “*Ua papatisoina le nu’u uma, ona papatisoina ai lea o Iesu, ua tatalo o ia, ona fa’aavanoaina ai lea o le lagi,*”

O le tala ia Iesu, e i ai mea e tutupu fa’afuasei. Mo tagata maimoa, o Iesu ua na o se tagata mai i totonu o le li’o o le motu o tagata, o loo aga’i atu e papatiso e Ioane. E ese le mau a Mataio (3:14-15) mai le mau a Luka. A o le va’aiga muamua lava o Iesu i lona feagai ai ma le tōafa, na fa’amautūina ai e le Agaga Paia lona ta’u: o ia o le Alo pele e toatasi o le Atua.

E ui i le gaoā ma le tulaga mamao o le tōafa mai i le tele o taulaga ma ‘aai matagofie, a o le tōafa o le nofoaga lea na tapena ai Iesu mo lana galuega fa’aola, ma na fa’alogoina ai upu faamalosi ‘au a lona Tamā mai le lagi. O a ni upu fa’amalosi ‘au o e saili i le Atua i lenei vaitau o le Leni, a o e malaga ai i le tōafa?

Tatalo: Le Atua e, a’oa’o mai ina ia matou iloa ona alofa atu i lau afio fa’atasi ai ma isi tagata, **Amene.**

Aso Faraile – Mati 8: “O le Atua moni ma le tagata moni”

Tusi Faitau – Luka 3:23-38 (Truly God and truly human)

Matua – f.38: “O le atalii ia o Enosa, o le atalii ia o Setu, o le atalii ia o Atamu, o le atalii ia o le Atua.”

O le tala i le gafa o Iesu, o loo fa’ailoa ai ma fa’amautū mai ai e Luka le tulaga moni o Iesu, o ia o le tagata. E ese le gafa o loo aumaia e Luka nai lo le gafa o loo molimauina e Mataiao. O Luka e leai ni fafine o ta’ua ai, ua na o tamaloloa. O Luka foi, e mamao atu lona alu i tua nai lo Mataiao. O Mataiao e amata ia Aperaamo, a o Luka e tau i tua ia Atamu. O lenei faiga e manino ai le feau o loo taumafai Luka e fa’ailoa mai “o Iesu o le atalii o Atamu, o le atalii ia o le Atua.”

O le uiga o le igoa Atamu, o le ‘tagata ola’. O le mau la o loo taumafai Luke e fa’apupula mai i le gafa o Iesu: o Iesu o le atalii, o le ata o tagata ola uma - o le tagata moni foi. A o Iesu foi o le atalii, o le fa’atusa o le Atua - o le Atua moni foi. O le tala la a Luka, e le gata o le tala e fa’ataatai i le tagata moni o Iesu, a o le tala foi e fa’ataatai i le Atua o loo galue mai. O le fa’aolataga lava e pei ona manatu Luka, ua amata mai i le tōafa.

Tatalo: Le Alii e, fa’ailoa manino mai ia te a’u le loloto o lou itu Atua ma lou itu tagata, **Amene.**

Aso Toonai – Mati 9: “I totonu o le tōafa” (In the desert)

Tusi Faitau – Luka 4:1-13

Matua – f.1: “Ua foi a’e Iesu mai Ioritana, ua tumu o ia i le Agaga Paia, ona taitaiina lea o ia e le Agaga i le mea tuufua,”

Ana leai le lauga a Iesu sa faia i le malumalu a o 12 ona tausaga, se manū Iesu ma lona olaga tuputupu a’e, e pei lava o isi tamaititi. O le papatisoga na fa’amautū mai ai e le Atua le mau: o Iesu o lona atalii. A o le Agaga Paia, na fa’ama’itea Iesu i le isi la’asaga o lona tuputupu a’e: o le mapu ane i se mea tu’ufua e tatalo ai, ma fa’atalitali i le fa’asinoga a le Atua. O iina na ta’ita’iina ai Iesu i le tōafa, ma o lona manumalo i ona puapuaga a o i ai i le tōafa, e mautinoa ai e le i tu’ulafoiina o ia e le Agaga.

O le olaga i totonu o le tōafa, e i ai taimi o le a tatou fesiligia ai le i ai o le Atua ma lana tausiga mo i tatou. Peita’i, e le mavae le alofa o le Atua ma i tatou. E moni, e ta’ita’iina i tatou e le Atua i le tōafa, e pei ona faia ia Iesu. A o le faamoemoe maualuga ua ala ai ona faia e le Atua, ina ia tatou iloa ai ona fa’alagolago ia te ia i taimi e o’o mai ai faigata ma puapuaga o le tōafa.

Tatalo: Le Atua e, ta’ita’i a’u i le tōafa e tofotofoina ai a’u ma ou manumalo ai, e fa’amautūina ai lo’u faatuatua ma lo’u fa’alagolago i lau afio, **Amene.**

Soifuaga i le Tōafa fa'anei ona po (*Life in the modern desert*)

2 – Fa'atalitali (*Waiting*)

Aso Sa – Mati 10: “Fa'atalitali i le taimi o le Atua”

Tusi Faitau – Salamo 27:1–14 (*Waiting for God's moment*)

Matua – f.14: “*Inā fa'atalitali atu ia i le ALII, inā loto tele ia, e fa'amalosia foi e ia lou loto; inā fa'atalitali lava ia i le Alii.*”

O le tōafa o se nofoaga e sili ona tāua mo Isaraelu. Sa latou osifeagaiga ma le Atua i le tōafa. Na latou ui foi i le tōafa e aga'i ai i le nuu folafolaina. I le tele o faigata na feagai ma Isaraelu a o i ai i le tōafa, pau a le mea sa mafai ona latou faia o le fa'atalitali, po o le a le taimi e taunuu ai i le nuu folafolaina.

I nei ona aso, e fa'ale-fiafia tele tagata i le ola faatalitali. A lutia i tatou i tōafa o puapuaga ma faigata, e leai se isi e fia fa'atalitali ma nofonofo, ae naunau loa e gaoioi ma galue. O le upu Eleni, '*kairos*,' o lona uiga, 'o le taimi tonu,' po o le 'taimi tatau'. O le taimi lea o loo pese ai le Salamo 27 e tatau ona tatou fa'atalitali ai: o taimi o le Atua – o le taimi e fa'aali mai ai le Atua, e galue mai ai, e ta'ita'i mai ai, ma fa'aola mai ai. E galue mai le Atua i lona lava taimi, a o le tagata, o lana matāfaioi o le fa'atalitali.

Tatalo : Le Atua e, a'oa'o mai ina ia ou iloa ona ou fa'atali mo oe, ina ia ou iloa ona onosa'i i lou valaau mai, **Amene.**

Aso Gafua – Mati 11: “Aveina a'e nai le lua” (*Pulled from the pit*)

Tusi Faitau – Salamo 40:1–18

Matua – ff.1-2b: “*Na ou matuā faatalitali lava i le ALII; ona faasaga mai ai lea o ia ia te au, ua faafofoga mai foi o ia i la'u alaga...*”

E o faatasi le fa'atalitali ma le onosa'i. O le tagata fa'atalitali, e lava lona onosa'i. A o le tagata onosa'i foi, na te lavātia le fa'atalitali. O le “*matuā faatalitali lava i le Alii*” lea e pese ai le faisalāmo, o le ata lea o le tagata e fa'atalitali ma le onosa'i. O le onosa'i e aofia ai le talitonu ma le faamoemoe. E tupu le onosa'i pe afai ua talitonu le tagata i le matagofie o le tau i loo fa'amoemoe i ai. Ae afai e lē talitonuina le tau, ona sola lea o le onosai, ae ofi mai ai lagona o le musuā ma le lē mautonu.

O le onosa'i moni, e tusa lava pe leai ni mea e fa'amaonia ai le tau i loo faamoemoe i ai, ae talitonu pea. E mautinoa le tau pe a galue mai le Atua, ae galue mai le Atua i ona lava taimi. O taimi ia e tatau ona tatou onosa'i ai. E fa'aolaina e le Atua le tagata e onosa'i ma fa'atalitali ia te ia; ma aveina a'e nai le lua o le musuā ma le lē mautonu.

Tatalo : Le Atua e, a'oa'o mai ia ou onosa'i a o ou tapena mo le Leni, **Amene.**

Aso Lua – Mati 12: “Lalaga fa’atasi i le tatalo” (*Woven in prayer*)

Tusi Faitau – Auega 3:25-33

Matua – ff.25-26: “*O loo agalelei le Alii i ē fa’atalitali ia te ia, o le tagata e saili ia te ia. E lelei ona fa’amoemoe ma le fa’alologo i le olataga mai le Alii.*”

E leai se isi o tatou e fia nofo i se tōafa. Ae afai foi e nofoia, tatou te taumafai lava e tete’e i ai. I le vaitau o le 4 ma le 5 senituri TA, sa i ai tagata Kerisiano sa nonofo fa’a-monike i tōafa o Aikupito; sa ta’ua i latou, o “Tamā o le Tōafa.” O ia tagata Kerisiano sa masani tele i faigata, o faaosoosoga, faapea lagona o le lē mautonu e masani ai le ola i totonu o le tōafa. O le fautuaga a Tamā ia i nai Kerisiano sa fou mai i le tōafa, “Nofo oe i la oe pa’usisi, ona a’oa’o mai lea o lou pa’usisi ia te oe i mea uma e tatau ona e silafia.” O lona uiga, “Fa’atalitali ma le onosa’i, i le olataga mai le Atua” (f.26).

E lē tatau ona tatou tete’e ma taumafai e sola ‘ese mai le tōafa o loo tatou nonofo ai. E lē tatau foi ona tatou muimuia le Atua ma le manatu, e sili atu se taumafaiiga tatou te faia i totonu o le tōafa, nai lo Ia. Pau le mea, o le faatalitali ma le onosa’i i le Atua, na te ta’ita’iina i tatou. Saili i le Atua ma lona finagalo e ala i le tatalo, ona agalelei mai lea o ia, a o tatou aumau ai i totonu o le tōafa.

Tatalo: Le Atua e, sei e a’oa’o mai ia ou iloa ona filemu ma fa’alologo ma le manino i lou fetalai mai, **Amene.**

Aso Lulu – Mati 13: “Fa’atalitali ma fa’amoemoe” (*Waiting and hoping*)

Tusi Faitau – Salamo 130:1-8

Matua – f.5: “*Ou te fa’atali atu i le Alii, o loo fa’atali atu lava lo’u agaga; ou te fa’amoemoe foi i lana afioga.*”

Pau le auala e mafai ona tatou saofia ai le tōafa, pe afai e ia i tatou le fa’amoemoe. E fatu mai le pese a le faisalāmo, ‘ai mea loloto’ (f.1), ae e i ai pea lona faamoemoe – na te fa’atalitali ai i le Atua, “*e sili i ē o leoleo ona fa’atalitali i le taeao...*” (f.6). O le tatou faitauga i lenei aso, o loo fa’amanatu mai ai amioga e tatau ona ola ai le tagata Kerisiano: faatuatua, talitonu, onosai, ma le faamoemoe. Ia faatalitali ma le onosa’i i mea ua faamoemoe i ai. Ia talitonu ma le faatuatua o le a o’o mai, auā ua uma ona folafolaina e le Atua.

E faigata tele ona maua le fa’amoemoe i totonu o le tōafa fa’anei ona po. Peita’i, o taimi e luluti mai ai fita ma faigata o le tōafa, o taimi tonu ia e tatau ona tatou fa’amoemoe ai i le Atua na te galue mai. Fa’amata e mafai ona tatou talia lenei lu’itau lē faigofie? E mafai ea ona tatou ola i le fa’amoemoe, a o tatou i ai i totonu o le tōafa?

Tatalo: Le Atua e, o lo’u fa’amoemoe ua i lau Upu lea, ma Iesu o lo’u fa’aola, ou te talitonu ma fa’atuatua i ai, **Amene.**

Aso Tofi – Mati 14: “Fa’auau le leoleoga” (*Keeping watch*)

Tusi Faitau – Sapakuka 2:1-4

Matua –ff.1a, 3b: “*Ou te tū i le mea ou te leoleo ai, ou te tu foi a’u i le ‘olo, e ui lava ina tuai mai, a ia faatalitali pea i ai; auā e o’o mai lava e le faatuai mai.*”

O ananafi sa fa’atusa ai e le faisalāmo lona faamoemoe i le Atua, i le tagata leoleo pō o loo fa’atalitali ma le onosa’i i le o’o mai o le taeao. I lenei aso, o loo fa’ailoa mai e le perofeta o Sapakuka, o ia o le tagata leoleo pō lea – e tu i le ‘olo ma va’aiva’ ai mamao atu, ma fa’atalitali mo se laveaiina o le a o’o mai mo ia ma ona tagata. Fetalai le Atua i le perofeta, e o’o mai taimi āmulī, o le taimi lea o le Atua e laveaiina ai Isarael ma fa’asagatau ai i ona fili.

O le taimi tatou te i ai i totonu o le tōafa, e foliga mai o se taimi umi lava. O mea uma ua tatou iloa ma talitonu ai i le Atua, e galo uma i totonu o le tōafa. Pau le mea e mafai ona tatou faia o le nofo fa’atalitali, ma teufatu, e i ai pea le Atua ma i tatou i taimi e pogisa ai. Tatou fa’amoemoe pea i le Atua, e ui na feteena’i lena fa’amoemoe ma mea o loo tutupu i le soifuaga.

Tatalo : Le Alii e, o lo’u agaga o loo i lau afio, ou te talitonu o loo e fa’atasi ma a’u i lenei olaga pogisa, **Amene.**

Aso Faraile – Mati 15: “O le fa’amaoni o le Atua” (*God’s faith*)

Tusi Faitau – Salamo 69:1-15

Matua – f.3b: “*Ua mole lava o’u mata, a o fa’atalitali atu a’u i lo’u Atua.*”

O le musuā ma le lē lavā i taimi o faigata, o taimi ia e iloa ai o loo tatou ola i le tōafa, e pei ua tu’ulafaoiina i tatou e le Atua. Fa’amatala e le faisalāmo le loloto o vaitafe ma tafega ua malemo ai, a o tauivi mo se laveaiina. Sa tauivi ma fa’atalitali le faisalāmo i se taimi umi lava mo se lavea’i, e pei ona atagia i ana upu, “*ua mole lava o’u mata.*” O le ata lea o le tagata ua pulapula lagoto lona soifua, a o tauivi pea ma faigata ma fa’atalitali pea i le Atua.

E lilo i le va’ai o tagata le tauiviga e feagai ma i tatou i totonu o le tōafa. E le o iloa mai mea ia o loo tauivi ma i tatou. Peitai, e i ai mea e tutupu i le soifuaga e maitau mai ai e tagata, e le o solosolo lelei la tatou tauiviga. O auata tatou te feagai ai ma faigata o le tōafa, e fa’atupulaia, pe tu’uta’ia ai foi, le fa’atuatua o tagata o loo maitau mai. Peita’i, e lē faapea o le a tatou mata ataata pea i taimi uma e natia ai faigata o loo tauivi ma i tatou. E manatua ai upu a le Aposetolo, “*A ua fa’amaoni le Atua, o lē na te lē tu’uina atu outou i le fa’aoosoga e sili i se mea ua outou lavātia, a e sauni foi fa’atasi ma le fa’aoosoga se mea e sao ai ina ia outou lavā o’ono.*” (1Kori10:13).

Tatalo: Le Atua e, e i ai taimi e lagona ai le vaivai, ae ou te mautinoa, e te tu’u mai tofotofaga e talafeagai ma lo’u faatuatua, **Amene.**

Aso Toonai – Mati 16: “Malaga Fa’ale-Agaga” (*Spirit journey*)

Tusi Faitau – Isaia 30:15-18

Matua – ff.15, 18: “*O le lilii mai ma le filemu e fa’aolaina ai outou, o le filemu ma le fa’atuatua o lo outou malosi lea; a ua outou lē mafafai. Ae ui lava i lea, e fa’atalitali le Alii ina ia alofa fua mai ia te outou;*”

E mafai ona vaevaeina le tōafa i ni itu se lua: o le itu pogisa, ma le itu fa’anunumi. O le itu pogisa, e iloa ai le tōafa, o le nofoaga o le tu’ulafoaiina. O le nofoaga e lē iloa atu ai se tasi, aemaise ai le Atua. Pau le mea e mafai ona faia e le tagata, o le nofo filemu ma fa’atalitali – e pei o upu o le matua o lenei aso, “*ia lilii mai ma le filemu i le Atua e faaolaina ai.*” O le itu fa’anunumi, e iloa ai le tōafa, o le nofoaga e tete’e i mea uma. E fa’anunumi ai lagona ma manatu; e le saga tonu ai foi le mafaufau i le mea sa’o e tatau ona fai.

Peita’i, e fa’atalitali pea le Atua ma le onosa’i, seia mavae le pogisa ma le fa’anunumi o loo aafia ai le tagata i totonu o le tōafa. Pei o Isaraelu i le vaitau o Isaia, ua fa’apogisa ma fa’anunumi le nu’u i le manatu, latou te manumalo i le fesoasoani mai o nu’u tuaoi. Na fa’atalitali lava le Atua seia toilalo Isaraelu, ona fa’aali lea o lona finagalo ia te i latou. A tatou iloa ona fa’atalitali ma le filemu i totonu o le tōafa, e fa’atalitali foi le Atua fa’atasi ma i tatou.

Tatalo: Le Alii e, fa’amagalo a’u, ona o lo’u malomaloā ma lo’u lē fa’alogologo i lau afioga o loo e fa’atalitali e fetalai mai ai, **Amene.**

Soifuaga i le Tōafa fa’anei ona po (*Life in the modern desert*)

3 – Filemu (*Stillness*)

Aso Sa – Mati 17: “O le taimi mo mea uma” (*A time for everything*)

Tusi Faitau – Failauga 3:1-8

Matua – ff.1, 7: “*O le mea ma lona tausaga i mea uma, ma ona lava po i mea uma lava i lalo o le lagi; o ona po e faalologo ai, ma ona po e tautala ai.*”

E i ai le taimi mo mea uma. E i ai le taimi e savali ai, e i ai foi le taimi e malolo ai. E i ai le taimi e tautala ai, e i ai foi le taimi e fa’alogo ai. O le faitauga o lenei Aso Sa, loo a’oa’o mai ai le Failauga, o totonu o le tōafa, o taimi ia e tatau ai ona tatou filemu ai. E pei o taimi e taugalemu ai le soifuaga, o taimi ia o le fiafia ma le olioli. A o taimi e soloa’i ma luluti mai ai faigata o le soifuaga – le faailoga o le tōafa – o taimi ia e tatau ona tatou nonofo filemu ai ma fa’alogologo lelei mo le fetalai mai o le Atua. A o tatou faalogologo i lenei aso, o le a se mea o fetalai mai ai le Atua ia te oe i lenei taimi filemu ma le paganoa?

Tatalo: Le Alii e, se a se mea e te finagalo ai ou te faia mo oe i lenei aso?

Aso Gafua – Mati 18: “Filifili mea e fa’alogo i ai” (*Selective hearing*)

Tusi Faitau – Esekielu 3:22-27

Matua – ff.26-27a: “*Ou te fa’apipii ae lou laulaufaiva i lou gutu, ina ia gūgū ai oe...auā o le aiga fouvale i latou. A ou fai atu ia te oe, ona faagaganaina lea o oe, e te fai atu foi ia te i latou, O loo faapea ona fai mai o le Alii le ATUA.*”

Na a’oa’o le Atua ia Esekielu i le nofo filemu, ina ia mafai ona fa’alogo ai i upu o loo fetalai mai ai le Atua. E le gata i lea, ae na saisai foi e le Atua le perofeta, ina ia manino lana faalogo i upu sa finagalo le Atua na te faalogo i ai. Pau lea o le faiga e mafai ona fa’atuatua ai le perofeta, o ia o le fofoga o le Atua. Fa’afetai ua lē toe fa’apea le Atua i nei ona aso i ana auauna valaauina. Peitai, e manino lava le feau o loo aumaia e le perofeta: e tatau ona manino la tatou fa’alogo i le fetalai mai o le Atua, ina ia avea i tatou ma ave feau lelei.

O tagata i nei ona aso, e popoto e tautala ae valelea e fa’alogo. Pe fa’alogo foi, ae le manatua mea sa fa’alogo i ai. A leai foi, e faalogo, ae fa’apito mea e fa’alogo i ai. Ina ia fa’alogo ma le manino i le fetalai mai o le Atua, e tatau ona tatou iloa ona nonofo filemu fa’atasi ma le Atua, ma fa’alogologo lelei i lona fetalai mai. O a ni mea o e fa’alogo ina i lou tōafa i lenei aso?

Tatalo: Le Atua e, aumai ia te a’u le malosi e mafai ona ou fa’alogo ai ma le manino i isi, ma tatalo ai mo i latou, **Amene.**

Aso Lua – Mati 19: “Filemu ma iloa” (*Be still and know*)

Tusi Faitau – Salamo 46:1-11

Matua – ff.10-11: “*Ina soia, ma ia outou iloa o a’u lava o le Atua... e viia au i le lalolagi. Ua ia te i tatou le Alii o ‘au...o lo tatou ‘olo maua luga.*”

I le amataga o lenei Salāmo, o loo aumaia ai le ata o le vevesi ma le tau fa’amata’u: “*luluina mauga i totonu o le sami; taalili ma sousou suāsami; ua faagateteina mauga.*” E fa’apea le olaga i le tele o taimi. O taimi e maluu ai sē ua pele; o taimi e tupu ai se faalavelave fa’afuasei – o taimi ia e peiseai ua, “*luluina mauga i totonu o le sami..*” Peitai, e alu a’i le pese a le faisalāmo, ua suia le ata o le vevesi ma le tau fa’amata’u, i le ata o le filemu ma le to’amalie. E fa’apea foi le olaga i isi taimi. I tua atu o le vevesi ma le tau fa’amata’u, e maua ai le filemu ma le to’amalie. Mo le tagata fa’atuatua, na te silafia o taimi o le vevesi ma le fa’amata’u, o taimi ia e lē tuulafoai ai e le Atua lana fanau.

A o e feagai ai ma le tōafa i lenei aso, o fea o i ai le vevesi ma le tau fa’amata’u? O fea foi o i ai le filemu ma le to’amalie? O le Salamo 46, o le lu’itau lea mo i tatou e saili ai le Atua i totonu o mea uma e lua.

Tatalo: I lenei aso i le feagai ai ma lu’itau e le i fuafuaina, tatalo i le Atua ina ia fesoasoani mai, ma ia fa’atuatua i lona alofa e le mavae, **Amene.**

Aso Lulu – Mati 20: “Sulufa’iga ma le tagata sulufa’i” (*Refuge and refugee*)

Tusi Faitau – Salamo 62:1-8

Matua – ff.6, 8: *“E moni lava, o ia lo’u papa, ma lo’u faaolataga, o lo’u ‘olo maualuga; e le faagaeina a’u. Le nuu e, ia outou faatuatua ia te ia i aso uma; ia outou momoli atu o outou loto i ona luma; o lo tatou malu o le Atua lea.”*

O le tusi o Salāmo e pei o se teuga ata (photo album), e mafai ona maimoa ai i tulaga uma o le olaga e feagai ma le tagata fa’atuatua. I lea teuga ata, tatou te lē maua ai ata o ni tagata e ‘aulelei i le va’ai ma ni tagata ua atoatoa lelei lo latou ola fa’atuatua, a o ata o tagata tauivi ma tagata loto tetele. E maua foi i lea teuga ata, o fa’atusa moni o le lavelave ma le faigata o le olaga, o loo ola ma soifua ai le tagata fa’atuatua i le taimi nei.

O le Salamo 62, o loo tauivi le faisalāmo ma se tasi o fa’afitauli e feagai foi ma i tatou i le tele o taimi – o tagata ua fai ma fili o loo tau fa’amata’u mai. E tulaga ese le fa’atinoga sa faia e le faisalāmo e foia ai lea faafitauli – ua sulufa’i i se nofoaga filemu, e faafouina ai lona malosi e le Atua. O le feau a le faisalāmo: o le Atua, o ia o lo tatou sulufa’iga moni. A tatou sulufa’i i le Atua i taimi e lamatia ai lo tatou ola, ona tau lea o le Atua mo i tatou.

Tatalo: Le Tamā e, aumai le fa’ataitaiga sili ina ia ou atoatoa e pei o lau afio. Ia ou mulimuli i ou ala ae le o ala o le lalolagi, **Amene.**

Aso Tofi – Mati 21: “Nofoaga e fa’alagolago filemu ai” (*A place of quiet trust*)

Tusi Faitau – Salamo 39:1-9

Matua – ff.1, 9: *“Na ou fa’apea, ou te fa’aeteete i o’u ala, ina ne’i ou agasala i lo’u laulaufaiva; ou te faaeteete i lo’u gutu....Ou te faalologo lava a’u, ou te le gagana; auā o oe na e faia.”*

O ananafi na sulufa’i ai le faisalāmo i le Atua, e fo’ia ai le fili sa fa’amata’u mai. A o lenei aso, ua ali a’e mai se tulaga ua sili ona loloto ma faigata: ua osofa’ia le faisalāmo e le fili! Peitai, e le o se fili mai i fafo, a o le fili mai lava i totonu. O le fili e pogai mai i le olaga sa ola ai le faisalāmo; o ana agasala; fa’atasi ai ma le masani o le olaga e toso lava le pito fala a le tagata ia e aunoa ma se va’ai alofa i isi – o mea ia sa faaeteete ai le faisalāmo. O le a lona naunau e finau atu ma tali atu i mea sa tuua’i ai, ae peiseai ua atili ona fa’ateteleina ai le fa’afitauli. Ona o lea, ua manatu ai le faisalāmo i se isi gaioiga e ese mai: e le toe finau pe tali atu, ae o le a nofo filemu. E le faigofie. Tatou te naunau uma lava e finau i le mea sa’o. Peitai, mo le faisalāmo, ua na filifilia le ala o le nofo filemu, ma fa’alagolago i le alofa laveai o le Atua.

Tatalo: Le Alii e, se’i e tōtō le loto ta’utino ia te a’u e ta’uta’u ai a’u agasala, ma fa’aioa atu ai mea lilo o i lo’u loto, **Amene.**

Aso Faraile – Mati 22: “O le ala i le malologa lelei” (*On sleeping well*)

Tusi Faitau – Salamo 4:1–8

Matua – ff.4, 8: *“Ia outou tetemu, aua nei agasala; ia outou manatunatu ifo i o outou loto i luga i o outou moega, ma ia outou fifilemu. Ou te taoto, ma ou moe filemu; auā o oe le Alii e, na o oe lava, ua ou nofo ai ma le filemu.”*

O maua ea sau malologa lelei i le po? Pe e te moe ta'avalevale ma moe fiti? E tele mafuaaga e lē maua ai e le tagata se moe lelei i le po. O le to'atele, e mafua ona o le tele o mea o loo mamafa ma popole ai le mafaufau. O le Salamo e 4, e le o ta'ua se mafuaaga ua ala ona le maua se malologa lelei a le faisalāmo. A o lana tali, o le valaau atu i le Atua mo se fesoasoani i mea uma ua popole ai. Popole le mafaufau a le faisalāmo i tagata o lona nu'u o loo ifo i tupua ma fultua mai i le Atua. Ua su'esu'e loloto foi le faisalāmo ia te ia lava, pe le o lavea ai foi ia i le vaega lea. Peitai, o le filemu moni e maua e le tagata ua silasila i fofoga o le Atua, e galo ai mea uma o loo popole ai le mafaufau.

Masalo o le tele o mea o loo e popole ai ua ala ai ona le maua sou moe lelei i le po. Afai o lea, e fetai tonu ia te oe le Salamo 4. Faitau i ai, e aumai ai e le Atua ia te oe le filemu ma le to'amalie o loo pese ai le faisalāmo.

Tatalo: Le Alii e, ou te avatu ia te 'oe a'u avega mamafa uma, o mea o lo'o o'u popole ai, ma mea ou te tiga ai, auā e tali mai oe le Tamā, **Amene.**

Aso Toonai – Mati 23: “Le leo itiiti i le tōafa” (*Desert whisper*)

Tusi Faitau – 1 Tupu 19:11-13

Matua – ff.12b, 13: *“...e mulimuli i le afi o le leo filemu ma le itiiti. Ua faalogo ai Elia.... ma alu i fafo, ma tu i le gutu o le ana; faauta, ua oo mai ia te ia le leo, ua faapea mai, Elia e, se a lau mea e fai iina?”*

O le maoa'e o le tala ia Elia ma le vavega sa molimauina i le mauga o Karamelu, e lē faigofie ona fa'amatalaina. Sa tuliloa ma fa'amata'u Iesepela ia Elia i tausaga e tele. O lona fefe ma lona lē mautonu, na sola ai ma lafi i le ana. O le ata manino lea o le auuana ua musuā mai le galuega. Peitai, e le'i tu'ulafoaiina e le Atua lana auuana o Elia.

Ina ua feiloai le Atua ma Elia i le mauga, e le'i fa'aali le Atua i le afi po'o le matagi po'o le mafui'e. Ae na fa'aali i le leo itiiti ma le filemu: *“Elia e, se a lau mea e fai iina?”* E i ai taimi tatou te malaga ai i se nofoaga e aunoa ma se silafia pe aisea. A o nofoaga fa'apea e masani ona tatou fetaia'i ai ma le Atua. Ia fa'atalitali, ia to'afilemu, ia fa'alogologo lelei mo le Atua ma lona fetalai mai i le leo itiiti ma le fa'atauva.

Tatalo: E lē afaina le fa'aleo o lau tatalo, ae fa'avanoa sou 5 pe 10 minute e te nofo filemu ai, ma fesili i le Atua pe se a lona finagalo mo oe, **Amene.**

Soifuuga i le Tōafa fa’anei ona po (*Life in the modern desert*)

4 – Saili (*Seeking*)

Aso Sa – Mati 24: “E te saili i le Atua ona o le a?” (*What is it to seek God?*)

Tusi Faitau – 1 Nofoaiga a Tupu 28:9

Matua – f.9b: “...afai e te saili atu ia te ia, ona e maua ai lea o ia;”

O le faitauga o lenei aso, o le apoapoaiga faa-tamā o le tupu o Tavita i lona atalii o Solomona i le avea ai ma ta’ita’i o Isaraelu. O le feau a Tavita ia Solomona, ia saili le Atua e ala i le salamō, ona manuia lea o lana nofoa’iga. Silafia lelei e Tavita, o le saili o le Atua e ala i le salamō ma le fa’aliliuina o le loto, e faigofie ona fa’atino, auā o le Atua e maua gofie o ia i taimi uma.

Fa’amata e le o le feau aoao foi lea o lenei vaitau o le Leni? Saili, salamō, ma toe fo’i i le Atua? O le Leni o le vaitau e fa’agafua ai o tatou tagata mai le olaga o loo tatou ola ai, mo le Atua ma lona finagalo. O lenei vaiaso o le a tatou va’ava’ai ai i le uiga o le “saili” o le Atua, po o a ni ona foliga, ae pe fa’apefea foi ona fa’atino i se auala e atagia ai le loto maualalo.

Tatalo: Le Alii e, se’i e foa’i mai le manino ina ia matou maua, pe a matou saili atu i lau afio, **Amene.**

Aso Gafua – Mati 25: “O Taunuuga o le sailiga”

Tusi Faitau – Faataoto 2:1-11 (*The Consequences of Seeking*)

Matua – f.9: “ona e lagona ai lea o le amiotonu, ma le fa’amasinoga, ma le amio sa’o; o ala lelei uma lava.”

O le sailiga o le Atua e le o se mea fa’atauvaa. E le o se mea foi e fa’atagā fai. E tatau ona ave uma i ai le malosi atoatoa ma le mafaufau lelei. A o na’o lenei: e leai se uiga e saili ai le Atua, pe a le taunuu le sailiga i le fa’atinoina o le alofa atu i isi. O le uiga o le manatu, o le taunuuga o le sailiga, e tatau ona aafia ai isi tagata i se fa’atinoga lelei e faia, e tusa ma le finagalo le Atua.

E fa’apea se lagona o loo atagia mai i totonu o le fuaiupu lea ua avea ma matua o lenei aso. E ui o le sailiga o le Atua o se fa’atinoga e patino i le tagata lava ia o loo saili, a o le taunuuga o lea sailiga, e aafia ai ma le tagata lautele faatasi ai ma le lalolagi atoa. A le taunuu lou sailiga i le fa’atinoina o se galuega lelei mo isi, o lona uiga, e lē moni lau sailiga.

E pei ona a’oa’o mai le tusitala o le tusi o Faataoto: o le amiotonu, o le fa’amasinoga, ma le amio sa’o; o le poto lea o loo fa’atalauula mai ai le Atua ina ia tatou sailia, ia pei o le sailiga o le ario, auā o mea ia manuia ai isi tagata.

Tatalo: Le Atua e, matou te fia saili i lou agaga poto, e le gata mo i matou ae mo le lalolagi uma, **Amene.**

Aso Lua – Mati 26: “O lou loto atoa” (*All of your heart*)

Tusi Faitau – Ieremia 29:11-14

Matua – f.13: “*E saili mai outou ia te au, tou te maua foi, pe a outou saili mai ia te au ma outou loto atoa.*”

“*O lou loto atoa,*” o se tasi nei o fa’aupuga e masani tele ai le Tusi Paia. Peitai, o le uiga o lea fa’aupuga, e feeseesea’i ma lē mautonu ai le to’atele. A naua’i le loto atoa i le Atua, fa’apefea le fa’atinoina o le alofa i isi tagata? E afa le loto e naua’i i le Atua, a o le isi afa e ave i le fa’atinoga o le alofa i isi?

I le manatau fa’a-Eperu, o le loto o le totonugalemu lea o le tagata – i lona itu fa’aletino ma lona itu fa’ale-agaga; o le nofoaga foi o lagona ma filifiliga fai o le tagata. O le naua’i la “*o lou loto atoa*” i le Atua, o lona uiga, ia aumai le Atua e fai ma totonugalemu o le tagata. E taula’i ia te ia le itu fa’aletino ma le itu fa’aleagaga o le tagata. O lona finagalo foi, e fai ma tapasā e ta’ita’iina ai lagona ma filifiliga fai o le tagata.

E le eseese la le naua’i o le loto atoa i le Atua, ma le fa’atinoga o le alofa i isi. Auā o le fa’atinoga o le alofa i isi, o le taunuuga lea e i’u i ai le tagata e naua’i lona loto atoa e saili i le Atua.

Tatalo: Le Atua e, matou te valaau i lau afio se’i e afio i le taele o matou loto ma ta’ita’iina i matou i o matou ala uma, **Amene.**

Aso Lulu – Mati 27: “I le tuneva o le po” (*In the still of the night*)

Tusi Faitau – Isaia 26:7-12

Matua – f.9a: “*Ua manao lo’u loto ia te oe i le po; e moni, e ala saili ia te oe lo’u agaga i totonu ia te au;*”

E i ai taimi o le po e tauivi ai le tagata e fia maua se malologa, ae faigata ona o le tele o mea o loo mamafa i le mafaufau. E i ai tagata ua latou iloa auala e fa’amatuu atu ai mea o loo mamafa i le mafaufau. E i ai foi tagata ua latou iloa faiga e sola ese ai mai mea e tiga ai. Peita’i, a o’o mai le tuneva o le po, ua leai se mea e mafai ona toe alo ese ai. A o’o mai le taimi o le po ua lē toe lagona ai se pisa poo se gasese, ua leai se mea e mafai ona toe sola ese ai.

O taimi tonu ia o loo fa’a’iloa mai e le perofeta, e mana’o ai lona loto i le Atua, ma ala saili atu ai ia te Ia. Tatou te fiu e sosola ese mai i mea faigata o le soifuaga. Tatou te fiu foi e alo ese mai le tele o mea o lenei olaga e fai ma fa’amamafa i le mafaufau. O le feau a le perofeta: a tatou saili i le Atua, e le aogā le sola ese; e maumau foi taimi e alo ese ai; ae ia saili sa’o i le Atua ma le loto atoa, ona māmā lea o mea uma o loo mamafa ia i tatou.

Tatalo: Le Atua e, o le filemu ma le alofa tunoa, liliu e lau afio o matou mafatiaga e avea ma fa’amanuiaga, **Amene.**

Aso Tofi – Mati 28: “Saili ma malamalama” (*Seeking and understanding*)

Tusi Faitau – Isaia 55:6-13

Matua – ff.8-9: “*Auā o o’u manatu e le o outou manatu, o o’u ala e le o outou ala.... Auā e pei ona sili ona maualuga o le lagi i le lalolagi, ua faapea ona sili ona maualuga o o’u ala i o outou ala, ma o’u manatu e sili i o outou manatu.*”

Fa’amata e mafai ona tatou malamalama atoatoa i le Atua? Afai o le Atua e silisili ese, toe maualuga ona ala ma ona manatu nai lo ala ma manatu o le tagata, fa’amata e mafai ea e se tagata soifua ona malamalama moni i le Atua? Afai e ioe, ailoga la o se Atua moni. Ae afai e leai, o le a le aogā e saili ai le Atua tatou te le malamalama ai? E maumau taimi e saili ai. O se sailiga foi e i’uvale, pe afai tatou te le o malamalama i le Atua lea o loo tatou sailia.

O le manatu lea o loo atagia i le perofeta o Isaia i lona fa’amanatu mai, e i ai le va tapuia o le Atua ma le tagata. O ona ala, e le o ala ia o le tagata. O lona finagalo foi, e le o manatu ia o le tagata. E fa’apefea la ona tatou saili i le mea tatou te le malamalama ai? Pau le mea, ia saili ma le fa’aeteete ma le loto maualalo. Ia saili foi ma le loto matala, ina ia faigofie ai ona tatou talia ala o le Atua e le o ni o tatou ala, ma lona finagalo e le o ni o tatou manatu.

Tatalo: Le Atua paia e, a’oa’o mai ina ia matou iloa ona saili i lau afio i le utaga ma le tōfā fa’ale-Atua, e tautai ai lau galuega, **Amene.**

Aso Faraile – Mati 29: “Alaga atu” (*Crying out*)

Tusi Faitau – Salamo 77:1-15

Matua – f.1: “*Na ou alaga atu i le Atua i lo’u leo, na ou alaga atu i le Atua; ona faafofoga mai lea o ia ia te au.*”

O taimi o fita ma faigata o le olaga, o taimi ia e masani ai le tagata ona alaga atu i le Atua. O isi e alaga atu e leai se leo – o le alaga lea o le agaga ma le loto ua nutimomoia. A o isi, e alaga atu ma le leo tele. E le mailoa poo le a le alaga atu e sili. A o le alaga atu ma le leo tele, pe la o i ai ni taliga a le Atua e fa’afofoga mai ai i la tatou alaga atu? Afai e silafia e le Atua mea uma, o lona uiga na te silafia foi le alaga lē lea o o tatou loto.

Masalo o le alaga atu ma le leo tele, e le mo le Atua, ae mo le tagata lava ia o loo alaga, i ona lagona e fia sasa’a atu, e faamatuu atu ai se avega mamafa o amoina. A o le tāua o le alaga atu, pe lea pe leai, o le tatala atu lea o se tasi o lagona o le loto a le tagata e seāseā fa’aalia. O le lagona lea o le loto e pogai mai ai le naunau ma le fa’amaoni o le tagata i lana sailiga o le Atua. O le lagona foi lea o le loto a le tagata, e faigofie ai ona afio mai le Atua pe a maua.

Tatalo: Le Atua e, foa’i mai ia te’i matou le mafaufau lelei, matou te lagona ai upu o loo ta’ua, ia matou tatalo ai, **Amene.**

Aso Toonai – Mati 30: “Natia ma saili” (*Hide and seek*)

Tusi Faitau – Kolose 3:1-11

Matua – ff.1-4: “*O lenei, afai ua toe faatuina outou faatasi ma Keriso, ia outou saili i mea o i lugā, o i ai Keriso.... a e le o mea i le lalolagi. Auā ua oti outou, ua lilo foi lo outou ola faatasi ma Keriso i le Atua.*”

O le tagata e fiafia e lafi mai le olaga, o le fa’ailoga lea o se fa’aletonu poo se mea ua naunau le tagata e natia. A tele fita ma faigata o le olaga. Ae a tele foi feau ma galuega e saputu mai, o taimi ia e manaia ai le lafi ma le sola ese.

O le apoapoaiga a le Aposetolo e “*saili i mea o i lugā,*” e pei o se galuega fa’aopoopo lea ua atili ai ona mamafa feau ma galuega a le tagata Kerisiano. Peitai, e lagona le mafanafana i upu o loo soso’o ane ai, “*ua lilo foi lo outou ola faatasi ma Keriso i le Atua.*” O le ‘lilo faatasi ma Keriso i le Atua’, o lona uiga, a tatou lalafi mai le olaga, tatou te lalafi fa’atasi ma Keriso. E i ai Keriso fa’atasi ma i tatou i le taimi tatou te lalafi ai ma sosola ese ai mai le olaga.

E lē faigofie le sailiga o le Atua, aemaise pe a saili e ala i le ola galue ma le soifua tautua i totonu o ‘aulotu ma ekalesia. Peitai, afai tatou te lagona le fia mapu ane mai le ola galue ma le soifua tautua, e fa’atasi le Atua ma i tatou.

Tatalo: Le Atua e, se’i fa’atumuina i matou i le malosi fa’aleagaga, e momo’e ai pea i luma, e tusa lava pe lagonaina le leo o le fia lafi, **Amene.**

Soifuaga i le Tōafa fa’anei ona po (*Life in the modern desert*)

5 – Tau le Sailiga (*Finding*)

Aso Sa – Mati 31: “Sailiga o le faamoemoe” (*Finding hope*)

Tusi Faitau – Sapakuka 3:17-19

Matua – f.18: “*Ae peitai a’u, ou te olioli lava i le ALII, ou te fiafia lava i le Atua o lo’u fa’aolataga.*”

E fa’apefea ona avea le Leni ma vaitau e tau lau ai le sailiga i totonu o le tōafa? O faitauga o lenei vaiaso o upu o loo lagi fa’apese ai fa’aletonu o le olaga i le taimi nei, fa’atasi ai ma le fa’amoemoe ola mo le lumanai. E fa’apea le pese a le perofeta o Sapakuka lea ua fai ma tusi faitau o lenei aso. O le pese sa tusia i le taimi o le tafeaga i Papelonia, ma o loo lagi fa’apese ai le tele o tiga ma faigata sa feagai ma lona nu’u i le tafeaga. Peita’i, e i ai upu o le pese, pei o upu ia ua avea ma matua o lenei aso, o loo atagia ai le fa’amoemoe ola e ui i tiga ma faigata sa feagai ai. O le fa’amoemoe ola lea e autū i le Atua ma lana fa’aolataga, sa talitonu ma fa’atuatua i ai le perofeta.

Tatalo: Le Atua e, fa’afetai mo solo ma pese na saunia e le ‘au uso, e fai ma sulu mumu pea mo ō o i le pogisa, **Amene.**

Aso Lulu – Aperila 3: “Sailiga o tatou ala” (*Finding our way*)

Tusi Faitau – Salamo 107:1-9

Matua – ff.6-7: *“Ona alalaga lea o i latou i le Alii i lo latou puapuaga, na ia laveai ia te i latou nai o latou tiga....Na ia taitaiina foi i latou i le ala tonu ina ia latou o atu ai i se aai e nonofo ai.”*

O lagona o le faisalāmo e fa’aalia ai le loto fa’afetai ona o le alofa ma le agalelei o le Atua. O le ata manino o le Atua e mafuta mai i ona tagata, e pei ona faia ia Isaraelu. O le alofa ma le agalelei o le Atua, o se puna’oa sili ona tāua i le olaga o le tagata. O lagona o le faisalāmo e pei ona aumai i lana pese, o loo atagia ai le naunauta’i ma le agalelei o le Atua i le tagata. O lona mafuta mai, na te ta’ita’i ai i tatou i le manuia, ina ua tatou talitonu ma le fa’atuatua i le tunoa o lona alofa. O ala lava ia o le Atua e tatau ona tatou sailia.

O le faamanatu: saili ma pipi’i pea i le Atua tatou te iloa ai lona alofa fa’amaoni. E silafia e Ia mea uma, e o’o lava i o tatou tagata lilo. O le agaga o le fa’amaoni, ma le fa’atuatua, o le faitotoa lena mo le tagata Kerisiano e mafai ai ona iloa atu lea alofa lē fa’atuā’oia o le Atua.

Tatalo: Fa’afetai le Atua, auā e te le o tau mamao ma i matou, a matou valaau atu i o matou puapuaga, e te fa’afogaina, **Amene.**

Aso Tofi – Aperila 4: “Sailiga o le fa’afouina” (*Finding refreshment*)

Tusi Faitau – Isaia 41:17-20

Matua – f.17: *“O e tigaina ma e matitiva o lo latou saili i se vai, a ua leai, ua matutu o latou laulaufaiva i le fia inu, o au o le Alii, ou te tali atu ia te i latou, o au o le Atua o Isaraelu, ou te le tuulafoaina i latou.”*

Afai o le fa’amasinoga e tulaga ese ai galuega a le Atua, e le sili ea lana fa’aolataga e fa’amatala ai pea lona alofa? O le saili atu o le tagata i le ola fa’afouina, na te maua ai ana fa’amanuiaga. O le i ai o le nu’u o Isaraelu i le tafeaga, o taimi luluti ia o mafatiaga sa feagai ma tagata. Peita’i, e lē mafai ona mavae ai le alofa lē fa’atuā’oia o le Atua i ona tagata. O loo i ai pea le avanoa e tali ai le Atua i o latou mafatiaga, auā o le Atua e alofa.

E ui ina feagai lo tatou ola ma faigata, a ia tatou talitonu e le mafai ona te’a le alofa o le Atua ma i tatou. E ao ona tu’uina atu lou fa’atuatua i le Atua, e tali mai, na te saunia auala e faafouina ai lo tatou malosī, tatou te iloa ai lona fa’aali mai. O le sulufa’i atu i le Alii i taimi faigata, o le mautinoa foi lea o le Atua mafuta mai mo i tatou.

Tatalo: Le Atua alofa e, ia matou lagona le fa’atuatua fa’amaoni, e maua ai le ola fa’afouina, **Amene.**

Aso Faraile – Aperila 5: “Sailiga o le fafagaina” (*Finding nourishment*)

Tusi Faitau – Mareko 8:1-10

Matua – f.6: *“Ona fetali atu lea o Ia i le motu o tagata ia latou taotoo i lalo, ona tago lea o ia i areto e fitu, ua faafetai, ua tofitofi, ma avane i ona soo, latou te laulauina atu, ona latou laulauina atu ai lea i le motu o tagata.”*

O le felafolafoa’iga a Iesu ma ona so’o, na silafia ai e Iesu o tagata ua leai se fa’atuatua. O le va’ai a le ‘ausoo, e lē tofu le motu tagata i areto e fitu, ua na o ni mea iti. Peita’i, o iina na mauafia ai le faia o le vavega i nei mea iti.

E mo’omia e Iesu le ofoina atu o mea itiiti ua i ai tatou, e ala i le fa’atuatua, fa’ataasi ma o tatou lima, e fa’asoa ai ana fa’amanuiaga i tagata o loo mo’omia le fesoasoani. O lo tatou ofoina atu o mea iti ua tatou maua ia Iesu, e fa’ateleina e Iesu i lona mana silisili ese, ma fa’asoa mai mo i tatou.

O e faasoa atu ea ni mea iti ua e maua ina ia ola ai nisi tagata? O fa’aaogā tatau ea o tatou lima e fa’asoa atu ai manuia o le Atua mo isi? O le ofoina atu o mea fa’atauvaa ma le itiiti ua tatou maua i le Atua, e fa’atino ai e le Atua le vavega i lona mana silisili ese, ia tatou maua ai le ola.

Tatalo: Le Atua e, ia fa’atumuina le fiafia e foa’i atu, pe itiiti pe tele, ia fai ma fa’ataitaiga o lou alofa, **Amene.**

Aso Toonai – Aperila 6: “Sailiga o le taunuuga” (*Finding fulfilment*)

Tusi Faitau – Ioane 12:24-26

Matua – f.24: *“E moni, e moni, ou te fai atu ia te outou. Afai e le pa’ū le fua o le saito i le eleele ma pala ai, e tumau pea o le mea e tasi, afai e pala, ona fua tele mai ai lea.”*

O le mulimuli ia Iesu, e mo’omia ai o tatou tagata fou. E mo’omia o tatou tagata tuai ina ia liliuina e fai ma tagata fou, e fua mai ai uiga faale-Atua, e manino ai la tatou vaai i lona finagalo. Na a’oa’o e Iesu ona so’o, ia tu’u ese le fa’amauaia fa’aletagata ma le manatu faapito, auā e lē fua mai ai i ni fua lelei. O le fa’amoemoe o le olaga fa’a-Kerisiano, ia ola fa’atuatua i le Atua ma auauna atu i isi, e iloa ai le tāua o le fua mai i fua lelei i o tatou olaga.

Ia avea i tatou ma tagata fou, ona tatou iloa lea o le uiga moni o le auauna atu ia Iesu ma avea ma soo e mulimuli ia te ia. O mea e tatau ona pala ma fua mai, o mea ia e manuia ai lo tatou olaga. Ia auauna ma le fa’atuatua i le Atua, e fua mai ai i ni fua lelei i la tatou auaunaga. O le taunuuga lea o le sailiga – o le fua tele mai o le olaga o le tagata .

Tatalo: Fa’afetai le Atua, o lē na ia fa’aali mai le fatu o le fa’atuatua, ina ia fua mai ai mea lelei i o tatou olaga, **Amene.**

(2) Faitauga mai ia Luka (*Readings in Luke*)
1 – O le ma’a tu’ulafoaiina (*The stone rejected*)

Aso Sa – Aperila 7: “O le ma’a tu’ulafoaina” (*The stone rejected*)

Tusi Faitau – Luka 20:1-19

Matua – f.13: “*Ou te auina atu lo’u atalii pele, atonu latou te ava mai ia te au.*”

O le avea o i tatou ma tagata kerisiano, e te’ena ai i tatou e isi tagata ona o le eseesea o manatu. Tatou te faatuatua’i i isi, ona o le fia maua o fa’amanuiaga ma se tali lelei e fa’amalieina ai o tatou manao. E i ai foi taimi tatou te lē talia ai ni mafuaaga e fa’apitua ai le va’ai i ai tatou, ona o so tatou iloa. O le fa’amoemoe ma le onosa’i i se tali lelei, o le faia o auala lelei ma le sa’o e lē teena ai i tatou e isi tagata

E i ai taimi tatou te fesiligia ai la tatou auunaga mo le Atua, aemaise lava i le taimi e tele ai mea fai e fa’atino ai le ola auuna. Peita’i, ua auina mai Iesu o le Alo o le Atua, e fai ma sui va’aia o le Atua i le lalolagi. Ae na te’ena foi, lea na latou taupulepule e fasioti ia te ia. Poo le a le teena o tatou e isi, ia taofi mau pea i le ola fa’atuatua ia Iesu, e avea ai i tatou ma ma’a tulimanu mo le Atua ma lona finagalo.

Tatalo: Le Tamā alofa e, ia saunia lo’u ola mo mea faigata, pe a o’o mai taimi e te’ena ai i matou ona o lou suafa, **Amene.**

Aso Gafua – Aperila 8: “Ave mea tau i le Atua” (*Give to God what is God*)

Tusi Faitau – Luka 20:20-26

Matua – f.25: “*Ona fetalai atu lea o Ia ia te i latou, O mea a Kaisara ia outou avatua ia Kaisara, a o mea a le Atua avatu ia i le Atua.*”

O le tagata o le mea patino a le Atua, e ave i le Atua fa’atasi ma le mea sili tatou te mafaia. O lo tatou iloa o le itu tatou te tūtū ai, o le fa’ailoa atu foi lea i le lalolagi, o i tatou o mea totino a le Atua. E sa’oloto le tuuina atu o tatou tagata i le Atua, e aunoa ma le taotaomia, poo ai e pule ia i tatou. Fai lou ola ma taulaga ola i le Atua, auā o i tatou na fai ma tualuga o lana galuega foafoa, e patino foi i le Atua.

O le saunoaga a Iesu, o mea e patino ia Kaisara ave ia Kaisara. O tupe e fai ai lafoga a le mālō Roma, na faavae i ana tulafono, e ao ona tausisia uma e tagata. Peita’i, o le tagata o le mea patino i le Atua, e ola vivii ma le fa’atuatua ia te Ia. E le fa’avaeina i se tulafono, ae sa’oloto le ave o i tatou i le Atua.

Tatalo: Le Atua e, ua e fa’amanuia mai e tusa ma mea na ou mana’omia. Ia ou tu’uina atu le mea sili ou te mafaia mo oe, **Amene.**

Aso Lua – Aperila 9: “Fesiligia le ‘au tu’u fesili” (*Questioners questioned*)

Tusi Faitau – Luka 20:27-47

Matua – f.46-47: *“Ia outou i le au tusiupu e ua fia evaeva ma oofu tatapuvae ua mananao foi ia alofagia i latou i malae, ma nofoa sili i sunako, ma mea sili e taoto ai i faiga’ai. O e faauma fale o fafine ua oti a latou tane, ua faalevaleva foi a latou tatalo e fai ma ufiufi, e atili ai ona faasalaina o i latou.*

So’o se kerisiano e fa’avae i foliga va’aia, ua punitia lona tagata moni e mo’omia m le ola ofoina atu mo Keriso. O le au tusiupu, o tagata e fiafia i foliga va’aia i fafo, e ufiufi o latou tagata sa’o. E fiafia e tatalo i luma o tagata, ina ia iloa e tagata lo latou amio fa’afiatonu. O tagata e fiafia e molimau i mea pepelo e aafia ai le soifua manuia o isi tagata.

O mafai ea ona fa’aali atu o tatou tagata lilo i le Atua, e aunoa ma le ola fa’afoliga? O le fa’aali atu o tatou tagata lilo, o le tatalaina lea o tatou loto ia silasila i ai le Atua. Tatou te a’oa’oina mai ia Iesu le faiva o le a’oa’o atu, ma le faigata ona talia e tagata o ana a’oa’oga. Tatou fesili pea i le Atua i lana fa’asinomaga, e fa’aogaina ai lo tatou ola mo ana feau.

Tatalo: Le Atua mamana e, fesoasoani mai ia aua nei natia o matou tagata kerisiano i mea faatauvaa, **Amene.**

Aso Lulu – Aperila 10: “Tū mausalī” (*Standing Firm*)

Tusi Faitau – Luka 21:1-19

Matua – f.13, 15: *“O aso ia e avea ai outou ma molimau. O lenei ‘ia tu’u i o outou loto, tou te lē mua’i mafaufau i se upu tou te tali atu ai. Auā ‘ou te avatu mo ‘outou le ‘upu ma le poto, e leai so latou o ē fīnau mai iā te outou na te mafaia ona tali mai, pe tete’e mai iā te outou.”*

O le avea o i tatou ma molimau i le Atua, e tāua ai le fa’alagolago i le mana o le Atua, tatou te iloa ai lona mafuta mai. O lo tatou iloa o tatou tiute ma tofiga, tatou te iloa ai le taunuuga lelei o mea moni ua tatou faia ma le loto atoa. O le feagai o Iesu ma faigata ma puapuaga o lana galuega, o loo matuā leotele ai lagona o tagata e fia iloa ni fa’ailoga o a’oa’oga a Iesu. O le avea o i tatou ma molimau mo Iesu Keriso, o le mafai lea ona tatou maua le poto ma le gagana, tatou te fa’ailoa atu ai le uiga moni o le fa’aolataga mo tagata uma.

Ia mausalī lo tatou faatuatua i taimi e fesiligia ai i tatou. Ia tatou iloa foi o i tatou o molimau mo le Atua e ala i a tatou fa’atinoga ma auaunaga. Ia fa’alagolago i le Atua ma lona poto e fa’agaganaina ai i tatou. Tu mausalī ma tali mautinoa i taimi e fesiligia ai tatou, o la ta molimau lena ia Keriso.

Tatalo: Le Atua mamana e, aumaia le loto naunau ou te iloa ai uiga loloto o mea ua ou faia, e avea ai i matou ma molimau i lau Upu, **Amene.**

Aso Tofi – Aperila 11: “Ia mataala” (*Be Watchful*)

Tusi Faitau – Luka 21:20-38

Matua – ff.34-35: *“Ia outou, ne’i mafatia o outou loto i le soona ulavale, ma le onā, ma le popole i mea a le olaga nei, ne’i faafuasei mai lea aso ia te outou e pei o se māilei. Aua e oo mai ai i e nonofo uma lava i le fogaeleele uma.”*

O le ola mataala e mafai ai ona tali atu ai i mea faigata. E mo’omia i lo tatou ola le mataala, ma sauni, tatou te tali atu ai i le valaaui mai o le Atua. A’oa’o mai Iesu i le tāua o le ola mataala, aemaise le fa’amoemoe i le Atua e maua ai le malosi, e tetee atu ai i faiga a le fili, ma tali atu ai i fa’afitauli e o’o mai. O le ola popole ma le ola fememeai, o aga masani ia a le tagata e lei saunia mo taimi faigata. Ia saunia o tatou tagata mo mea e tutupu mai, ina ne’i segia o tatou loto ina ua lē iloa ona ola mataala.

Mataala ma saunia lelei lou ola, ina ia tatou iloa ona fa’afetaui mea faigata i le lagona to’amalie ma le fa’atuatua, e logo lelei ai le ola saunia i soo se taimi. O le fetaiia’i o Iesu ma faafitauli o lana galuega, sa fa’atāuaina ai e Iesu le ola mataala, ma sauni i taimi e faafesaga’i ai ma le fili ma ana au.

Tatalo: Lo matou Tama o i le lagi, fesoasoani mai ia matou mataala, i taimi e o’o mai ai mea faigata, **Amene.**

Aso Faraile – Aperila 12: “Ua masa’a le ipu vai” (*The die is cast*)

Tusi Faitau – Luka 22:1-6

Matua – ff.4-6: *“Ua alu ia ua tautalatala ma le au ositaulaga sili ma ta’ita’i o au, i se togafiti na te fa’alataina ai o ia...ua latou tautalatala ma ia e avatu ai tupe. Ua lelei ia te ia, ona lamalama lea o ia i se itu aso e faigofie ai, na te faalataina ai o ia... a o le i ai le motu o tagata.”*

O le loto malie o Iuta e fa’alata Iesu, o le manino mai foi lea o le olaga fa’a-Satani na ulutinoina ai Iuta. O le tagata na faifai mea fa’atasi ma Iesu ma a’oa’oina e Iesu i mea lelei ma le tala o le ola. Ua aliali le vaivai o Iuta, ma ua leai se ola talitonu ma fa’amoemoe i a’oa’oga lelei na faia e Iesu mo ia, ae ua ia manao i le tamāoaiga.

O le ola taupulepule ma le fa’amoemoe e fa’ataunuaina se mea tiga ma le matuitui, o se agasala o loo fai ma le iloa. E lē finagalo le Atua ia tatou aafia i ni taupulega e fa’aoo ai le oti i se tagata. O nisi taimi e fa’aosofia lo tatou ola taupulepule i mea sesē, ona o le manao i manuia o le olaga. Soia le ola taupulepule leaga, ae ia tatou taupulepule i mea lelei, mo le manuia o le galuega a le Atua i le lumanai.

Tatalo: Le Atua e, fesoasoani mai ina ia ‘aua nei ou pei o Iuta, e fa’alataina i latou o loo faia mea lelei mo au, **Amene.**

Aso Toonai – Aperila 13: “Areto ma le Uaina” (*Bread and wine*)

Tusi Faitau – Luka 22:7-23

Matua – ff.17-19: “*Ona tago ai lea o ia i le ipu ua faafetai, ua fetalai atu, Ia outou tago i lenei ipu ma ia tufatufa ane ia te outou, auā ou te fai atu ia te outou, e amata atu nei, ou te le toe inu lava i le fua o le vine, seia oo mai le mālō le Atua. Ona tago ai lea o ia i le areto... ua faapea atu, O lo’u tino lenei, ua foaina atu mo outou tou te faia le mea nei e fai ma fa’amanatuga ia te au.”*

O le fa’atinoga na fai e Iesu, o le avanoa lea e mafai ai ona mafuta tagata uma. E le gata i lea, a o avanoa e aumai ai le saolotga i tagata fa’atuatua ia Iesu. O le fa’anaunautaga o Iesu i lenei sauniga, o le auala lea e mafai ai ona maua le mafutaga ma ona soo e toe fa’amanatu i ai, o lona agai atu i le satauro ma lona toe tu, o le mea na folafolaina mo le fa’aolataga, aemaise o le fuafuaaga manino a le Atua mo lona soifua ofoina atu e laveai le lalolagi.

Ua valaauina i tatou e ‘aai fa’atasi ma mafuta fa’atasi, ma tatou galulue fa’atasi, ma fa’asoa le ola ma le saolotoga i tagata. E moomia e le Atua le avea o oe ma au ma so’otaga e maua ai le galulue faatasi. Ia tatou galulue fa’atasi e mafai ai ona maua le fealofani, ma faigofie ai la tatou auunaga i le Atua.

Tatalo: Le Alii e, o le ‘aai i le areto ma le uaina o le fa’atusa o lou tino ma lou toto paia, o le auamaia lava lea o le ola i le lalolagi pogisa, **Amene.**

(2) Faitauga mai ia Luka (*Readings from Luke*)

2 – O ai e sili? (*Who is the greatest?*)

Aso Sa Laupama

Aso Sa – Aperila 14: “O sē e auauna” (*One who serves*)

Tusi Faitau – Luka 22:24-38

Matua – f.27:(*se vaega*) “*a o a’u nei, o loo ia te outou pei o le auauna lava.*”

O le fefinauai a le au soo poo ai o i latou e sili, ae fa’amatala ai e Iesu le auala e tatau ona maua e le tagata e fia sili. Ia e agalelei, ma ia fai ma auauna. Ia tatou lagona le uiga moni o le avea o i tatou ma auauna. O le mafuta mai o Iesu, tatou te manino ai i le uiga moni o le Atua Tolu Tasi Paia. Auā e mafuta mai o ia i ai tatou i lona Agaga, aua o le Atua lava o ia.

O loo tatou talia o le Atua e avea ma matai, o le auala foi lea tatou te iloa ai ona auauna atu ma avea ma fa’ataitaiga le ola auauna e ui atu i puapuaga, ae tau i le faaeaina. Auā o lē nauanu e fia sili, ia maua le loto maulalo ma le agalelei, ona mafai lea ona iloa le uiga moni o le fai ma auauna.

Tatalo: Le Atua le Matai sili, fesoasoani mai ina ia matala o matou mata faale-agaga e iloa ai le tāua o le fai ma auauna, **Amene.**

Aso Gafua – Aperila 15: “O le sogi fa’alata” (*An expedient kiss*)

Tusi Faitau – Luka 22:39-53

Matua – ff.47b-48: *“...Iuta.....ua sōsō mai ia Iesu e sogi ia te ia. A ua fetali atu Iesu ia te ia, Iuta e, e te fa’alataina ea le Atalii o le tagata ma le sogi?”*

Pe mata na lagona e Iuta o le mea na ia faia e sesē, pe sa’o, ina ia mafai ai ona fasiotia Iesu? Ae le i nefefu foi Iesu i le faatinoga a Iuta. O le fetaliga a Iesu ia Iuta, na manino ai Iuta, e le o se fa’atinoga lelei lea ua ia faia. O le fa’aaogaina o le sogi i le itu leaga, ua ia mailei ai le soifua o Iesu. Le so’o na fa’alogo ma va’ai i vavega a Iesu. E le i manatu Iuta o le a lelei se faaiuga, peitai e lei mamafa ia Iuta le auala na ia uia. Ua toilalo lona fa’amaoni ma lana amiotonu, ona ua vaivai le mafuta ia Iesu Keriso.

E le faigofie le faia o ni filifiliga lelei. A o le mea e ao ona tatou faia, o le ole atu i le Atua e fesoasoani mai i a tatou filifiliga. A sa’o lau filifiliga, ua manuia a tatou taumafaiga. Ae a sasi, ua taunuu i se taunuuga lē manuia. O filifiliga lelei, e fa’aosofia ai le loto fiafia e faatino mea sili mo le Atua. E ao ona avea i tatou ma fa’ataitaiga lelei i isi, ina ia tatou filifili e ola mo Keriso.

Tatalo: Iesu e le uo sili, fesoasoani mai ia matou fa’amaoni i a matou filifiliga, ma te iloa ai le amiotonu o lau afio, **Amene.**

Aso Lua – Aperila 16: “Ua talitonuina i tatou e le Atua (*God believes in us*)

Tusi Faitau – Luka 22:54-71

Matua – ff.61-62: *“Ona faliu lea o le Alii, ua silasila atu ia Peteru. Ona manatua mai ai lea o Peteru le fetaliga a le Alii... 'E le vivini moa seia e fa’afiti fa’atolu mai ia te au. Ona alu ai lea o ia i fafo, ua tagi lotulotu ia.”*

O le fa’atoilaloina o le fa’atuatua o Peteru, na ia lagona ai i lona loto le mātuiā o lona fa’afiti i le Alii. A o le moni ma le fa’amaoni o saunoaga a Iesu, tatou te lagona ai le silafia e Iesu o le fa’aaogāina o tatou loto ma tatou ta’utinoga. E ui i le fa’afitia e Peteru o Iesu, e lei gata ai le finagalo o Iesu mo lana auaua. Sa fa’aaogaina e Iesu Peteru mo le galuega e faataunuu. E ui ina tautevateva Peteru ona o lona fa’afitia o Iesu, ae o loo i ai lava lona aogā mo le galuega. Poo le a lava lona loto nutimomoia ona o lona fa’atinoga na fai, o loo silafia e Iesu, o loo i ai ona uso fa’ale-’ausoo e faamalosia o ia.

O le tatou tauiviga e talitonu i le Atua, e le auaoa i lana silafaga. O lona finagalo na te fa’aaogaina ai pea o tatou agavaa fa’atagata fa’atuatua, e fai ma so’o e fa’alauiloa atu lona finagalo. Ia tatou tumau i le fa’atuatua, e mafai ai ona faamalosia i tatou mai i vaivaiga faaletagata e naunau e mafuta ma Iesu.

Tatalo: Le Atua e, fa’amagalo mai lo matou ola fa’afiti i le tele o taimi, ma ia matou iloa e te silafia uma, **Amene.**

Aso o le Fu'a i Amerika Samoa

Aso Lulu – Aperila 17: “Na te fa’aosoina tagata” (*He stirs up the people*)

Tusi Faitau – Luka 23:1-12

Matua – f.5: *"A ua latou finau pea, ua faapea mai ua faaosooso e ia i le nuu, ua aoo i Iutaia uma, ua afua mai i Kalilaia ua oo mai iinei."*

O le i ai o Iesu i luma o Pilato, na atagia ai le taumafai o le au ositaulaga sili ma le au tusiupu e faia ni moliaga sesē. O nei tu’uiga sesē, faimai ua taumafai Iesu e fa’aosooso i tagata – o le finau a tagata tala pepelo ma le tau fa’amatau. Peita’i, ua tulai Iesu i luma o Pilato e ta’utino le mea moni.

E le fa’aosoosoina i tatou e le Atua e faia ni mea sesē, ae fa’amalosia i tatou e faia fa’aiuga sa’o. O iina tatou te manino ai i le Atua fa’ama’ite mea sili. O lona fa’ailoa atu o le mea moni, o se tasi lea o fa’ataitaiga sili na ia fa’ailoa i le motu o tagata. O le saolotoga fa’atagata fa’atuatua, e tautala ai i le mea sa’o, e tusa lava pe sesē i le manatu o tagata taufaifai ma le tau fa’amatau.

Tatalo: Iesu le uo lelei, fesoasoani mai, ina ia ou lagona lou fa’atasi mai i mea lelei uma ou te va’ai i ai, **Amene.**

Aso Tofi Poloa’i (Maundy Thursday)

Aso Tofi – Aperila 18: “O ai e tautala mo le tagata lē sala?”

Tusi Faitau – Luka 23:13-25 (*Who will speak for the innocent?*)

Matua – ff.24-25: *“Ua fai atu e Pilato, ia faia lo outou manao. Ua tatalaina e ia ia tei latou o le na tuuina atu i le falepuipui ona o le fouvale ma le fasioti tagata ua latou fai mai ai, a ua tuuina atu e ia o Iesu i lo latou manao.”*

O le fa’amatuu atu o Pilato i le mana’o o tagata, o se fa’aiuga ua sili ona vaivai. Afai ua lē mafai ona ia tautala atu i le mea moni, o le a avea lana fa’aiuga ma auala o le a aafia ai le ola o le tagata e lē sala. Ua fa’amatuu atu Pilato i le fa’ataua’ānuu a tagata molimau pepelo ina ia sala ai Iesu, ae ua galo ai lana amiotonu fa’ata’ita’i e tatau ona fa’ataunuu. Ua fefe Pilato i le va’ava’ai mai o tagata ma o latou manatu ia te ia ma lana puleaga, ae ua tanumia ai le mea moni e ao ona fai.

Tautala i le fa’amaoni, ona fai lea o oe ma leo o tagata lē sala. Tatou filifili ia e tūtū mo Iesu, ina ua moni o tatou loto e faia ai fa’aiuga sa’o ma le fa’amaoni. O a tatou filifiliga sa’o, o filiiiflaga na ua ‘auai faatasi mai le Alii, auā o ia o le fa’amasino sili, ma o ia foi o le fai fa’aiuga amiotonu, e mafai ai ona tatou iloa le uiga moni o le Atua ma lana fa’amasinoga alofa mo le tagata.

Tatalo: Le Atua alofa e, fesoasoani mai ina ia fai i matou ma leo o tagata lē sala i luma o fa’amasinoga ma le ‘au tauemu, **Amene.**

Aso Faraile Lelei (Good Friday)

Aso Faraile – Aperila 19: “Manatua mai a’u” (*Remember me*)

Tusi Faitau – Luka 23:26-46

Matua – ff.42-43: “*Ona fai mai lea o ia, Iesu e, ia e manatua mai a’u pe a e afio mai i lou mālō. Ona fetalai atu lea o ia te ia. E moni ou te fai atu ia te oe, o le asō ta te faatasi ai ma oe i paretaiso.*”

O le fa’atalauala a le pagota e afua mai i le loto ua salamō, e saili ai le fa’amagaloga a le Alii mo ia. E le i galo i le pagota lea na alaga le avanoa ua ia maua ma Iesu e mafai ai ona augani mo se ola fou. O le toe augani mo le fa’aolataga, o le mea sili lea i toe taimi o Iesu i luga o le satauro. Na tatalo le pagota mo se laveaina o lona agaga mai le agasala, auā o Iesu o le fa’aola mo agaga ua eleelea i le agasala.

O le augani atu ia Iesu e manatua mai i tatou, o le fa’aילו lea o le loto ua salamō fa’amaoni, ua iloa le tāua o lona maliu mo oe ma au. O le mana’o o le pagota ia manatua mai o ia, o le avanoa e mafuta ai ma Iesu i le ola fou ua saunia, pe afai tatou te salamō ma faatuatua.

Tatalo: Le Atua e, fesoasoani mai ina ia ou iloa ona augani atu ma le loto fa’amoni, e ala i fa’atuatua, i lou auai mai, **Amene.**

Aso Toonai Paia (Holy Saturday)

Aso Toonai – Aperila 20: “O le aso e manatua ai” (*A day of remembering*)

Tusi Faitau – Luka 23:47-55

Matua – ff.52-54: “*O ia lea ua alu atu ia Pilato, ma fa’anoi atu i le tino o Iesu. Ua na ave ifo ai, ona aui lea i le ie lino, ona tuu ai lea i le tuugamau na foa i le papa, e lei tuu ai lava se tasi. O le aso lea o le sauniga, ua latalata le sapatī.*”

O le maliu o Iesu, ua aumai ai se ata lelei o le tagata e lē fefe e fa’atino le mea lelei mo Iesu. O le mana’o o Iosefa, o se mea na tupu ane i lona loto, e fia fa’aaogāina lona malosī mo le faia o se nofoaga e taoto ai le tino o Iesu. O se tagata e lototele, e lei alu i se isi tagata, ae na alu sa’o ia Pilato. Peita’i, o le manatua o Iesu i lona maliu, o se la’asaga tatou te iloa ai le alofa na ofo atoa mai ai lona soifua, o se tala o le a manatua pea i o tatou olaga.

O lo tatou lototetele e fa’atino mea lelei, o le ata lena o Iesu ua atagia i o tatou olaga. O lo tatou manatua o Iesu e avea ma so’otaga tāua mo oe ma a’u, ma maua ai lo tatou so’otaga vāvālalata ma ia e fa’avavau. E lē o le taumafai e fai mea lelei ina ua alofa mai le Atua ia te oe ma au. Ae ia faia mea lelei, ina ua tatou talitonu ma le fa’atuatua, na faia e Iesu mea lelei mo lo tatou ola.

Tatalo: Le Alii e, i le filemu o lenei aso, ia avea ai ma taimi tāua e manatua ai oe, ma fa’atāuaina ai la tatou mafutaga, **Amene.**

(2) Faitauga mai ia Luka (*Readings in Luke*)

3 – Eseta mai ia Luka ma Ioane (*Easter in Luke and John*)

Aso Sa o le Eseta (Easter Sunday)

Aso Sa – Aperila 21: “E le o iinei o ia, a ua tu” (*He is not here, he has risen*)

Tusi Faitau – Luka 24:1-12

Matua – f.6: “..E le o iinei o ia, a ua tu, ia outou manatu i lona fetalai atu ia te outou, ina o i Kalilaia o ia...”

O le toe tu manumalo o Iesu, ua suia ai le pogisa o le oti, i le susulu o le malamalama o le ola. Ua suia ai le fa'anoanoa ma le lē mautonu, i le malamalama o le ola fou ma le loto fou, ua talitonu o Iesu ua ia aumai le fa'amoemoe ola e ala i lona toe tu manumalo. O le malamalama o le toe tu ua tatalaina ai le ola le lē mautonu o le tagata, ua tatou iloa ai, soo se mea o i ai tiga, e susulu i ai le malamalama o le Alii e maua ai le fa'amoemoe fou.

O a tiga ma faigata o le ola auuana i le Atua, ia tatou manatua e sulugia i tatou i le malamalama o Keriso toe tu, tatou te maua ai le malosi fou. E le o se toe tu e fou, a o le mea ua uma ona folafola e Iesu ina ia le mataoge ai i manatu e atinae ai le ola fa'atuatua, e i ai le fa'amoemoe fou mo le tagata.

Tatalo: Le Alii e, fa'afetai mo le taulaga sili na e saunia mo le lalolagi, **Amene.**

Earth Day (Aso Fa'amanatu mo le Siosiomaga)

Aso Gafua – Aperila 22: "O fuafuaga a le Atua e pei o le aniani..."

Tusi Faitau – Ioane 20:10-23 (*God's plans are like an onion*)

Matua – ff.18, 19: "Ua alu atu Maria le Makatala, ua faapea atu i le au soo, ua ou iloa atu le Alii, ua ia faailoa atu foi ia te i latou ua fetalai mai e ia o ia mea ia te ia...Na potopoto ai le au soo, ua maliu atu Iesu ua tu i totonu."

O fuafuaga a le Atua pe a fa'aali mai, e mafai ona fa'atusa i le aniani: e lē fa'aalia uma mai i le taimi e tasi, ae 'auaua'i mai i vaega, e pei o le aniani pe a fofoe. I le tala a Ioane, e fa'atelelegese le fa'aali atu o Iesu i ona soo. E o'o foi ia Maria le Makatala, na te lei iloa Iesu i le taimi na fa'aali mai ai. Tele isi taimi na toe fa'aali ai Iesu i ona soo, ae tauluga ia Peteru i le vai o Kalilaia. O le uiga o le manatu, e lei fa'aali atoa Iesu i lona 'au soo i le taimi e tasi, ae na fa'aali 'auaua'i. Aisea? Ina ia mautinoa le 'au soo, e lē na o le fa'aiuga ma taimi e tini ai le fa'amoemoe latou te fetaia'i ai ma Iesu. A o taimi uma lava, a o gāsolo ma galueaiina le faamoemoe, latou te fa'atasi ai ma Iesu. E fa'apena fuafuaga a le Atua. E fa'aali 'auaua'i mai ana fuafuaga manana, ina ia fa'atupu ai le mautinoa i le tagata, e i ai foi lona sao i fuafuaga mamana ia a le Atua.

Tatalo: Le Atua e, fa'amalamalama i ai matou le tāua o au fuafuaga, ina ia matou iloa la matou sao e tatau ona galuea'iina, **Amene.**

Aso Lua – Aperila 23: "Filemu i totonu o feese'eseaiga"

Tusi Faitau – Ioane 20:24-31 (Peace in the midst of conflict)

Matua – f.26b: "A o pupuni faitotoa, ua tu foi o ia i totonu, ma fetalai atu, Ia outou manuia."

E mafai ona toe fa'aupu le fetalaiga lea a Iesu, "Ia ia te outou le filemu." E lei suia e Iesu loto o ē sa tuliloaina le 'au soo ina ia fasiotia. E lei fa'atoilalo foi e Iesu le Mālō o Roma, o loo pule sauā pea ia Iutaia. E lei tatala foi e Iesu le faitotoa o le potu sa potopoto ma lalafi ai le 'au soo. A o lea ua fetalai, 'Ia ia te outou le filemu.' O le filemu fa'ale-lagi lea e fetalai ai Iesu, e le o le filemu ona o le lei o ni feese'eseaiga, a o le filemu e fa'ailoga ai le fa'atasi mai le Atua i taimi tatou te feagai ma feese'eseaiga. O lona uiga, o le fa'aali atu o le Iesu toetu i lona 'au soo ma ofo atu le filemu fa'ale-lagi, o le folafolaina lea o le i ai fa'atasi o le Atua ma i latou.

Tatou te fiu e tineia feese'eseaiga e tulai mai, ona o le natura masani lava lea o le olaga o loo tatou ola ma soifua ai. Ae ia tatou talitonu ma mautinoa, i le totonugalemu o soo se feese'eseaiga, e i ai le filemu fa'ale-lagi o loo finagalo le Atua ia tatou maua.

Tatalo: Fa'afetai le Atua ona o lou filemu. Matou te tatalo foi mo ē ua lē maua se filemu ona o feese'eseaiga o le lalolagi, **Amene.**

Aso Lulu – Aperila 24: "O le agalelei o tagata ese" (The kindness of strangers)

Tusi Faitau – Luka 24:13-29

Matua – f.15: "Ua la fetautalatalaa'i, ma fesue'ai, ona fa'alatalata mai ai lea o Iesu, ua o faatasi ma i la'ua."

O le savaliga i le aai o Emau na tutupu ai mea sili. Ua avea le pogisa o le la va'ai ia Iesu, ma auala e manatua ai e so'o nisi mea e uiga ia te ia. O felafolafoaiga o loo to manatu ai ia Iesu, ma mea na ia faia, e fai ma molimau o lana galuega fa'aola. O Iesu o ia o le Keriso, e tatau ona tigaina o ia, a o lei o'o i lona itu Atua. O lona mamalu ma lona silsiliese, ua fa'aalia i lona toe soifua manumalo. O le tofitofiina o le areto, na talitonu ai so'o nei, o Iesu lea. Auā na o Iesu lava na te faia lenei fa'atinoga, ua iloa ai o ia e tagata faatuatua.

E i ai taimi tatou te malaga ai ma tagata tatou te lē masani ai. O lo tatou malaga ma i latou, o le fa'aaliga lea o le mafuta mai o le Atua, ma tatou ofoina atu mo i latou le agalelei e tausia ai, e pei ona tausia foi i tatou e le Atua. Ua aumai e nei so'o se fa'ataitaiga mo i tatou e ala i le agalelei ma le tausia o isi tagata. O le agalelei i tagata ese, o le fa'ata'ita'iga na amatamea ai Iesu.

Tatalo: Le Tamā e, fesoasoani mai ia pupula o matou mata, ina ia matou iloa ai lou mafuta mai, ma matou agalelei atu ai i isi, **Amene.**

ANZAC Day (Aso Malolo i Niu Sila ma Ausetalia)

Aso Tofi – Aperila 25: "Feagai ma le fefe" (*Facing fear*)

Tusi Faitau – Luka 24:30-34

Matua – f.33a: "*Ua la tutū i luga i lea lava ituaso ua toe foi atu ai i Ieruselema.*"

O le va'ai a nei so'o ia Iesu, na aveeseina ai le popole ma le fefe. Na toe fo'i so'o ma le loto fiafia ina ua mafuta ma Iesu. O le faailoga tāua, e i ai Iesu i so'o se mea. O le 'auai o Iesu fa'atasi ma nei so'o e to'alua, o le fa'amatalaina o le Atua e fa'atasi ma i tatou, aemaise lava i taimi e tu'ufesilisili ai lagona ma manatu o le tagata. Na fa'atoilaloina e Iesu le atuatuvaile ma le fefefe o nei soo ina ua latou mafuta faa'tasi, lea ua fo'i fiafia ai i Ieruselema.

O le mafuta mai o le Alii fa'atasi ma i tatou, na te aumaia ai le talitonu ma le fa'amoemoe i o tatou tagata e fai ma fa'atupu malosi i lo tatou faatuatua. O le Atua e mafai ai ona fa'atoilaloina o tatou popolega. O taimi uma o lo tatou olaga, tatou te lē o malaga na o i tatou, a o le Atua e afio mai e malaga fa'atasi ma le tagata, ina ia ave'ese ai lona loto popole ma le atuatuvaile.

Tatalo: Le Atua e, ana le se anoa lau afio, e le aveesea lo matou fefefe ma le popole, **Amene.**

Aso Faraile – Aperila 26: "E lē fefe e to'ilalo" (*Not afraid to fail*)

Tusi Faitau – Luka 24:45-53

Matua – f.48: "*O molimau foi outou i nei mea...*"

Ina ua filifili e Iesu lona ona 'au so'o, na filifili lava mai i tagata masani. A o ia tagata masani, na latou suia le lalolagi. Ua o'o le fa'a-Kerisiano i tuluiga o le lalolagi ona o le galuega molimau sa faia e tagata masani ia sa filifilia e Iesu e fai ma ona so'o. Peita'i, sa le faigofie le galuega molimau sa feagai ma ia tagata masani.

E fa'apea foi le tulaga o le galuega molimau i nei ona aso. A o'o ina saputu le tele o feau ma galuega e mana'omia ona fa'atino, e fai lea ma lape i le fa'atinoina o le ta galuega molimau ia Iesu ma le tala lelei. E i ai taimi o le a tatou to'ilalo ai ona o le tele o fita ma faigata o le olaga i nei ona aso. Ae e le tatau ona tatou fa'avaivai ai. Auā e leai se molimau e sili ona 'aanoa, nai lo le ta molimau i le mafuaaga o le ta to'ilalo. E fa'apea ona ta feagai ma le ta to'ilalo? E to'ilalo nofonofo, pe to'ilalo e toe tu i luga ma savali ma le atoa? E pei o le autū o lenei aso, 'aua tatou te fefe e to'ilalo, aemaise i la ta galuega molimau ia Iesu ma le tala lelei. E leai se molimau e sili ona 'aanoa, nai lo le tagata ua to'ilalo, ae toe tu i luga e fa'aauau le galuega molimau.

Tatalo: Fa'afetai le Atua, i lou talitonuina oi matou e avea ma molimau mo lou finagalo, **Amene.**

Aso Toonai – Aperila 27: “Toa i le lotoifale” (*Local hero*)

Tusi Faitau – Ioane 21:15-19

Matua – f.16b: “*Fetalai atu Iesu...Ia e leoleo i au mamoe.*”

O le fetalai a Iesu na fai ia Peteru, a o le fetalai na iloilo tupetua ai le mea moni o i le loto o Peteru. O Peteru o le toa o le lotoifale i totonu o le au soo. O le fetalai atu o Iesu i totonu o le lio faale-ausoo, o loo avatu ai se feau lelei mo Peteru. E amata i totonu o le mafutaga fa;a-‘ausoo, le fai o oe ma leoleo mamoe. O le mafai ona fa’amaoopoopoina e Peteru o so’o mo le galuega, ona mafai lea ona tu’uina atu le fa;atuatuaaga ia te ia mo le tala’iga.

O i tatou o toa o o tatou lotoifale. O toa lava lea o aiga, o nu’u, ma ekalesia; tatou te fa’ataunuuna fetalai a Iesu: “Tausi i ana mamoe.” Ia avea i tatou ma fa’ataitaiga lelei mo tagata uma, ma ia mautinoa o le a ola tagata e ala i a tatou fa’ataitaiga lelei. Ia avea lou soifua ma lo’u nei ola, e fai ma leoleo mamoe lelei, ina ia ola ai tagata ma latou iloa le alofa o le Atua.

Tatalo: Le Atua e, fesoasoani mai ina ia avea i matou ma tausii mamoe e avatu fa’ataitaiga lelei i nisi tagata e ola ai, **Amene.**

Musika i le Tusi Paia (*Music in the Bible*)

1 – Pese i le pese fou (*Sing a new song*)

Aso Sa – Aperila 28: “Valaau fa’amalosi e fa’atino” (*Clarion call*)

Tusi Faitau – Iosua 6:1-20

Matua – ff.3-4: “*Ia outou fa’ataamilo i le aai...e ave e faitaulaga e fitu o pu e fitu o le iupeli i luma o le atolaau, o le aso fitu tou te fa’atamilo fa’afitu ai i le aai, e ilia foi pu e le au faitaulaga.*”

O le leo o le pu o le iupeli, e tāua tele i le molimau a le Feagaiga Tuai. E muamua ta’ua lea pu i le Esoto 29, o loo fai ma fa’ailoga i le afio o le Atua i le mauga o Sinai, ma fa’atusaina ai lona si’ufofoga ma lona fa’aali mai.

O le tāua o le pu o le iupeli, o se molimau lautele lea i le tāua o le musika i taimi anamua, e peiseai e i ai se mana o lana feau o loo tala’iina. O le musika o se meaalofa lelei. Na te ‘ausia vaipanoa o le loto e le mafai ona ‘ausia e se isi lava mea. E le gata i lea, e i ai lona mana na te tatalaina ai le loto i mea silisili – le si’ufofoga o le Atua. Peita’i, talu ai lona mana, e ao ina tatou fa’aeteete i le musika. Fa’amata o le si’ufofoga o le Atua, fa’atasi ai ma le leo o pu, na soloia ai lalo pa o Ieriko ? Poo o se taumafaiga lea a le musika e fa’ae le mana o le Atua i luga o mea e faia e tagata?

Tatalo: Faafetai le Atua mo leo o musika. Ia matou iloa lou siufofoga e ala mai i lou Agaga Paia, matou te iloa ai lou alofa ma lau amiotonu, **Amene.**

Aso Gafua – Aperila 29: “Tavita, fa’amafanafana loto”

Tusi Faitau – 1 Samuelu 16:14-23

(David, soother of the soul)

Matua – f.23: “*A oo mai le agaga mai le Atua ia Saulo, ona tago ai lea o Tavita i le kitara, ua ta i lona lima, ona mapu ai lea o Saulo, ua lelei ai o ia, ua alu ese ai le agaga leaga ia te ia.*”

O le gafatia e le musika ona aapa atu i lagona loloto a le tagata, o se tasi nei o ona uiga silisili. E mafai e le musika ona fa’amafanafana le tagata e maua sana mapusaga. E fa’atupu malosi foi ma maua ai le fiafia. E lei faigofie le galuega a Tavita i lona taumafai e fa’amafanafana le loto ita a le Tupu o Saulo i le kitara. Sa lelei lava i le amataga. Ae ina ua loto leaga Saulo ia Tavita ina ua manumalo ia Koliata, sa tupu tele le ita o Saulo ia Tavita ma lana musika

O le sootaga i le va o le musika ma lagona o le tagata, e fai si malosi, toe lavelave, ae toe lililo foi. Ua faamaonia e su’esu’ega a saianisi le avea o le musika e fai ma vai fōfō mo tagata mafatia. To’atele foi ē ua latou fa’aaogāina le musika e fa’agasolo ai lagona ma mafaufauga, aemaise i taimi o faigata. O le musika na te aumaia le fa’atagaga e pai atu ai i o tatou tagata lilo, i se auala e fa’aailogaina ai le ‘auai mai o le Atua o le ola fa’atasi ma i tatou.

Tatalo: Le Atua e, ia tatalaina la’u fa’alogo ina ia ou lagona ai lou si’ufofoga, e aumai ai le ola fou i le auala e te fetalai mai ai, **Amene.**

Aso Sa – Aperila 30: “O gaoiga fa’a-musika” *(A musical catalyst)*

Tusi Faitau – 2 Tupu 3:13-20

Matua – f.15: “*Ua na ta le laau pese, ona i ai lea i ona luga le aao o le Alii.*”

Ua avea le musika e fai ma gaoiga e auala mai ai le Agaga o le Atua i luga o Elisaia. E peiseai o se faitotoa ua tatalaina ina ia tafe mai ai le Agaga o le Atua i se auala e fa’amanaina ai Elia mo lana galuega. O se faatinoga lelei lea e atagia ai, e mafai ona tatou maua le Agaga o le Atua i auala eseese, pe afai tatou te maua le loto fa’atuatua fa’amaoni. O le vavega na faia e Elisaia, na fa’atāuaina ai le taina o le laau pese, ona oo mai ai lea o le aao o le Alii i ona luga – o le faaaliga o le mana silsiliese o le Atua i mea e le o’o i ai le iloa ma le malosi o le tagata.

O le musika e mafai ai ona oo mai le agaga o le Atua ia i tatou. Tatou te va’ai toto’a ai i le mafuta mai o le Atua i lona Agaga, e musuia ma fa’amalosia i tatou. Ia tatou mafuta atu i le musika, e maua ai le malosi e faauaua ai la tatou auaunaga i le Atua ma lona finagalo.

Tatalo: Fa’afetai le Atua ona o le pai mai o lou Agaga e mafuta atu ai i lau afio, e musuia ai i matou e ala i lou mana, **Amene.**

Aso Lulu – Me 1: “Taulaga i le Malumlalu” (*Temple Offering*)

Tusi Faitau – 2 Nofoaiga Tupu 5:2-14

Matua – ff.13b-14: *“Ua latou pepese fa’atasi ma pu, ma sumepalo, ma la’au pese, e vivi’i atu ai i le Ali’i...ona tumu ai lea o le fale i le ao, o le fale lava o le Ali’i. Ua le mafai ai le au faitaulaga ona tutū e auauna ona o le ao, auā na tumu le fale o le Atua i le pupula o le Ali’i.”*

E tele le sao tāua o musika i totonu o tapuaiga i le Atua i aso ua mavae. O le tu’u fa’atasia o manatu tāua ma faitauga o lenei vaiaso, o lo’o aumai ai, o le musika, o ni lagona e ofoina mo nisi, e na te fa’amatalaina ni mafaufauga loloto o se tagata. O le tasi lea o metotia e galuea’iina ai le Agaga o le Atua mo tagata tapua’i, e pei ona molimauina i le malumalu a le tupu o Solomona. O mea fai fa’ailli ma le aufaipese e pei ona aumaia e le tusitala, ua atagia ai le tāua o le sao o le musika mo tapuaiga.

Peita’i, o le saosasoa ma le maoa’e o le atamai tau musika i nei ona aso, o se lu’itau lea ina ia fa’atumau ai pea le sao tāua o le musika i totonu o tapuaiga. Ia tatou talitonu i le fa’aaogāina o tatou taleni e fa’atupuina ai le ola tapua’i i le Atua e ala i musika.

Tatalo: Fa’afetai i le Atua i lana fa’asoa i le musika e fa’atino ai lo tatou ola tapua’i, ina ia maua le agaga tapua’i mo tagata uma, **Amene.**

Aso Tofi – Me 2: “Pepese i taimi uma” (*Singing at all times*)

Tusi Faitau – Galuega 16:25-31

Matua – f.25: *“O le mea lea ua lelei ai iā i matou nei ua fa’apopotoina ma le loto gatasi, e fili’i ma auina atu iā te outou tagata fa’atasi ma o matou uso pele o Panapa ma Paulo.”*

Mai i le tele o faiga fa’amusika e fa’atupu ai le ola fa’aleagaga o tagata, a o le tāua e sili: o le usuina o le pese. Ma o le usuina o le pese, na te fa’ailoa atu ai lagona natia i luga atu nai lo fa’aupuga o le pese. E mafai ai ona tupu le agaga pese e maopopo ai fa’apopotoga. E pei fo’i ona fa’ailoa lagona vivi’i o Paulo ma Sila a’o i ai i le fale puipui, ma sa fa’alogologo ai nisi o pagotata ma tupu ai lagona fiafia e pei ona molimau Luka.

O le usuina o le pese o le fa’aleoina o tatou lagona ina ia leo tele, pei o le Agaga Paia – o le si’ufofoga o le Atua. O le usuina o le pese e fa’ailoa ai lagona ma fa’atupuina lagona fiafia i e o fa’alogologo ai, ma tupu ai lagona ma mafaufauga e ono mafuta fa’atasia ai agaga mo le Atua ma lona finagalo.

Tatalo: Le Atua alofa e, fa’atumauina le loto fesoasoani mo ē o mana’omia le fesoasoani, e pei fo’i ona ou fa’afetai i lau afio ona o lou alofa mai, **Amene.**

Aso Faraile – Me 3: “Eseese sitaili, tasi le Atua” (*Different styles, one God*)

Tusi Faitau – Kolose 3:12-17

Matua – f.16b: “*A o outou pepese fo’i i sālamo, ma pese, ma siva fa’aleagaga, ma le fa’afetai i le Atua i le loto.*”

I leni vaiaso ma lona fa’amamafa, o lo’o taula’i pea i le tāua o pese i le soifua fa’aleagaga ae maise ai i totonu o tapuaiga. Peita’i, o le tāua o pese i totonu i tapuaiga, ua avea ma fete’enaiga. O manatu e fafau mai i luga o suiga o mea faigaluega e fa’atino ai le galuega fa’apese i le 19 seneturi, ma nisi o suiga fou mai le 30-40 tausaga ua mavae. Ma o le fa’amoemoe ma le lu’i mo le fatuina o pese, ina ia ‘aua ne’i avea ma fevaevaea’iga.

E lei se lagona fa’apea o aumaia i le tusi o leni aso, a o le agaga fa’amalosi a le tusitala ina ia tatou talia ma fa’atāua ese’esega o pese i tapuaiga ua i ai nei. Tatou maua le lagona fiafia i mea tāua ua tatou maua. Ae ‘aua ne’i avea ma mea e pogisa ai o tatou tagata ma avea ma mea tatou te fa’amasino ai i le tāua o nei suiga o lo’o talia e nisi. O le agaga lava ia, ‘aua ne’i avea ma popolega tele mo ē o lo’o fiafia ma tapua’i sa’oloto i totonu o tapuaiga.

Tatalo: Fa’afetai le Atua i le tele o pese ma musika ese’ese ua matou maua i totonu o tapuaiga, e fa’alagi ai ou viiiga, **Amene.**

Aso Toonai – Me 4: “Ia ili ia le pū” (*The trumpet shall sound*)

Tusi Faitau – 1 Korinito 15:51-57

Matua – f.52b: “*Auā e ilia lava, e toe tutū mai ē ua oti ma lē ola pea, e liua fo’i i tatou.*”

Ua tatou toe talanoa i le pū, o se tasi o mea faigaluega fa’apese, e fa’atinoaina ai le galuega fa’apese. Pe sa ga’osia mai le u’amea poo se isi lava mea sa masani ai, a o le taua o le pu o lana lea e fa’atusa i le si’ufofoga o le Atua i totonu o le Tusi Paia. O le leo o le pū, o lo’o atagia ai le i’uleo ma le vala’au a le Atua i ē ua feoti ae toe tutū mai le aso o le toe tū.

O le fa’aaogāina e Paulo ma lona fa’atusa o le musika, e fa’amatalaina ai le Atua malosi, e o’o lava fo’i i le ola e toe fa’afoisia e le Atua i le tagata. E pei ona molimau le to’atele, o le pese na te aumaia lagona o le ola i se isi tulaga e maualuga atu.

O le leo o le pū ua fai ma fa’ailoga o le Atua malosi e toe fa’atūina i latou i le ola nei ma le ola i tala atu. O le ola ma le alofa o le Atua e tatau ona tatou fa’atāua ma fa’asoa atu e ala i le musika ma pese tatou te lagiina.

Tatalo: Tatalo mo ē o oti i le agaga, faapea ē ua manatu māma i le ola. Ia leo tele pea le leo o le pū a le Atua i o latou olaga ina ia maua le ola, **Amene.**

Musika i le Tusi Paia (*Music in the Bible*)

2 – Pepese i le Atua (*Sing to the Lord*)

Aso Sa – Me 5: “I le amataga, sa i ai le musika”

Tusi Faitau – Salamo 96:1-13 (*In the beginning, there was music*)

Matua – ff.11-13: “*Ia fiafia le lagi, ia olioli fo’i le lalolagi; ia ta’alili mai le sami ma mea ua tumu ai; ia fiafia lava le lauele’ele ma mea uma o i ai; ona alalaga fiafia ai lea o la’au uma o i le vao matua, i luma o le Ali’i...*”

O le lalolagi ma ona manatunatuga fa’amusika, e fausia mai i le aganu’u o anamua. O le talitonuga mai i aso ua mavae, sa fai le musika ma so’otaga o mafauauga e taula’i ai mea uma – o le fa’aleagaga, fa’apea talitonuga fa’avae. I le Salāmo 96, o loo atagia ai le pese vivi’i a le faisalāmo i mea uma sa faia e le Atua, e fa’atupuina ai o tatou lagona ina ia o tatou fa’alogologo i pese e le o patino i se mea e tasi, ae taula’i i le vivi’i o le foafoaga mo mea uma. E tatau ona malamalama le tagata i lana so’otaga ma le foafoaga, auā o tatou o tausii mea a le Atua. E tasi i tatou ma le lalolagi ma mea uma na faia e le Atua, ma o lagona ia o loo fa’aleo i le Salamo 96. I lenei vaiaso, o le a fa’alautele lo tatou so’otaga i le va o pese e usuina, ma mea uma na faia e le Atua.

Tatalo: Tatala la matou fa’alogo ma o matou loto i lou si’ufofoga. Fesoasoani mai ina ia tasi i matou ma le lalolagi ma lou foafoaga, **Amene.**

Aso Gafua – Me 6: “O le mānava o le Atua la matou pese”

Tusi Faitau – Salamo 150:1-6 (*God’s breath is our song*)

Matua – ff.1-6: (*se vaega*) “*...Ia outou vivi’i atu i le Atua i lona malumalu; ia outou vivi’i atu ia te ia i le va nimonimo o i ai lona malosi. Ia outou vivi’i atu ia te ia i le topa ma le siva...Ia vivi’i atu i le Ali’i o mea uma lava e mānava...*”

O le Salamo 150 o loo vala’aulia ai i tatou e fa’alogo i se pese mālie e mafai ona tatou tala’iina. E tusa pe le o oe o se tagata musika, e mafai ona e malamalama i le fa’amoemoe ma fa’atonuga tāua o loo aumaia e vivi’i atu ai i le maoa’e silisili o galuega a le Atua. E mafai ona lagi i totonu o malumalu poo se isi paganoa paia e maua ai leo ese’ese o le foafoaga ma lanu ese’ese e malie ai le pese.

O le mānava ua tu’uina e le Atua i le tagata, e mafai ona lagi ai pese. O le manava ola e mafai ai ona tatou pese ai ma le fiafia. A o le mānava foi e fatu ai o tatou lagona i se pese e vi’ia ai le Atua ma lona silisili ese. O le Agaga o le Atua na te mānavaina lagona tatou te pepese ma vi’ia ai ia te ia.

Tatalo: Le Atua e, se’i mānavaina e lau afio le mānava ola i o matou tagata, matou te lagi ai pese e vi’ia ai lau afio e fa’avavau, **Amene.**

Aso Lua – Me 7: “O le pese o le sami” (*The song of the sea*)

Tusi Faitau – Esoto 15:1-12

Matua – ff.8, 10: “*O le savili fo’i mai lou fofoga na faupu’e ai le sami; na tula’i ona tafe pei o se mea mauti’eti’e, na to’a le moana i totonu lava o le sami. Na e fa’aagi mai lou matagi, ona ufitia ai lea o i latou i le sami...*”

Ua tatou feagai pea ma vaiatau o le fetaua’i ma le faitaga’i i nei ona aso, ua le mautonu ai mo se lumana’i lelei. E tulai mai ai le fesili, “O fea tatou te maua ai se to’afilemu moni?” E fesiliga ai upu o loo aumai e le matua o lenei aso, “Poo le Atua ea e taui ma sui, poo le Atua ua fa’ailoa ma fa’amanatu mai le ofo’ofogia ma le mamalu o ana galuega mo lona nu’u?”

O upu ua fai ma matua o lenei aso e mafai ona fa’amatalaina o le pese e taula’i i le loloto o le alofa mutimutivale o le Atua, e fai ma nofoaga o le ola fa’amagalo ma le manatu e fa’agalalo. E mafai ona tatou nonofo filemu i le lalolagi vevesi ina ua tatou tausi i le filemu ma saili i le mea sa’o i le Atua. Ona tatou lafo lea o tatou leaga i le loloto o le sami, ma fa’afeiloa’i atu i le tunoa ma le loloto o le alofa o le Atua.

Tatalo: Le Atua o le alofa ma le alofa mutimutivale, alofa ma fa’amamāina o matou loto ma manatu mai mea e faiaina ai i matou, **Amene.**

Aso Lulu – Me 8: “O le pese a Hana” (*Hannah’s song*)

Tusi Faitau – 1 Samuelu 2:1-10

Matua – ff.3-4: “*Soia tou te fa’atele a outou upu fa’amauialuga nāua, e alu a’e ai le fa’aono’ono i o outou gutu; āua o le Ali’i, o le Atua sisila mai o ia, o ia fo’i le na te fuatia amio...*”

So’o se taimi e fa’apopoleina ai tatou i ni fa’afitauli, tatou te naunau e saili se fofo e fo’ia ai. Peita’i, e le faigofie le sailiga o se fofo sa’o mo fa’afitauli e tutupu mai. Tatou te fa’alagolago ai i le Atua na te aumaia le fofo sa’o o fa’afitauli e feagai ma i tatou.

E pei o Hana, na valaau atu i le Atua, ona aumaia lea e le Atua le fofo sa’o o lana fa’afitauli, e ala i le potu ma le malosi e foa’i mai e tete’e atu ai i soo se fa’afitauli o le soifaga e tulai mai. I totonu o tiga ma mafatiaga e feagai ma i tatou, e mafai ona manino ai la tatou va’ai i le Atua o lo’o galue pea e aumaia le malosi ma le lototele tatou te fesāga’i ai ma faafitauli o le olaga. O le pese a Hana e a’oa’oina ai i tatou i le auala e mafai ona avea ai a tatou pese e vivii ai le Atua e ui i faafitauli o le soifuaga o loo tatou feagai ai.

Tatalo: Le Atua o le faamoemoe ola, ia e puipui mai lo’u loto mai le fa’amauialuga, ma fesoasoani mai ina ia ou galue mo le manuia o isi, **Amene.**

Aso Tofi – Me 10: “O le vaieli o le fa’aolataga” (*The wells of salvation*)

Tusi Faitau – Isaia 12:1-6

Matua – ff.3-4, 5b: “*Tou te utu vai ma le olioli i vaipuna o le fa’aolataga. O lea asō fō’i tou te fa’apea atu ai, ia outou vivi’i atu i le Ali’i, inā vala’au atu ia i lona suafa...Inā fa’ailoa atu ia o lea mea i le lalolagi uma.*”

O le utiuti o le suavai taumafa, o le isi lea faafitauli o loo feagai ma le tele o atunuu o le lalolagi, aemaise atunuu e tele ai le mativa ma le lē tagolima. E fa’alagolago le tele o ia atunuu i vaieli e eli i le manava o le eleele. Peita’i, o le seleni e manaomia e fa’agaioi ai masini tetele e elia ia vaieli, a o le seleni e lē gafatia e nai atunuu matitiva ma lē tagolima.

Maumau pe ana mafai ona pepese ia atunuu matitiva i le pese sa lagiina e Isaraelu i le tōafa: “Le vaieli e, ina e puna a’e ia – ia outou pese atu ai!”

(Num21:17) O se va’aiga mata’utia sa molimauiina e Isaraelu ina ua puna a’e le suavai mai i le tōafa! Ae pei ona molimau le perofeta o Isaia, e le na’o le suavai taumafa e tatau ona galala ai le tagata, a o le vai mai le Atua e puna e o’o i le faavavau. O le vaieli o le fa’aolataga e mai i le Atua lea, e fa’aolaina ai tagata uma. O le vai e avanoa mo soo se tasi – o Iesu lava lea o le vaiola!

Tatalo: Tatalo mo atunu’u o loo utitui ai le suavai taumafa. Ia tafe atu ai le vaiola mai lau afio e fa’amalolo ai le lalolagi galala, **Amene.**

Aso Faraile – Me 10: “O le pese ia Iesu” (*A hymn to Jesus*)

Tusi Faitau – Kolose 1:15-20

Matua – ff.19-20: “*Auā ua finagalo le Atua ia mau i totonu ia te ia le tumu atoatoa, ina ia fa’aleleia e ia o mea uma lava ma ia, ina ia lelei i le toto o lona satauro, o mea i le lalolagi atoa ma mea o i le lagi.*”

O le faitauga o lenei aso o loo manino ai le tulaga o mea sa māvaevae mai i le tasi i le isi, ae ua toe fa’aleleia ma fa’aatoatoa e Keriso – o ia e lelei ai mea uma ma tagata uma. Atonu o se tasi nei o auala e mafai ona malamalama ai le ‘tumu atoatoa o le Atua’, ina ua maua le tasi o mea uma, e ui i tulaga ua latou eseese ai. Tatou te mana’omia le mea moni ina ia mafai ona ausia ai le loto gatasi. E i ai pea le avanoa i le atoatoa o le Atua, ma o le matagofie lea o le fa’aleleiga. E tusa lava pe foliga mai e le o atagia se fa’aleleiga ona o mea e tutupu i le soifuaga, ae galue le Atua i totonu o mea e tutupu ina ia maua ai le leleiga. O i tatou o le a ala mai ai, ina ua fusia i tatou e le Atua faatasi ma lana foafoaga. Ua vala’auina i tatou e avea ma suiga mo le fa’aleleiga i taimi fa’apenei, ina ua i ai Keriso i mea uma.

Tatalo: Le Atua e, fesoasoani mai ina ia o matou maua pea avanoa e faia ai le faaleleiga, ma fofola atu ai o matou loto i lau foafoaga, **Amene.**

Aso Toonai – Me 11: “O leoleo o tatou agaga” (*The guardians of our souls*)

Tusi Faitau – 1 Peteru 2:21-25

Matua – ff.24b-25: “*Ina ia tete’a i tatou ma le agasala, tatou te nofo ai i le amiotonu, o ona fa’alavalava ua malolo ai tatou. Āua o outou sa fa’apei o mamoe na sē, a o lenei ua toe liliu mai outou i Lē na te leoleoina ma tausia o outou agaga.*”

O le faitauga o lenei aso o loo talanoa manino mai i le fa’amalologa ma le saogalemu. O le Atua lava ia o le leoleo mamoe sili, na te leoleo, fa’asao, puipui, ma tausia o tatou agaga. A o le fesili, “O mana’omia ea se leoleo mo o tatou agaga?” “Fa’amata e le mafai lava e tatou ona fa’atino lenei galuega?” E fa’amata faigofie, a o le upu moni lava, e tele mea o lenei olaga e fai ma fa’aleaga mea i o tatou agaga. O le Atua lava ia o lo tatou leoleo, na te puipui ma fa’asao o tatou agaga. E le tu’ulafoaiina i tatou e le Atua i le fememea’i ma le ola lē mautonu. E leoleo e le Atua le feagaiga na osia i lo tatou va ma Keriso. E tausia i tatou i lona saogalemu, e le afea fo’i i tatou i le fa’avaivai.

Tatalo: O le Atua le leoleo mo o matou agaga, alofa ma aumai i matou i le saogalemū o lau afio. Fa’amalolo ma tausi mai i matou i lou alofa, **Amene.**

Faitauga mai ia Tanielu (*Readings in Daniel*)

1 – O Tala Mata’utia (*Dramatic stories*)

Aso Sa o Tinā

Aso Sa – Me 12: “Tupulaga fa’atāfea” (*Exiled Youths*)

Tusi Faitau – Tanielu 1:1-20

Matua – f.8: “*A ua manatu Tanielu, o le a leaga o ia i mea taumafa a le tupu, po o le uaina e inu ai o ia; ona aioi atu ai lea o ia i le Ali’i e pule i enuka ina ia le leaga ai o ia.*”

O le tusi o Tanielu o loo aumaia ai se tala e talafeagai ma o tatou taimi. O le tala i le ola fa’atāfeaina, aemaise le filifiliga e faia i le va o mea tuai sa masani ai, ma mea fou o le a soifua ai nei. E tete’e pe ‘auai i le olaga fou? Fa’aaogā igoa fou poo igoa tuai? Talia mea ‘ai fou poo mea ‘ai sa masani ai?

I le nofo ai o Tanielu ma ana uo i le tafeaga, sa latou taliaina le olaga fou. Ua tu’ua foi o latou igoa Eperu, ae talia igoa fou fa’a-Papelonia. Ae o’o mai i mea ‘ai, tete’e loa. Aisea? Masalo o se taumafaiga lea a le tusitala e fa’ailoa mai lana feau: e le o mea fou uma e tatau ona talia e le tagata. E i ai foi mea sa masani ai – o mea e iloa ai le Atua – e tatau ona tausia pea ma ola ai.

Tatalo: Le Atua o filifiliga lelei e, fa’asino mai e lau afio i o matou loto ina ia matou iloa ona filifili i le mea moni ma le mea sa’o, **Amene.**

Aso Gafua – Me 13: “O le fa’atusa auro” (*Golden image*)

Tusi Faitau – Tanielu 3:1-18

Matua – f.17: *“...afai o lea, ua mafai lo matou Atua, matou te auauna i ai, ona lavea’i mai ia te i matou ai le ōgāumu e mu ai le afi, na te laveaina mai lava i matou ai lau pule le tupu.”*

E le o ta’ua le igoa o Tanielu i le mataupu e 3, na’o ana uo o Sataraka, Mesako ma Apeteniko. Ua fausia e Nepukanesa le fa’atagata e tapuai uma ai tagata o le mālō. E le o manino poo ai le fa’atusa o lenei fa’atagata, poo se atua o Papelonia poo se fa’atusa o le tupu. Ae ui i lea, o loo manino i le tala le fa’amamafa atoa o le mataupu e 3: o le ola tapuai o tagata.

O le feau o loo aumaia i le tala, e faatatau lea i le ‘au kerisiano e feagai ma sauāga ma fa’afitauli ona o le loto mau i le Atua. O le mautinoa i le ‘auai fa’atasi mai o le Atua i taimi faigata, e mafai ai ona tete’e atu i so’o se tulaga lava e le talafeagai ma a tatou talitonuga. ‘Aua tatou te ola masalosalo i le alofa o le Atua, a ia tatou ola mautinoa i lana galuega lavea’i mo tagata uma.

Tatalo: Tatalo mo kerisiano sauāina i le lalolagi, ina ia ‘aua nei masalosalo o latou manatu i lau afio ma lou fa’aali mai, aemaise o lou alofa, **Amene.**

Aso Lua – Me 14: “Laveaiina mai le ōgāumu” (*Delivery from the furnace*)

Tusi Faitau – Tanielu 3:19-30

Matua – f.28b: *“Ua liliuina fo’i le upu a le tupu, ma ua latou tu’uina atu o latou tino ina ne’i latou auauna ma ifo i se tasi atua, tau lava o latou lava Atua.”*

O le va’aiga fa’a-kerisiano i le faitauga o lenei aso, e autū i le tagata lona fa sa i ai fa’atasi ma Sataraka, Mesako ma Apeteniko ina ua lafoina i latou i le ōgāumu (ff.24-25). Molimau le tala, na’o le to’atolu sa fusifusia ma lafo i le ōgāumu; ona va’ai lea o le isi tasi ua to’a-fa ai, o fealua’i i totonu o le ōgāumu e aunoa ma se manu’a. Faimai o le tagata lona fa lea ‘e peiseai o se atua.’ E le o ta’ua i totonu o le tala po o ai lenei tagata. E masalosalo Nepukanesa o se agelu (f.28).

E fa’amautiina lea va’aiga i le mataupu e 6 i le tusi lava o Tanielu, ina ua lafo Tanielu i le lua o leona, lea na molimau ai, “na auina mai e lo’u Atua lana agelu ma punitia gutu o leona.” E manatua ai le molimau a Mataio (1:23) i lona fa’aigoaina o Iesu, o Emanuelu – ua ia te i tatou le Atua. O le molimau lea a tagata kerisiano uma ina ua fetaiia’i ma puapuaga ma faigata. Ua latou lagona le fa’atasi mai o le Atua e ala ia Iesu Keriso, i taimi uma e mafatia ai.

Tatalo: Le Atua alofa e, tatalo mo i latou o loo mafatia i so’o se auala ina ia alofa ma fesoasoani lou Agaga mo i latou uma, **Amene.**

Aso Lulu – Me 15: “O le miti a Nepukanesa” (*Nebuchadnezzar’s dream*)

Tusi Faitau – Tanielu 4:1-18

Matua – f.5: “*Na fai la’u miti na ou fefe ai, o o’u manatunatu fo’i i lo’u moega atoa ma mea na ou va’aia sa ou atuatuvaie ai.*”

O le autū o le mataupu e 4 o le tusi o Tanielu, o le pule aoao o le Atua i mea uma. O se feau fa’amanatu lea mo le ‘au Iutaia o le 3 senituri TLM sa pulea e mālō fa’apaupau. E faigofie i le fa’alogo, ae faigata lava ona talia pe a nonofo ma va’ava’ai atu i le pule sauā o mālō fa’apapau o loo ola ma soifua ai i le taimi nei.

E tulaga ese foi le tusi o Tanielu ona o loo tali mai ai le fesili pe fa’apefea ona tali atu le ‘au fa’atuatua i puleaga a faigāmālō e pule sauā ma le amiotonu. E tete’e i ai pe tausisia? Taoto ia le manatu pe aisea e fa’ataga ai e le Atua puleaga faapenei. A o le tusi o Tanielu, o loo a’oa’o mai i le ō fa’atasi o le ola tete’e ma le ola tausisi i puleaga fa’apenei. Tausisi i mea e talafeagai ma le ola fa’atuatua i le Atua. Ae tete’e atu i mea e le talafeagai.

Tatalo: Tatalo ina ia tatou iloa ona ola fa’amaoni i le Atua, e ala i le tete’e atu i faiga ma amioga lē talafeagai, **Amene.**

Aso Tofi – Me 16: “Ai e Nepukanesa le mutia” (*Nebuchadnessar eats grass*)

Tusi Faitau – Tanielu 4:19-37

Matua – f.37: “*O lenei, o a’u o Nepukanesa ou te fa’amanū atu, ma vivi’i atu, ma fa’ane’ene’e atu i le tupu o le lagi...na te mafaia fo’i ona fa’amaulaloina e o savavali ma le fa’amaualuga.*”

E lē fesiligia le fefe o Tanielu i le galuega lea ua tu’u atu e le Atua ia te ia: o le fa’aleo o se feau e sili ona faigata, i le ta’ita’i o le faigāmālō e sili ona malosi, ma lona soifua ua sili ai ona lamatia. O ii tonu o loo galue ai Tanielu fa’a-perofeta o le Atua, ma ua momoli ai le feau faigata i se auala e sili ona manino, ma faigofie ai ona lagona e Nepukanesa lona sa’o ai, ma talia ai.

O le va’aiga mulimuli lea o Nepukanesa i totonu o le tusi o Tanielu. O upu mulimuli a le Tupu o loo fai ma matua o lenei aso, o loo atagia ai le tagata ua fa’amaulaloina ma ua lagona le faatauvaa. O le ta’ita’i o le faigāmālō sa sili ona malosi i lona vaiata, a o lea ua lagona lona itiiti ma lona faatauvaa, pe a fa’atusa i le Tupu o le lagi, o le Atua lea, “*na te mafaia ona fa’amaulaloina e o savavali ma le fa’amaualuga.*” Ana fa’apea le lagona o le tele o ta’ita’i o faigāmālō i nei ona aso, se manu ua tatou nonofo nei i se lalolagi e sili ona filemu ma saogalemu.

Tatalo: Le Ali’i e, ia matou maua le loto tele e auuuna ma fa’atino ai lou finagalo, ina ia mafai ona liua loto a ou tagata, **Amene.**

Aso Faraile – Me 17: “Tusitusiga a le Agaga” (*Ghostly writing*)

Tusi Faitau – Tanielu 5:1-9, 17-30

Matua – f.23b: *“Ua e vivi’i atu fo’i i atua ario, ma auro, ma ‘apa memea, ma u’amea.... e le va’ai i latou, e le lagona, e le iloa ni mea; a o le Atua ua i lona a’ao lou mānava, ua ia te ia fo’i ou ala uma, e te lei vivi’i atu i ai.”*

Ua mavae atu Nepukanesa, ae fa’ailoa mai ai Pelesara, lona sui, i le mataupu e 5. O loo tautalagia i lenei mataupu o mea pa’ia sa i le malumalu i Ierusalem, lea sa aveeseina e Nepukanesa ina ua fa’atafunaina le malumalu.

O miti ma fa’aaliga, o ‘auala iloga ia e fesootai mai ai le Atua i le tagata, i totonu o le tusi o Tanielu. A o le mataupu e 5 ma le tusitusiga i luga o puipui o le maota o le tupu, e tulaga ese lea. Sa fa’atino lava e Tanielu lana galuega fa’aperofeta i le faamatalaina o lenei tusitusiga. E ese mai i le mataupu e 4 sa tautala ai le perofeta e pei o se tasi o fai upufai o le mālō. A o le mataupu e 5, ua tautala Tanielu e pei o se tasi o le ‘au perofeta Eperu mai anamua, e autū i le fa’amasinoga a le Atua o le a o’o mai. E ui na nonofo i nu’u ese, ae manaomia pea ni tagata fa’atuatua e tautala i le fa’amasinoga a le Atua.

Tatalo: Le Atua alofa e, fa’aali mai ia i matou lou finagalo ina ia matou iloa ona ola ma galulue i le lalolagi e tusa ma au fa’aaliga mamana, **Amene.**

Aso Toonai – Me 18: “Tanielu i le lua o leona”(*Daniel in the lions’ den*)

Tusi Faitau – Tanielu 6:1-24

Matua – f.23b: *“ Ona aveina a’e ai lea o Tanielu ai le lua, ua le afaina lava o ia, āua na ia fa’atuatua i lona Atua.”*

I le mataupu e 6, ua tolu ai nei tupu o Papelonia talu ona nofoia, ma ua lona tolu nei le maualuga o le tulaga o Tanielu i totonu o le faigāmālō. Peita’i, ua feagai nei Tanielu ma fa’afitauli ina ua to’atele le ‘au lotovale ma le ‘au tau fa’aleaga, ua latou fa’atupuina ni mea ua fa’amalosi ai Tanielu e filifili poo fea e sili ia te ia: O lona tofi tulaga tolu i le mālō, po o lona fa’atuatua? O lona Tupu, po o lona Atua?

Atonu tatou te lagona foi le faigata o nei fesili, auā e fetaia’i pea ma i tatou i taimi uma. O le filifiliga i le va o mea e va’aia, ma mea e le va’aia – o le manuia fa’ale-lalolagi, po o le manuia fa’ale-lagi. E le faigofie. Ae o le tala i le fa’amaoni ma le fa’atuatua o Tanielu i lona Atua, na mafai ai ona fa’asao mai le lua o leona. Ia tatou filifili e usita’i i le Atua nai lo le pule fa’aletagata, ona tatou selesele lea o le manuia mai le Atua e pei ona molimauina e Tanielu.

Tatalo: Le Atua e, ia matou mafaufau loloto i le tāua o le tatalo mo i matou uma, aemaise le tāua o le ola pe a o’o ina lamatia, **Amene.**

Faitauga mai ia Tanielu (*Readings from Daniel*)

2 – O Fa‘aaliga Mata‘utia (*Dramatic Visions*)

Aso Sa – Me 19: “O le Mana o le Atua i totonu o le lalolagi amioleaga”

Tusi Faitau – Tanielu 7:1-18 (*God’s power in a wicked world*)

Matua – f.9: “*Na ou va’ava’ai ina seia tu’u mai o nofoali’i, ua ti’eti’e mai fo’i lē ua anamuā ona aso, ua sinasina ona ofu e pei o le kiona, ma ona lauao e pei o le fulufulu mamoe e lelei; o lona nofoāli’i o le afi mumū ia...*”

O le faitauga o lenei aso, e pei o isi vaega o le tusi o Tanielu, e i lalo o le vaega o tusitusiga ua ta’ua, o ‘fa’a-apokalifa’. O ia tusitusiga o loo fa’aaoga ai le gagana fa’a-fa’atusa e fa’amatala ai se mea moni ua tupu, fa’atasi ai ma mea o le a tutupu i le lumana’i. E felanulanua’i ma mata’utia ata e fa’aaogaina i le gagana lea, ina ia fa’atupu ai lagona o le fefe ma le atuatuvaile i le tagata faitau.

O loo fa’amatala i le gagana fa’a-apokalifa le amioleaga o le lalolagi o loo i ai, aemaise le pule sauā o faigāmālō sa i ai, ua fa’atusa e Tanielu i ‘manu e fa’. E le lelei ata o loo fa’aaogaina e fa’amatala ai faigāmālō ia. A o tua atu o ia ata tau fa’afefe, o loo i ai foi ma le ata o le Atua ua nofoia lona nofoalii i le mana, malosi ma le mamalu. O lana pule e anamuā, ma ua tu’uina atu i se tasi e pei o le ‘atali’i o le tagata’, na te maua le mālō e fa’avavau.

Tatalo: Le Atua e, fesoasoai mai mo i matou ina ia o matou iloa ona fa’alagolago i lou alofa fa’amaoni, **Amene.**

Aso Gafua – Me 20: “O le a i’u tofotofoga” (*Trials will have an end*)

Tusi Faitau – Tanielu 8:1-14

Matua – f.13: “*Seia afea ea le fa’aaliga i la le taulaga e fai i aso fai so’o, ma le agasala e fa’atafuna ai, ona tu’uina atu lea o le malumalu atoa ma ‘au ia solia lava?’*”

O lenei fa’aaliga fa’a-apokalifa o se a’oa’oga i le tala fa’asolopito a Iutaia, a’o se a’oa’oga e le na’o mo le tuana’i. Ina ua maliu Alesana le Sili (gau le nifo), sa vae-fa lona mālō (nifo e fa) i lalo o le puleaga o ana ta’ita’i ‘au e to’a fa. O Anetioka Epifano sa ia pule sauā ia Iutaia i lea vaitau. O lana mea mata’utia sa fai, ua ‘aumai le mea tuaolo e osi ai le taulaga i totonu o le malumalu, ua ta’ua e le matua o lenei aso, “*le agasala e fa’atafuna ai.*”

Sa matua tigaina Iutaia i lalo o le puleaga a Epifano, ma o le fesili a Tanielu, poo afea e i’u ai. A o le tali a le Atua, ia fa’atuatua. Poo le a le tulaga faigata o mea e tutupu mai, ia fa’atuatua, e i ai le i’uga o tofotofoga.

Tatalo: Ia fesoasoani le Agaga o lau afio ina ia mafai ona matou iloa mai le tuana’i, ina ia faigofie ai le lumana’i mo i matou. **Amene.**

Aso Lua – Me 21: “Fa’amalosi e tausisi” (*Pressure to conform*)

Tusi Faitau – Tanielu 8:15-27

Matua – f.25: *“O lona fa’autauta fo’i na te fa’amanuia ai ana sauniga pepelo, e fa’asilisili o ia i lona loto, na te fa’aumatia fo’i tagata o to’atele, a o maninoa, e tula’i atu fo’i o ia i le Ali’i o ali’i...”*

O le fa’amatalaga e Kaperielu i le uiga o le miti, o le autū lea mo le ‘au faitau a Tanielu ina ia malamalama ai i mea o tutupu i o latou taimi. A o le a se feau a Kaperielu mo i tatou i la tatou vaitaimi?

E mafai ona fa’apea, e lua ni uiga o loo aumai i tusitusiga fa’a-apokilifa, e pei o le tusi o Tanielu. E tautala i mea moni sa tutupu i le tuana’i, a o lona uiga e fa’atautu i mea e tutupu i aso fai soo. E tele atunuu i nei ona aso, e o’o foi i tagata, e amio pei o manu fe’ai ia o loo fa’amatala e Tanielu. O le tupu saua *“na te fa’amanuia i ana sauniga pepelo”* e maua foi i o tatou vaitaimi, e pei o le manatu fa’aitua’u, o le mata pe’ape’a, poo le fa’amalosi e tausisi i amioga lē taupulea o isi tagata. O le agasala tele a Epifano, o lona taumafai e fa’amalosi tagata Iutaia e tausisi i faiga masani o le olaga. O le mana’o foi lea a le to’atele mo tagata Kerisiano.

Tatalo: Le Atua e, ia fesoasoani mai lau afio ina ia o matou manatua lo matou fa’asinomaga e ala i lou alofa tunoa, **Amene.**

Aso Lulu – Me 22: “Tatalo fa’amaulalo mo le alofa mutimutivale” Tusi Faitau – Tanielu 9:1-19 (*A humble prayer for mercy*)

Matua – ff.18b-19: *“Auā matou le avatu lo matou aioi i ou luma ona o a matou amiotonu, a o lou alofa tele. Le Ali’i e, ia e fa’afofoga mai. Le Ali’i e, ia e fa’amagalo mai. Le Ali’i e, ia e fasagasaga mai...ona o lau afio lava, lo’u Atua e, auā ua igoa i lou suafa lou aai ma lou nu’u.”*

O le tatalo lea a Tanielu e tali atu ai i le fa’alumaina o lona nu’u, ua fai ma fa’ata’ita’iga o ni mafauauga e uiga i le loloto o le fa’atuatua. Ua manino lana va’ai e uiga i le sesē o ona tagata, atoa ai ma ia. E fa’apea fo’i i o tatou taimi, ina ua galo le Atua e mālō ma atunu’u, o iina e tutupu mai ai fa’aletonu.

O le molimau a Tanielu i le fa’atafunaga o Iutaia, o le ata manino lea o le taunu’uga o agasala a tagata. Ma ua tupu ai ni manatu i tagata e uiga i lenei mataupu e fa’apea, ua fa’asalaina i latou e le Atua e pei ona faia ia Isaraelu. A’o le tatalo a Tanielu, e fa’amanatu i le Atua lona alofa mutimutivale i le tuana’i. Na ia ‘aioi i le Atua mo le fa’aleleiga ma le fa’amagaloina o le nu’u. Tatalo Tanielu fa’aositalaga, ina ia iloa e lona nu’u ona tatalo mo i latou lava.

Tatalo: Le Atua, ona o lau afio e alofa ma alofa mutimutivale, ua mafua ai ona ou tatalo mo le fa’amagaloina o a’u agasala, **Amene.**

Aso Tofi – Me 23: “O upu fa’amalosi fa’ale-lagi”

Tusi Faitau – Tanielu 10:1-21 (A word of heavenly encouragement)

Matua – ff.18-19: “*Ona toe pa’i mai lea ia te a’u o le tasi ua pei se tagata, ua ia fa’amalosi mai ia te a’u. Ua fa’apea mai o ia, o oe o le tagata ua alofa teleina, ‘aua e te fefe, ia e manuia, ia e fa’amalosi, ia e fa’amalosi lava. Ua mavae mai lana fetalaiga ia te a’u, ona ou malosi ai lea...*”

E le fa’apea o atagia se loto popole ia Tanielu, ae ua matuā fa’aletonu ona lagona ona o le tulaga ua i ai ona tagata. Ua iloa e Tanielu se fa’aaliga, o loo aumaia ai se va’aiga fou e ese mai nai lo le mea o loo tupu. E ui i le tele o isi va’aiga eseese ua fai pea ma lape, a o lenei fa’aaliga, ua va’aia ai se itu fa’ale-agaga i tua atu o ia mea uma.

O le autū o lenei faitauga, o le tulaga ese o le mea moni o loo tupu. ‘O le tasi ua pei se tagata’, e fa’ataua lea i le taua fa’ale-agaga ua o’o mai. E le o silafia e le nu’u le telē o le tauiviga o loo feagai mai i latou. E tele foi fetaua’iga o loo tutupu i lugā i le lagi, e le o silafia i lalo i le lalolagi. Ae ui i lea, o le upu fa’amalosi na maua e Tanielu mai i le lagi: taga’i i Lē o lo o tau mo outou – o le Atua malosi! E ui na fa’aletonu le soifuaga le taimi nei i lalo i le lalolagi, a o lona mana silisili ese, e pei ona fa’aalia i lugā i le lagi, na te le iloa ai se toilalo ma se faia’ina. ‘Aua laia tatou te popole.

Tatalo: Le Atua e, fesoasoani mai ia te a’u ina ia ou manatua mea moni. ‘Aua ne’i o’u fefe i le malosi o le fili, āua o au agelu o lo’o tau mo a’u, **Amene.**

Aso Faraile – Me 24: “A’au e tete’e i le tatafe” (Swimming against the tide)

Tusi Faitau – Tanielu 11:21-35

Matua – ff.33-34: “*O ē ua popoto i le nu’u latou te a’oa’oina atu i tagata e to’atele; a o aso e tele e pāu’u ai i latou i le pelu ma le afi, ma le tafeaga, ma le veteina. A pāu’u fo’i i latou, latou te maua se fesoasoani, o se fesoasoani iti’iti; a e to’atele e pipi’i atu ia te i latou ma fa’aole’olega.*”

E le galo le tele o mea leaga se faia e Anetioka Epifano i le nu’u o le Atua, aemaise lona taumafaiga e fa’amalosi tagata Iutaia e tausisi i lana puleaga. E le o Iutaia uma na latou tete’e ia Epifano. E i ai i latou sa tausisi, aemaise le ‘au popoto o le nu’u. O tagata atamamai ia. O ta’ita’i o tapuaiga ma le mālō. Afai ua tausisi i latou, fa’amata e lē tosina atu foi ma tagata lautele?

O i tatou e faia le filifiliga e mulimuli ia Iesu ma faia le mea sa’o, ‘aua tatou te fa’ata’ita’i fua i isi tagata. E tatau ona tatou manino lelei i mea ua talitonu ai, ma Le ua tatou mulimuli ai. E le faigofie le ‘aau e tete’e i le tafe.

Tatalo: Le Atua e, fesoasoani mai ina ia matou tu mo le mea sa’o. Fesoasoani mai ia matou iloa le ese’esega o le mea moni ma mea taufa’asesē, **Amene.**

Aso Toonai – Me 25: “Folafolaga o le Toetu” (*The promise of resurrection*)

Tusi Faitau – Tanielu 12:2-3

Matua – ff.2-3: “*E to’atele fo’i o e momoe i le efuefu o le ele’ele latou te ala mai, o isi i le ola e fa’avavau, a o isi i le fa’alumaina ma le inosia e fa’avavau. O ē popoto fo’i, e fepulafi i latou fa’apei o le pupula o le lagi, o i latou fo’i ua fa’aliliu ai tagata e to’atele ia amiotonu, e pei o fetu i latou e fa’avavau....”*

O le faitauga o lenei aso, o le taimi muamua lea i le Feagaiga Tuai atoa o loo manino mai ai le talitonuga i le toetu. O se talitonuga e mana’omia tele pe afai tatou te fa’atuatua i se Atua e lelei, auā e to’atele tagata ua maliliu e aunoa ma se fa’amasinoga tonu ua latou maua.

I le mataupu mulimuli lenei o le tusi o Tanielu, e ui o loo taualuga i le olioli ma le fa’amoemoe, ae o loo manino lava mea faigata e ao ona mua’i tauivi ai le fanau o le Atua. E tutupu pea mea e mafatia ai. E tutupu pea aso pogisa. Ae mo le tagata fa’atuatua, e ui i le tele o faigata, ae na te silafia e le tuulafoaiina o ia e le Atua. Afai e lē maua sa fa’amasinoga tonu i le taimi nei, e maua i le toetu i le ola e faavavau.

Tatalo: Le Atua e, o lou alofa e tumau lea e fa’avavau. Fesoasoani mai ina ia matou iloa ona ola fa’alagolago i lau afio ma au folafolaga, **Amene.**

O Tauiviga ma Mea e Ofo ai (*Struggles and Surprises*)

1 – Tauiviga (*Struggles*)

Aso Sa – Me 26: “Iakopo le tagata finau” (*Jacob the wrestler*)

Tusi Faitau – Kenese 32:22-32

Matua – ff.26b-28: “*A ua tali atu ia, Ou te le tu’uina atu lava oe seia e fa’amanuia mai ia te a’u. Ona fa’apea mai lea o ia ia te ia, O ai ea lou igoa? Ona tali atu ai lea o ia, o a’u o Iakopo. Ona fa’apea mai lea o ia, e le toe ta’ua lou igoa o Iakopo, a’o Isaraelu, auā e pei o se ali’i ua e finau i le Atua atoa ma tagata, ma ua e manumalo.”*

A o fuafua Iakopo i le taeao e feiloa’i ma lona uso o Esau, sa le maua sona malologa lelei i le po. Ua alu le po o tauivi – tauivi ma ona lagona popole ma ona manatu atuatuvaale, poo le a fa’apefea ona tali mai o ia e lona uso. O lona tauiviga i le po atoa, na i’u ai na tauivi ma le Atua. Naunau Iakopo i le fa’amanuiaga mai le Atua. E ui na tauivi, ae na maua A o taotu mafafau i tauiviga i lenei vaiaso, ua mafai ona avefa Iakopo ma ta’iala mo i tatou. Sa ia maua fa’amanuiaga a le Atua i totonu o tauiviga, ae le o le tete’e atu i ai.

Tatalo: I taimi o tauiviga ma lau afio Tamā, e mana’omia lou fa’amanuia mai e pei ona e faia mo Iakopo, **Amene.**

Memorial Day (Aso Malolo i Amerika)

Aso Gafua – Me 27: “Vala’au a’u o Mara” (*Call me Mara*)

Tusi Faitau – Ruta 1:1-21

Matua – ff.20-21: *“A ua fai atu o ia ia te i latou, ‘aua tou te ta’ua a’u o Naomi, a ia ta’ua a’u o Mara; āua ua matuā o’ona mea ua faia ia te a’u e Lē ona le malosi uma lava. Na ou alu atu ua tamōoaiga, ua fa’afoiina mai a’u e le Ali’i ua mativa; se a le mea tou ta’ua ai a’u o Naomi? Auā ua fa’atigaina a’u e le Ali’i, ua malaia a’u i Lē ona le malosi uma lava.”*

O le ola fetu’unai o le tagata o se mea lelei tele, aemaise pe afai o loo feagai ma tauiviga o le olaga. O le uiga o le ola fetu’unai, o le fa’amuamua o mea lelei o loo molimauina, ae fa’asee i tua faigata ma tauiviga o loo feagai ai. Sa lē fa’apea le tinā o Naomi. Ua lē silasila i mea lelei sa faia e Ruta mo ia, ae ua fa’amuamua i luma lona fa’aseā i le Atua ona a faigata o loo tauivi ma ia.

Soo se tauiviga e feagai ma le tagata, e i ai foi ma mea lelei o loo lotolotoi ai. O le fa’aילו lea o le fa’atasi mai o le Atua i le tagata, i taimi o puapuga ma faigata. Ua fa’apogisaina Naomi i faigata sa tauivi ma ia, ua na leiloa ai fa’amanuiaga a le Atua ua ia maua, e ala mai ia Ruta – o le tua’ a o le Tupu o Tavita, e ona le laina lea e tupuga mai ai le Mesia.

Tatalo: Le Atua e, a’oa’o mai ina ia matou iloa ona ola fetu’utu’unai, matou te manino ai i fa’aaliga o lou alofa tunoa i totonu o tauiviga o le olaga, **Amene.**

Aso Lua – Me 28: “Tauiviga a Apikaila” (*Abigail’s struggles*)

Tusi Faitau – 1 Samuelu 25:4-13, 23-31

Matua – ff.24-25a: *“Ua fa’apa’ū mai i ona vae, ua fai mai, Le Ali’i e, ia ia te a’u lenei agasala; o a’u nei lau auaua fafine... ‘aua ne’i tu’u e lo’u ali’i i lona finagalo o amio a lena tagata ulavale, o Napalu; auā e pei o lona igoa e fa’apea fo’i o ia; o Napalu lona igoa, o lo’o ia te ia fo’i le valea.”*

O le tala ia Apikaila, e ui i tauiviga sa feagai ai ona o le fa’amauualuga o lona to’alua o Napalu, ae sa mafai lava e lenei tinā ona fa’aitiitia ona aafiaga. O Apikaila ma lona aiga atoa, sa lamatia ona o faiga lē magafagafa o Napalu, aga’i ia Tavita ma ana ‘au. E lei nofonofo ai Apikaila i le fa’aletonu a lona to’alua, ae ua alu ma fa’atoese ia Tavita ona o le lē mafaufau o Napalu.

E mafai lava ona tutupu vevesiga i ni gaioga itiiti ae tūgā. A o le loto maulalo, o le agalelei, ma aga tausaaafia e mafai ona fo’ia ai le tutupu mai o vevesiga. Ana le i ai Apikaili, se manu e fasiotia Napalu e Tavita, ma tagata uma o lona aiga. O le tauiviga a Apikaili, a o lea ua fa’aolaina ai lona aiga.

Tatalo: Le Atua fesoasoani mai, ina ia matou maua le loto maulalo ma le agamalū e fa’afesaga’i ai ma i latou ua matou le masani, **Amene.**

Aso Lulu – Me 29: “O le po na gau ai Elia” (*Elijah’s broken night*)

Tusi Faitau – 1 Tupu 19:1-11

Matua – ff.4b-5a: “*Ua fa’apea mai Elia.... Le Ali’i e, soia; ia e ave’ese lo’u ola. Ua ta’oto ia, ua moe i lalo ifo o le ratami, fa’auta mai, o le agelu ua pa’i mai ia te ia, ma fai mai ia te ia, Inā tu ia i luga, inā ‘ai.*”

O lona fefe, o lona musuā, ma lona fa’noanoa na fa’apea ai Elia, “*Le Alii e, soia, ia e ave’ese lo’u ola.*” Peitai, e lei finagalo le Atua e aveese lona ola, ae ua fafagu i luga, fafaga, ma fa’amalosi i ai e fa’aauau lana faigamalaga. E ui ina pogisa le va’ai a Elia i se lumanai manuia, ae na finagalo le Atua i se olaga e tulaga ese lona atoatoa mo lana auauna.

E fai si faigata o le tulaga sa tauivi ma Elia, aemaise lona va ma le faigāmālō i le puleaga a Aapo ma Isapela. Na o ia lava le leo o loo tautala mo le Atua. Tele fita ma mea tau fa’amataui. Ae sau le agelu ma faimai: “*Tula’i ia e ‘ai, afai e leai, o le a le faigofie fo’i le malaga atu mo le faia o le finagalo o le Atua.*” A o’o ina leai se fa’amoemoe ma le mautonu, o lou inu ma lou ‘ai i se mea ‘ai na te fa’ailoa atu ai le malosi o lou fa’atuatua. Ina ua fa’alataina Iesu na ia tago ai i le areto ua fa’afetai ona tofitofi lea ma avatu i ona so’o.

Tatalo: Tatalo mo le mana’oga o falaoa i aso ta’itasi, ma manatunatu i mea o finagalo le Atua tatou te faia pe a fafagaina i tatou, **Amene.**

Ascension Day (Aso o le Afio A’e)

Aso Tofi – Me 30: “Iopu ua lēiloa mea uma” (*Job loses all*)

Tusi Faitau – Iopu 1:6-22

Matua – ff.20-21: “*Ona tula’i ai lea o Iopu, ma saei lona ofu, ma tafi lona ulu, ua fa’apaū fo’i o ia i le ele’ele ma ifo. Ua fai atu, Na ou sau le lavalavā mai le manava o lo’u tinā, o le a ou fo’i atu i ai ua le lavalavā; na foa’ina mai e le Ali’i, e ave’eseina fo’i e le Ali’i; ia fa’amanūina le suafa o le Ali’i.*”

A fa’ateia le tagata, o lana gaiogiga muamua lava e fai, e toe foi e fa’atino mea ua masani ai. ‘Ai o le mea lea na tapua’i ma vivii ai Iopu i le Atua ina ua fa’ateia i le tala ua leiloa uma ana mea sa i ai, e o’o i lana fanau – ua toe foi lava Iopu e fa’atino le mea ua masani ai

E tulaga ese foi le tali a Iopu i le taimi e o’o mai ai puapuaga ma faigata. Auā o ai se tagata e aveese ana mea uma e pei o le gaoi i le po, ae vivii i le Atua? O ai se tagata e maliliu fa’afuasei uma lana fanau ae tapuai i le Atua? E ui ina fa’ateia Iopu, a o lana tali e atagia ai le loloto o lona fa’atuatua i taimi e tauivi ai ma puapuaga ma faigata o le olaga.

Tatalo: Le Atua e, a matou va’ai a’e i le lagi i lenai aso ma taimi uma, ia mafai ona manatua le afio a’e o Iesu, **Amene.**

Aso Faraile – Me 31: “O le tutulu a le perofeta” (*Weeping Prophet*)

Tusi Faitau – Ieremia 9:1-6

Matua – ff.1-2a: *“E fia liua lo’u ulu ma suāvai, ma o’u mata ma punā loimata, ina ia ou tagi i le ao ma le po ona o ē ua fasiotia o le tama fafine a lo’u nu’u. E! ta fia maua i le vao se fale apitaga e api ai malaga, ina ia ou tu’ua lo’u nu’u, ma alu ese ai.”*

O upu o le auega a Ieremia ma lona naunautaiga ina ia sola ese mai i puapuaga ma faigata sa tauivi ai, e manaia i le fa’alogo, ae e lē moni. Ina ua fa’atumulia Ieremia i lagona o le tagata ua fa’alataina ma tuulafoaiina, sa’i loa. Ae e leai lava se tasi mea e mafai ona fa’atūtū aga’i ai le sa’i a Ieremia ma le maligi a ona loimata, ua na’o le Atua.

E le faigofie le galuega a Ieremia e pei ona valaauiina ai e le Atua, talu ai o tagata ia o lona nu’u o loo taumafai e ‘aapa atu ai e laveaiina, o tagata pepelo ma ua leai se alofa moni mo le Atua. E fiu a la e lavea’i, ae maumau taimi. Pau le feau e talafeagai ma i latou, o le fa’amasinoga. O loimata o Ieremia na mafua ona o le tauiviga a ona lagona i le va a ona tagata sa alofa i ai, ma le Atua o lā na valaauiina o ia. Ae sa fa’amaoni pea Ieremia i lona valaauiina fa’aperofeta, e tau lava i le i’uga, ina ua fa’atafeaina lona nu’u

Tatalo: Tatalo ia maua pea le lototele e mafai ai ona ‘aapa atu e lavea’i ma fa’amafanafana i ē o fa’anoanoa ma maua pea i loimata maligi, **Amene.**

Aso Toonai – Iuni 1: “O le po e lei moe ai Iesu” (*Jesus’ sleepless night*)

Tusi Faitau – Mataio 26:36-46

Matua – ff.39-40a: *“Ua maliu fa’aitiiti atu i luma, ona fa’apaū faō ai lea o ia ma tatalo, ua fa’apea atu, ‘Lo’u Tama e, afai e mafai, ia ave ese lenei ipu ia te a’u; a e ‘aua le faia lo’u loto, a o lou finagalo’. Ona maliu ane lea o ia i ona so’o, ua maua i latou o momoe...”*

O le taimi ua luluti ai faigata, a e maua mai e Iesu lona ‘ausoo o momoe. Ua alu le po atoa e lei malolo le Alii. Ua mafatia lona finagalo ona o le ipu ‘oona o loo fa’atali mai mo ia i le taeao e soso’o ai: o le satauro matuitui ma le oti tiga. Ua fia maua e Iesu se mapusaga e to’a ai. E saili mai i ona so’o, a e maua mai o momoe! Talofa ia Iesu. Ua tu’ulafoai e ona so’o i le taimi tonu na saili mai ai mo se fesoasoani.

Peitai, na maua lava e Iesu le loto tele e to’a ai i le Atua lana sailiga. Lea na fetalai ai Iesu, *‘...a e ‘aua le faia lo’u loto, a o lou finagalo.’* I taimi e luluti ai tiga, e maua lava e le tagata le taimi e moe ai. A o le Atua, e le moenoa Ia.

Tatalo: Keriso e, tatou ma lau afio i tauiviga o le soifuaga o loo matou feagai ai. Fa’amalosi mai, ina ia matou iloa ona faia lou finagalo, **Amene.**

O Tauiviga ma Mea e Ofo ai (*Struggles and Surprises*)

2 – O Mea e Ofo ai (*Surprises*)

Aso Sa – Iuni 2: “Ua afio a’e Iesu fa’aletino i le lagi”

Tusi Faitau – Galuega 1:1-11 (*A bodily Jesus ascends into heaven*)

Matua – f.9: “*Ua fetalai atu Ia i ia mea, ona siitia lea o Ia, o latou o va’ava’ai atu; ua aveva foi o Ia i le ao nai o latou luma.*”

E masani le ‘au Iutaia i le ulua’i senituri, i tala e uiga i tagata na afio a’e i le lagi, e pei o Enoka ma Elia. O tala ia sa fa’avae mai ai le talitonuga, o le tagata e afio a’e i le lagi, e afio a’e ma le tino e sili ona matagofie. Ae sa le fa’apea Iesu. Na afio a’e Iesu ma le tino na tu’imomoina. Na malii i le satauro ma tanumia i le tuugamau. A o le mea e ofo ai, na tu’imomomo ma tanumia le tino o Iesu i le elelee, ae na toe fa’afoisia e le Atua e fai ma tino e sili ona matagofie i le lagi, e nofo i le itu taumatau o lona nofoalii.

O le afio a’e o Iesu i lona tino na tu’imomoina, o le fa’amoemoe ola lea mo tagata uma o loo tu’imomomo foi o latou soifua i faigata o le olaga. Poo le a le tele o fita e tu’imomomo ai i tatou, e fa’afoisia i tatou e le alofa o le Atua, tatou te pa’i ai i Lona matagofie fa’ale-lagi a o tatou ola ai i lenei lalolagi.

Tatalo: Le Atua alofa e, fa’aali mai le maoa’e o lou mana, ia matou iloa ai ona ola mo lou lava viiga, **Amene.**

Queen’s Birthday (Aso Malolo i Niu Sila)

Aso Gafua – Iuni 3: “Avea ma so’o loto tele” (*Courageous discipleship*)

Tusi Faitau – Kenese 38:12-30

Matua – ff.25-26a: “*O loo ta’ita’iina atu o ia, na ia auina atu i le tamā o lana tane, o loo fa’apea atu, ‘O le tagata e ana nei mea ua ou to ai’; ua fa’apea foi o ia, ‘Se’i e iloilo po o ai e ana ia mea: o le fa’amaufa’ailoga, ma le asoa, ma le tootoo’. Ua iloa lava e Iuta, ona fai ane lea, ‘Ua sili ona tonu lana amio i la’u.’*”

O le tautala i le mea sa’o ma le fa’ailoa o mea sesē, o se tasi lea o feau tāūa i le tala ia Tamara. O Tamara o le fafine sa taotaomia i tu ma aga sa masani ai Isaraelu. O tu ma aga ia sa ave ai le fa’amuamua i le tāne, ae fa’atuatuanai le fafine. E ui ua le toe tala feagai ia tu ma aga i nei ona aso, ae o loo i ai pea atunuu ma tagata lautele o loo fa’atāuaina ia faiga.

O le ola fa’a-So’o, o le faia lea o le amiotonu ma tautala i le mea sa’o. Ua ufiufi e tu ma aga ua masani ai le tagata le tele o mea sesē o loo tutupu nei i totonu o aiga, nu’u ma ekalesia. A o le so’o moni a Keriso, e le fefe e fa’ailoa ia mea sesē; e maua pea le loto tele, e pei o Tamara, e tautala ai i le mea sa’o.

Tatalo: Iesu e, le suli o Tamara, fa’amanaina i matou i lou lototele, e mafai ona matou fa’ailoa atu ai mea sesē o loo taotaomia ai tagata i aso nei, **Amene.**

Aso Lua – Iuni 4: “Ua gagana le asini” (*The donkey speaks*)

Tusi Faitau – Numerā 22:21-35

Matua – f.28: *“Ona fa'agagana lea e le ALII o le asini, i lē ua fai mai o ia ia Palaamo, 'Se a ea se mea ua ou faia ia te oe, ua e sasa fa'atolu mai ai ia te a'u?’”*

E i ai taimi e faia ai e le Atua mea fa'apitōa, e ofo ai le tagata. E molimau Isaraelu i faiga ia a le Atua i ana tala o loo fa'amaumauina i le Feagaiga Tuai. O mea fa'apitōa ia e ofo ai le tagata, e faia e le Atua ona e i ai le feau tāua o loo finagalo ai e a'oa'oina ai le tagata. E pei o le tala ia Palaamo. E ofo le mafaufau i se manu vaefa ae gagana mai e pei o se tagata. Ae ua fa'agagana e le Atua le asini, e a'oa'oina ai Palaamo ina ia salamō i lana mea sesē na fai.

E i ai taimi e tutupu ai mea e ofo ai le mafaufau. Ae mo le tagata fa'atuatua, e tatau ona silasila fa'aleagaga i ia mea ua tutupu, pe le o ni mea fa'apitōa ua fa'atutupu e le Atua. Auā afai o lea, o lona uiga, e i ai le feau tāua mai le Atua o loo afifi mai ai mo le tagata.

Tatalo: Le Atua foafoa, fesoasoani mai ina ia matou lagona lou siufofoga, a o matou ola ma soifua fa'atasi ai ma e ua latou le lagonaina, **Amene.**

Aso Lulu – Iuni 5: “Fa'aaliga na ofo ai Peteru” (*Peter's surprise vision*)

Tusi Faitau – Galuega 10:1-15

Matua – f.14-15: *“A ua fai atu Peteru, 'Le Alii e, 'aua lava, auā ou te lei 'ai lava se mea e sa, po o se mea e leaga.' Ua foi fa'alua mai le suiifoga ia te ia, 'O mea ua fa'amamaina e le Atua, 'aua e te ta'ua e sã.’”*

O le tagata ma lona soifua tautua i le Atua, e i ai mea o lenei olaga ua na talitonu, ua uma ona fa'asā ma fa'atapu e le Atua. O talitonuga ia e le lata mai nei lona fa'avaeina. Ae sa fa'avae mai e tua'ā mai i le tuana'i, e fa'atino ai lo latou soifua tautua i le Atua. E o'o mai foi i o tatou vaitau, o loo tatou tausia pea le tele o talitonuga ia i mea ua fa'asā ma fa'atapu e le Atua.

E fa'apea se lagona sa atagia ia Peteru, i lona tete'e e 'ai manu vaefa ma isi manu sa fa'aali mai e le Atua ia te ia. O le tete'e o Peteru, e fa'avae mai i le talitonuga a ona tua'ā e uiga i manu ua fa'asā e le Atua. Ua fa'amamua e Peteru talitonuga a ona tua'ā sa fa'avae i le fa'aali mai o le Atua i le tuana'i, ae pogisa ai lona silasila i lona lava lotoifale, ma le fa'aali mai o le Atua ia te ia i le taimi nei. E le mafai ona tatou iloa le matagofie o mea fou o loo galue le Atua e fa'atino i le taimi nei, pe a tatou ta mau pea ma taofiofi mau i talitonuga e fa'avae mai i le tuana'i.

Tatalo: Le Atua e, saunia pea o matou tagata ina ia matou ofo pea i au fa'aaliga, **Amene.**

Aso Tofi – Iuni 6: “Oa natia e ofo ai” (*Surprise hidden treasure*)

Tusi Faitau – Mataio 13:44-45

Matua – f.44: *"E tusa foi le mālō o le lagi ma le 'oa ua natia i le fanua; ua iloa e le tasi, ona nanā ai lea e ia; ua alu foi ma le fiafia, ma fa'atau atu ana mea uma, i le fa'atau a'i mai lea fanua."*

Ua fa'atusa e Iesu le Mālō o le Atua i le 'oa ua natia i le fanua. Aisea ua fa'atau atu ai e lenei tagata ana mea uma e fa'atau a'i le fanua? Aisea na le aveese ai na'o le 'oa, ae ua naunau lava e fa'atau atoa le fanua? O le feau o loo fa'amamafa e Iesu i le Mālō o le Atua, e le o le 'oa lea na maua ma natia, a o le fanua na maua ai le 'oa. O le Mālō o le Atua e pei o le fanua, e 'aia tutusa ai tagata uma i lona fa'atauina. Ae pau le mea, e tatau ona naunau muamua le tagata e fa'atau. Sa fa'atau uma atu ana mea, e fa'atau a'i le fanua. E pei foi o le Mālō o le Atua – a le naunau le tagata e saili ma lona loto atoa, e maumau le taimi e ta'uta'u ai ma saili ai.

Na fa'atau atu e lenei tagata ana mea uma, o le fa'aailoga lea o lona naunau e fa'atau le fanua. O tatou naunau i le Mālō o le Atua? Pe na'o fa'amanuiaga tatou te maua mai ai le mea e sili ia i tatou ('oa natia i le fanua)?

Tatalo: Le Atua alofa e, fesoasoani mai ina ia matou iloa, o lou pule aoao i mea uma e faitaulia fa'atasi uma ai, e aunoa ma se manatu fa'aituau, **Amene.**

Aso Faraile – Iuni 7: “Lafoga e ofo ai” (*Surprise tax*)

Tusi Faitau – Mataio 17:24-27

Matua – f.26-27: *"Ona fetalai atu lea o Iesu ia te ia, 'O lea foi ua saoloto le fanau. A o lenei, ne'i latou tausuai ia i tatou, inā alu ia oe i le vai, ma lafo ai se mātau, o le ulua'i i'a e te maua, ia e tago i ai, ma fafasi lona gutu, ona e maua ai lea o le setatara; ia e ave lea, ma avatu ia te i latou ma oe ma a'u."*

Ua fesiligia Iesu ma lona ausoo, pe tatau ona totogi lafoga i le malumalu. Tali Peteru, o le mea e tatau. Ae fetalai Iesu, e leai, e tatau ona fa'agafua fanau o le Atua mai i lafoga o le malumalu, auā o le malumalu o le fale o le Atua mo lana fanau. O le manatu o loo taumafai Iesu e fa'aailoa atu i lana tali, o Ia o le Atalii o le Atua; o se tasi o fanau a le Atua. O tagata uma ua ta'u o fanau a le Atua, e pei o le ausoo, e tatau ona fa'agafua mai le totogi o lafoga i le fale o le Atua, auā o le fale a lo latou Tamā o i le Lagi.

Ae ui i lea, afai e totogi e fanau o le Atua se lafoga, e saunia e le Atua le auala e fa'atino ai, e pei o le tupe (setatara) na maua i le gutu o le i'a.

Tatalo: Le Atua amiotonu e, fa'afetai mo le mautinoa ua e aumaia, o i matou o lau fanau e suli fa'atasi ma Keriso, **Amene.**

Aso Toonai – Iuni 8: “O le Agaga Paia ua afio mai” (*Coming of the Holy Spirit*)

Tusi Faitau – Galuega 2:1-13

Matua – f.3-4: *“Ua iloa foi e i latou o laualufaiva peiseai o le afi ua vaevaeina, ua nofo i latou luga taitoatasi. Ua fa’atutumuina foi i latou uma i le Agaga Paia, ua afua ai ona tautala i gagane eseese....”*

O le aso o le Penetekoso na fanau mai i le lotoifale o le fa'amata'u, o feese'eseaiga, ma le nonofo pogisa o i latou sa ta'ua o soo o Iesu Keriso. O le mea e ofo ai: o le fa'aali mai o le Atua e ala i le afio ifo o le Agaga Paia, e lei fa'aali mai i se gagana e tasi e lauiloa ma masani ai le to'atele o tagata mauualuluga, pei o le gagana Eleni. Ae finagalo le Atua e fa'aali mai i gagana eseese, e masani ai tagata mauualo o loo taotaomia ma olopalaina.

O le aso o le Penetekoso, o le aso e patipatia ai le tulaga tutusa o tagata uma i le silasila mai o le Atua. O le ata lea o le fanau mai o le Ekalesia Kerisiano. O le ituaiga gagana e tataua ona tautala ai le Ekalesia Kerisiano ma fa'atino ai lana galuega, o le gagana e tutusa ai tagata uma. Ae le o le gagana e afisi ai isi, ae toso ai isi.

Tatalo: Le Atua o le Penetekoso, liligi mai lou Agaga i luga ia te i matou, ina ia matou iloa ona ola tutusu i mea matou te le tutusa ai, **Amene.**

Fua o le Agaga (*Fruits of the Spirit*)

Aso Sa Penetekoso

Aso Sa – Iuni 9: “Alofa” (*Love*)

Tusi Faitau – Kalatia 5:22-26

Matua – f.22-23: *“A o le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le fa’amaoni, o le agamalu, ma le lē gaoiā; e le fa’atulafonoina mea fa’apena.”*

O fua ia o le Agaga e pei ona laulau mai e Paulo, o fua e o fa'atasi. E le 'eseese pe māvaevae, ae tasi lava le fua atoa. O fua o la'au 'aina, e le gata e fafaga ai ē o loo fia 'aai i le taimi nei, ae mafai foi ona lulu ona fatu i le eleele ma le fa'amoemoe e selesese mo ē o i le lumanai. E fua e galuea'iina i le taimi nei, mo le manuia o tupulage i le lumanai.

O le Aso Sa leni o le Penetekoso, e fa'amanatuina ai le afio ifo o le Agaga Paia, lea na fanau mai ai le Ekalesia Kerisiano. O le aso na fanau mai ai le loto gatasi, mai le ta'ele o le fevaevaeai ma le fefulituaai. Na fanau mai ai foi le malamalama, mai le pogisa ma le lē mautonu. O le Ekalesia e fiafia e mapu i le alofa o le Atua, e fua mai ai fua ia o le Agaga.

Tatalo: Le Atua na te tausi ma leoleo i lau fanau, fa'a-suamalie o matou ala ma fa'a-fua mai o matou ola, **Amene.**

Queen's Birthday (Aso Malolo i Ausetalia)

Aso Gafua – Iuni 10: “Olioli” (Joy)

Tusi Faitau – Roma 15:13

Matua – f.13: *"O le Atua foi e tupu mai ai le fa'amoemoe, ia fa'atutumuina outou e ia i le olioli uma atoa ma le filemu, ina ua fa'atutua; ina ia tele lava lo outou fa'amoemoe ona o le mana o le Agaga Paia."*

O le a le uiga o le olioli? E taofi eseese tagata. Mo Paulo i lana tusi i le Ekalesia i Roma, o le olioli e o fa'atasi ma le filemu ma le fa'amoemoe. E le tutusa le olioli ma le ola fa'amalieina, poo le fiafia. A o le olioli fa'aKerisiano, e afua mai ina ua mae'a lelei ma taunuu manuia se galuega sa fitā i tuga ai, a o le lagona e totogo a'e ina ua mautinoa le tagata fa'atuatua, o le fa'atasi mai o le Atua na mafua ai ona taunuu manuia.

O le olioli o le mea alofa mai le Atua. E le o se mea alofa mo i latou e naunau i le ola fa'amalieina ma mea fa'a-fiafia o lenei lalolagi. A o le mea alofa mo tagata ua toetoe a leai se fa'amoemoe ona o le tele o faigata o le soifuaga o loo feagai ai. O le olioli mai le Atua, e tupu ai le fa'amoemoe.

Tatalo: I lenei aso le Atua, aumaia le olioli i lo'u loto, fa'atupu le fa'amoemoe ia te a'u, ma fa'ae mai lou alofa i o'u ala, **Amene.**

Aso Lua – Iuni 11: “Filemu” (Peace)

Tusi Faitau – Ioane 16:33

Matua – f.33: *"Ua ou fai atu nei mea ia te outou, ina ia outou maua le manuia (filemu) ia te a'u; e maua foi outou e le puapuaga i le lalolagi, a ia outou loto tetele, ua ou manumalo i le lalolagi."*

O le filemu, o le tulaga e taunuu ai tagata uma i nei ona aso. Talu ai o loo tatou nonofo i se lalolagi e vevesi i taimi uma i feau ma galuega e fia fa'atino, e naunau uma tagata e fia maua se taimi e mapu ane ai ma filemu ai.

Peita, o le filemu fa'a-Iesu, e le o se mea e sailia pe fa'atalitali i ai. E le o se mea foi e mafai ona fa'atau i tupe e pei ona masani ai le toatele e fia sosola ese mai i fita ma faigata o le olaga. O le filemu fa'a-Iesu, o le mea alofa mai le Atua. E pei ona molimau le Evagelia o Ioane, o le folafolaina o le filemu, o toe upu ia a le Alii i lana mavaega i lona 'ausoo. O le filemu lea o loo naunau ai Iesu mo lona 'ausoo, e lē o le filemu e sola ese mai ai mai i fita ma faigata o le lalolagi. A o le filemu e mafai ona fa'afesagai ai ma ia fita ma faigata, ma manumalo ai. O le filemu lea o loo fai mea alofa mai ai le Atua mo i tatou e ala i lona alofa tunoa, pe a tatou fa'atuatua ma fa'amoemoe ia te Ia.

Tatalo: Le Atua o galuega vevesi e fia fa'atino ma agaga ua le maua se to'a, aumaia lou filemu mo a'u i lenei aso i mea uma o le a ou feagai ai, **Amene.**

Aso Lulu – Iuni 12: “Onosa’i” (*patience*)

Tusi Faitau – Roma 12:12

Matua – f.12: *"Ia olioli i le fa'amoemoe, ia onosai i le puapuaga, ia finafinai i le tatalo."*

O le onosa'i e le o se mea faigofie, aemaise i lenei lalolagi i le tele o suiga fou. O le fa'amoemoe o ia suiga fou, o loo taumafai e fa'amalie le mana'o o le tagata i le taimi nei. O le fa'amamafa lea ua i ai nei le soifuaga – e naunau le tagata e fia fa'amalie ona mana'o i le taimi nei lava. Peita'i, ua avea lea fa'amamafa ma ala ua faigata ai ona lagona le matagofie o le ola onosa'i.

O le tagata e naunau e fa'amalie ona mana'o i le taimi nei, na te lē iloa le tāua o le ola fa'atalitali i le Atua. O le mea lea ua tu'u fa'atasi ai e Paulo le fa'aupuga, *'onosai i le puapuaga,'* ma le, *'finafinai i le tatalo,'* i le fuaiupu lea ua avea ma matua o lenei aso. E o fa'atasi le onosa'i ma le tatalo. O mea ia e lua e atia'e ai mafutaga ma fa'atupu ai le ola fa'alagolago i le Atua ma lona alofa. E faigofie le onosa'i pe a tatou iloa e sili atu le tau i loo fa'atalitali mai i le lumanai nai lo le taimi nei. Ae afai e faigata i le tagata le ola onosa'i ma le ola fa'atalitali i le Atua, ia manatua, e lei faigata i le Atua lona onosa'i ma lona fa'atalitali i le tagata ina ua auina mai Lona Alo Pele e to'atasi.

Tatalo: Aumaia le onosa'i le Atua, ou te fa'atupu ai le onosa'i i isi, **Amene.**

Aso Tofi – Iuni 13: “Fa'amaoni” (*faithfulness*)

Tusi Faitau – Eperu 11:1

Matua – f.1: *“A o le fa'atuatua, o le fa'alagolago lea i mea ua fa'amoemoe i ai, o le mautinoa lea o mea e le o vaaia.”*

O le fa'alagolago i mea ua fa'amoemoe i ai, o le mautinoa ea lea o le a tutupu ni mea lelei, e ui e le o va'aia? A o'o na masani le tagata i mea e tutupu i le soifuaga, e faigofie lava ia te ia ona talia ia mea ma le manatu o mea sa'o ia. E tusa lava poo ni mea e fa'aletonu, ae a masani ona tupu i aso uma, e talia lava e le tagata ma le manatu o le sa'o lea.

A o le Atua, e le talafeagai i lona finagalo le tutupu o ni fa'aletonu i le soifuaga ua masani ai le tagata. Auā o le Atua ma lona alofa, e fa'amaoni. O le fa'amaoni o le Atua, e o fa'atasi ma le amiotonu, le ola fa'asoa ma le fa'atupuina o le filemu. E tatau ona ta'imua le tagata i ana mea e fai, aemaise le fesiligia o fa'aletonu ua masani ai le soifuaga ma lona gāsologa. Afai e i ai se mea e tasi o lenei soifuaga e tatau ona fa'alagolago ma mautinoa ai le tagata fa'atuatua, o lea: o le Atua, e fa'amaoni lona alofa mo lana fanau.

Tatalo: Le Atua fa'amaoni, aumaia le loto tele i taimi e le mautonu ai, ma le onosai i taimi e fesuisuia'i ai le olaga, **Amene.**

Flag Day (Aso Fa'amanatu i Amerika)

Aso Faraile – Iuni 14: “Agamalu” (Gentleness)

Tusi Faitau – Kolose 3:12-13

Matua – f.12: *“O lenei, ia oofu outou i le alofa mutimuti vale, ma le agalelei, ma le loto maualalo, ma le agamalu, ma le onosai, fa'apei o e ua filifilia e le Atua, o e ua paia ma ua alofaina”*

E mafai ona fa'amatalaina le agamalu, o le malosi e potu e taofiofi. E mafai foi ona fa'atusa e fa'apea, o le aga e tu'utu'u la'au ai i 'autafa o le isi, e aunoa ma se manatu e fiasili. I nei ona aso ma le gāsologa o le soifuaga ua i ai nei, ua alualu i luma le ola fia malosi ma le ola fia matamuamua o tagata. E mafua ona fa'apea, auā o aga ia e maua ai le manuia ma le tamāoaiga i aso nei.

Peita'i, o le aga e tatau ona amio a'i le tagata Kerisiano, o le agamalu. Poo le a le fia malosi mai o le isi tagata, e gase lava i le agamalu o le isi. Poo le a le naunau o le tagata e fiasili ma fia fai viiga, e manumalo lava le tagata e agamalu. Auā o le agamalu, o le aga lea fa'a-Iesu.

E le gata i le amio, a o auala foi tatou te fa'aaogaina e fo'ia ai le 'au fia malolosi, o auala e tatau ona atagia ai le agamalu. E o fa'atasi la tatou amio ma auala tatou te fa'aaogaina, e fo'ia ai ē fa'amaualuluga ma fia malolosi.

Tatalo: Le Atua paia e, ia aumaia lou agamalu mo a'u i lenei aso, e fou ai lagona i le tino, mafaufau ma le agaga, **Amene.**

Aso Toonai – Iuni 15: “Lē Gaoiā” (Self-Control)

Tusi Faitau – 2 Peteru 1:5-7

Matua – f.5: *“O le mea lava lea ia outou matua fa'amalosi ai lava, ina ia fa'aopoopoina le amio lelei i lo outou fa'atuatua, ia fa'aopoopo foi le iloa i le amio lelei.”*

O le lē gaoiā, o le toe fua lea o le Agaga sa ta'ua e Paulo. E mulimuli ta'u, auā o le fua e pito sili ona faigata i le tagata ona fa'atino. O le lē gaoiā, o loo aumaia ai le ata o le tagata e to'a i taimi e fesoua'ina ai. O le tagata e lē osovale i taimi e tutupu ai fa'afitauli, ae to'amalie. E to'a ona manatu ma lagona, a o lona agaga, e lē mapu lona saili atu i le Atua ma lona alofa.

E faigofie ona iloa le lē gaoiā o le isi tagata, ae faigata ona iloa e le tagata ia ia te ia lava. Ae ui i lea, o le lē gaoiā, o le fa'aailoga lea o le tagata ua mautinoa i le Atua ma lona alofa. E lē gaoiā i taimi e fesoua'ina ai, auā ua mautinoa i le Atua ma lona alofa, na te le tuulafoaiina ona tagata. O le mautinoa i le Atua ma lona alofa, e tupu ai le lē gaoiā o le tagata.

Tatalo: Ta'ita'i mai o'u lagona, leoleo mai o'u manatu, ma puipui mai o'u lima mai mea leaga uma, **Amene.**

Tinā Ofoofogia i le Tusi Paia (*Surprising Women in the Bible*)

1 – Tagata Vā'ai ma Perofeta (*Visionaries and Prophets*)

Aso Sa o Tamā (*Amerika ma Amerika Samoa*)

Aso Sa – Iuni 16: “**Valaau le Fa’atōsaga**” (*Call the Midwife*)

Tusi Faitau – Esoto 1:8-22

Matua – f.17: “*A ua matatau i le Atua ē na fa’atōsaga i fānauga, e lei faia foi le mea na fai atu ai le tupu o Aikupito, a ua la fa’aola lava i tama tāne.*”

O tala ia i le afuafua mai o le nu’u o le Atua, ae amata i fa’afitauli ina ua finagalo le tupu o Aikupito e fa’amuta le tupu olaola o tagata Eperu. Peita’i, o le fanafanau o Isaraelu, o le isi lea vaega o le folafolaga a le Atua ia Aperamo, lea ua fa’ataunuu i Aikupito. O le Atua e folafola, o le Atua foi na te fa’ataunuuina. A i ai ni fa’afitauli e fa’alavelave i le fa’ataunuuina o folafolaga a le Atua, e saunia e le Atua auala e fo’ia ai ia fa’afitauli. O auala ia a le Atua, lea e atagia i fafine fa’atōsaga.

O le Aso Sa o Tamā ae fa’atāua ai Tinā? O le faia o le finagalo o le Atua, e le fa’ailogaina ai se Tamā poo se Tinā. O le Atua e folafola, a o le tagata – poo se Tamā poo se Tinā, e mulumulita’i i le Atua mo lona fa’ataunuuina.

Tatalo: Fa’afetai le Atua mo Tamā loto tetele ma le fa’amaoni, **Amene.**

Aso Gafua – Iuni 17: “**O le Tinā sa mua i malae**” (*A first among women*)

Tusi Faitau – Esoto 15:1-3, 19-21

Matua – f.20: “*O Miriama, o le perofeta fafine, o le tuafafine o Arona ua ave e ia le topa i lona lima, ua o atu foi fafine uma lava ua mulumuli atu ia te ia ma topa ma siva.*”

O le faitauga o lenei aso, o le taimi muamua lea i le tala atoa i le tusi o Esoto, ua ta’ua ai le igoa o le tuafafine a Mose ma Arona, o le teine o Miriama. E le gata ua ta’ua o ia o le perofeta fafine, a o le tagata e fai musika, e ta’ita’i foi i le fa’apopotoga o fafine o le nu’u. Sa le ta’ua lona igoa i le taimi sa leoleo ma puipui ai ia Mose a o pepe, a o lea ua fa’ailoa mai lona suafa, o le ulua’i perofeta fafine i totonu o le Feagaiga Tuai.

E le o ta’ua i le tala poo a ni agavaa sa i a Miriama ua ala ai ona ta’ua o ia o le perofeta fafine. O le fa’ailoga manino lea e iloa ai, e lē sala ese le ata o Miriama o loo aumaia i le tala, ma le ata o fafine i nei ona aso i totonu o aiga ma fa’alapotopotoga – o le tele o a latou galuega lelei e lē iloa – e manatu māmā ma e lē o taualoaina e le to’atele.

Tatalo: Talosia le galuega fa’ata’ita’i o tamaita’i ma tinā talavou i totonu o ‘aulotu ma fa’apopotoga eseesa, **Amene.**

Aso Lua – Iuni 18: “E i ai ‘aiā o fanau teine” (*Daughters have rights*)

Tusi Faitau – Numera 27:1-11

Matua – f.7: *“E tonu le upu a afafine o Selofeata; e te avatu lava ia te i latou so latou lava tofi fa’atasi ma le au uso o lo latou tamā, e te tu’uina atu ia te i latou le tofi o lo latou tamā.”*

E malii Selofeata e leai sona atalii, ae na’o lana fanau teine e to’alima. Na fesiligia e afafine ia o Selofeata tu ma aga masani e uiga i tofi a le Tamā pe a malii. O le masani, a malii le Tamā, e ui i le atalii matua lona tofi ma mea totino uma o le aiga. Peita’i, ua fesiligia e afafine o Selofeata ia tu ma aga masani ona e leai se atalii o le aiga, ma ua lagolagoina e Mose.

O lenei tala o loo aumai ai le feau o le ‘aiā tutusa o le tama ma le teine, o le tātane foi ma le fafine. Na’o le tagata e toa lona loto na te mafaia ona fesiligia tu ma aga ua masani ai ina ia aumaia ai se suiga lelei e atagia ai le amiotonu ma le ‘aiā tutusa o tagata uma. Ua tele na taotaomia ‘aiā tatau o tagata i tu ma aga ua tatou masani ai. O mea ua tatou iloa e sesē, ae faia pea lava, ona ua tatou manatu o tu ma aga ua masani ai. O le tagata Kerisiano moni, e tatau ona maua le loto tele e fesiligia ai.

Tatalo: Talosia le ‘aiā tutusa o tagata uma i so’o se mea latou te i ai, **Amene.**

Aso Lulu – Iuni 19: “Fa’atuatuaina lelei i mea uma” (*All in good faith*)

Tusi Faitau – Iosua 2:1-14

Matua – f.12-13: *“O lenei, se’i oulua tauto mai ia te a’u i le Alii, auā ua ou agalelei atu ia te oulua, ia oulua agalelei mai foi i le aiga o lo’u tamā, ma ia oulua tu’u mai ia te a’u se faailoga fa’amaoni; ma ia outou fa’aolaina lou tamā, ma lo’u tinā, ma o’u tuagane, ma o’u uso, ma i latou uma ua ia te i latou, ma ia laveaaina i matou ia lē oti.”*

O Ra’ava o le fafine nu’u ese. O le fafine talitane e leai sona to’alua. E ola ma soifua i tua’oi o le ‘aai, o le mea e fa’asino i ai le ‘au maulalo ma le ‘au lē taualoaina i gāsologa masani o le olaga. O lona fa’atauānuu i tagata Isaraelu sa asiasi fa’alilolilo mai i le ‘aai, na mafua ai ona fa’asaoina lona aiga atoa

O le tala ia Ra’ava, o le tala i le fafine finau. O le fafine sogasogā i mea lelei. O le to’ilalo o Ieriko ma le soloia o ona pa, o le finagalo lea o le Atua mo lona nu’u o Isaraelu. A o le aumaia o le tala ia Ra’ava i totonu o le tala i le fa’atoilaloina o Ieriko, o loo afifi mai ai le feau o le manumalo e maua i totonu o le to’ilalo – o le fiafia e maua i totonu o le fa’anoanoa – o le sa’olotoga foi maua i totonu o le ola pologa.

Tatalo: Talosia ē ua le manumanu i o latou ola ona o le naunau ia manuia o latou ‘aiga ma ia fa’atoilaloina le pulega sauā o isi, **Amene.**

Aso Tofi – Iuni 20: “Fafine i le soifuaga lautele” (*Women in public life*)

Tusi Faitau – Faamasino 4:1-16

Matua – f.4: *“O ona po ia na fa’amasinoina ai Isaraelu e Tepora, o le perofeta fafine...”*

E lē to’atele ni fafine o fai ma ta’ita’i ma fa’auluuluga o atunuu ma faigāmālō i nei ona aso. O le faailoga lea e iloa ai, o loo tau fa’amasani pea le lalolagi, aemaise le olaga lautele ma lona gāsologa, i le avea o fafine ma ta’ita’i iloga.

O le tula’i mai o Tepora e fai ma fa’amasino e ta’ita’iina le nu’u o le Atua, o se fafine e toa ma atamai i faiga fa’a-fitafita. Ua uma ona fa’ataoto e Tepora le fuafuaga e fa’atoilalo ai Iapino, le tupu o Kanana, ua silia ma le 20 tausaga o fa’atigā ia Isaraelu. Ae ina ua aami fa’apitoa Parako e sau e fa’ataunuu lea fuafuaga, na fa’aluafesasi lona mafaufau. Masalo ua fesiligia e Parako le tulaga fa’a-ta’ita’i o Tepora, ona o ia o le fafine. Peita’i, na o fa’atasi lava Tepora ma Parako, ma fa’atonutonu e Tepora mea uma e fa’atino e Parako. O lea na i’u ai i le manumalo, ina ua fa’atoilalo e Parako le ta’ita’i ‘au o Sesera, o lē sa pule i ‘au a le tupu o Iapino.

Tatalo: Talosia i latou o loo umia tofiga, ia latou maua le loto matala, **Amene.**

Aso Faraile – Iuni 21: “O le nu’u na laveaiina e le tagata mai i fafo”

Tusi Faitau – Faamasino 4:17-22 (*A nation saved by an outsider*)

Matua – f.17: *“A o Sesera, ua sola o ia i ona vae i le fale ie o Iaeli le avā a Kaveru o le sa Keni, aua ua nofo lelei Iapino e tupu o Hasora ma le aiga o Kaveru o le sa Keni.”*

Ina ua toilalo ‘au a le ta’ita’i ‘au o Sesera, na ia sulufa’i mo se lavea’i i le fale ‘ie o Iaeli, le avā a Kaveru le sā Kenī. Sa fa’amoemoe Sesera i le lelei o fesootaiga i le va o Kaveru ma Iapino le tupu o Kanana, o le a maua ai sona laveaiina ia Iaeli. Na tali leleia lava e Iaeli le sulufa’i mai o Sesera. Na fa’atino foi e Iaeli fa’atonuga uma sa fa’atonu mai ai e Sesera. Peita’i, ina ua moe Sesera, ona fasioti lea e Iaeli.

E atagia i le tala ia Sesera ma Iaeli le ata o loo maua ai le tele o fafine i nei ona aso o loo taotaomia ma sauāina i totonu o mafutaga fa’ale-ulugalii. O le a lava le fa’atonuga e aumai e le tamaloa, e fa’atino lava e le fafine ona o le fefe ma le mata’u. E le mailoa ni a tatou gaiioiga e fai e puipui ai a tatou fanau ma ‘aiga, pe a ono fa’amatau mai se tasi. Ae mo Iaeli, e tutusa lelei ma Ra’ava – o fafine ese mai i fafo, a o la fatinoga sa fai, lea ua manuia ai le nu’u o le Atua.

Tatalo: Manatua ma le alofa i latou o loo saisaitia ma sauāina, ia puipui ma leoleoina lo latou soifua, **Amene.**

Aso Toonai – Iuni 22: “Fa’asolo ao o le mālō” (*Royal succession*)

Tusi Faitau – 1 Tupu 1:5, 11-31

Matua – f.12: *“O lenei, ina sau ia, so’u fa’atonu atu ia te oe, ina ia fa’aola oe ia te oe, ma lau tama o Solomona.”*

I le fa’asologa o ao o le mālō i nei ona aso, e i ai aiaiga, fa’atasi ai ma tu ma aga ua masani ai, e mulumulita’i ai le filifiliga o lē o le a fa’asolo i ai le ao. I le faitauga o lenei aso, o loo aumai ai le tala i le tauiviga sa faia mo le ao o le mālō o Isaraelu. Ina ua matua le tupu o Tavita, sa tula’i mai ai lona atalii o Atonia ma folafola ia Isaraelu o ia o le a avea ma tupu, e ui i se fa’aaliga mai ia Tavita. Ona fausia lea e le perofeta o Natano le fuafuaga, fa’atasi ai ma Patisepa, ina ia avea ai lana tama o Solomona e fai ma tupu. Na talia e Patisepa le fuafuaga a Natano, lea na ia fautua ai ia Tavita, ona fa’aailoa lea e Tavita ia Isaraelu, o lona atalii o Solomona o le a fai ma tupu.

Ua faula atoa fuafuaga a Atonia talu ai ua le usita’ia tu ma aga e pei ona masani ai i le filifiliga o se suli e fa’asolo i ai le ao o le mālō – e tataua ona fa’aailoa atu muamua i lē o loo nofoia le nofoalii.

Tatalo: Talosia i latou ua avea ma ta’ita’i, ma ē ua se’ei mai i tofiga o faigāmālō, o nu’u, o aiga, ma ekalesia, **Amene.**

Tinā Ofoofogia i le Tusi Paia (*Surprising Women in the Bible*)

2 – Faievagelia ma Ta’ita’i (*Evangelists and Leaders*)

Aso Sa – Iuni 23: “Ua na’o Ana le loomatua” (*It’s only old Ana*)

Tusi Faitau – Luka 2:21, 36-38

Matua – ff.36-37: *“Ua loomatua o ia, sa la nonofo ma lana tāne i tausaga e fitu talu ina o taupou. E lei aluese ia i le malumalu, a ua auauna o ia i le Atua i anapogi ma talosaga i le ao ma le po.”*

O le tinā matua ia Ana, o se perofeta fafine, na tu’uina atu atoa lona ola e auauna mo le Alii e ala i talotaloga ma le anapogi. O lona fa’atalitali i le o’o mai o le togiola o Isaraelu – o Iesu lea – o loo aumai ai se fa’amoemoe lelei i le ata o se tinā matua, ae taula’i atu lona loto i le Alii.

Ua tatou maua mai i le tinā matua ia Ana se fa’ata’ita’iga lelei. O le olaga ua tu’uina atu ma fa’aavanoa atu mo le Atua, e le talituaalimaina e le Atua i ana fa’amanuiaga. O le olaga fa’a-tinā matua ia Ana, e mafai ona atagia ai le mau: o le olaga ua tu’uina atu ma fa’avanoa mo le Atua, o le olaga lena e fa’atumuina e le Atua i lona malosi ma lona ‘oa fa’ale-lagi.

Tatalo: Tamā e, se’i e aumai le malamalama ma le atamai e pei o lau auauna ia Ana, ia taula’i atu ai o matou loto i mea moni o lou mālō, **Amene.**

Aso Gafua – Iuni 24: “Maria, le Tinā o le Atua” (*Mary, mother of God*)

Tusi Faitau – Ioane 19:16b-18, 25b-27

Matua – ff.26-27a: “*Ua silasila atu Iesu i lona tinā, ma le so’o ua alofaina e ia, ua tutū mai, ona fetalai atu lea o ia i lona tinā, “Sena e, fa’auta o lau tama” Ua faapea atu foi o ia i le so’o, “Fa’auta o lou tinā”*

Ua taape tagata na latou molimau i le maliu o Iesu. Ua sosola foi ona soo ma nonofo i le mea e tasi ona o le fefefe ia Roma. Peitai, mo Maria, e lei faigofie ia te ia ona ia tu’ua le nofoaga sa fasiotia ai lana tama. Le nofoaga fa’agaloga i le loto ma le mafaufau, a o i tonu na fa’amautūina le moni o le alofa fa’a-tinā i le mafutaga ma fanau. E ogotia i mafatiaga ona o le alofa. O toe fetaliga a Iesu, e fa’amautū ai le vā feagai ma lona tinā, e atagia ai lona so’otaga ma le Atua lona tamā.

O le alofa fa’a-tinā, e fa’apea se ata o loo mafai ona fa’atusa i ai le alofa o le Atua, na te fusia i tatou uma i ona aao alofa. O a faigata ma puapuaga e feagai ma i tatou i le tele o taimi, na te le tu’ulafoaiina i tatou. E i ai o ia fa’atasi ma i tatou. Pe oti pe ola i tatou, o tagata lava o le Atua i tatou, e ala i lona alofa mutimutivale.

Tatalo: Lo’u agaga e, ia fa’amanū ma vivii i le Alii lo’u Fa’aola, ona o le filemu ua ou maua, e fai ai a’u ma auauna, **Amene.**

Aso Lua – Iuni 25: “Tausamiga mai i seoli” (*Dinner party from hell*)

Tusi Faitau – Mareko 14:3-9

Matua – f.3: “*Sa i Petania o ia i le fale o Simona le lepela, o ta’oto i le taumafataga, ona sau lea o le fafine ma le fagu alapasa, ua i ai le u’u nato tautele, ua tata’e le fagu ma liligi ai i luga o lona ao.”*

O le galuega lelei a le fafine sa faia mo Iesu, ae atagia ai se valoaga mo mea o le a tutupu i le lumanai. Ua fa’aigoa le manatu autū o lenei aso, “O le taumafataga mai i seoli,” ona o uiga fa’a-Satani sa atagia i tagata ina ua ua faia e le fafine le galuega lelei mo Iesu, i le u’uina o lona tino. Ua muimui ai le to’atele sa i ai i le tausamiga, ma latou faimai ua maumau le u’u nato tautele.

Na fa’aigoa e Iesu le galuega na faia e le fafine, o le mea lelei. A ua leva ona mafuta ma Simona i lona fale, ma tagata sa latou i ai faatasi, e lei faia lava e se tasi se mea lelei. O lenei fa’atinoga lelei na faia e le fafine, e o’o atu ona tala i tuluiga uma o le lalolagi, e fai ma tala e luitauina ai le soifua o tagata auauna, I le fai mea lelei, ma le mea sili mo le Alii.

Tatalo: Le Alii e, aumai lou agaga e taofia ai lo matou ‘auai i faiga e fa’atigā ai i nisi, ma avea ma auala o le afaina o mea lelei o loo latou faia, **Amene.**

Aso Lulu – Iuni 26: “Ua latou aveese lo’u Alii” (*They have taken my Lord away*)

Tusi Faitau – Ioane 20:11-18

Matua – f.17: “*Ua fetalai atu Iesu ia te ia, ‘Aua e te tago mai ia te au, ae alu i ou uso ma fai atu ia te i latou. Ou te alu a’e i lou Tama ma lo outou Tamā, o lou Atua ma lo outou Atua.*”

O le tagi talatala a Maria, ‘*ua latou aveese lo’u Alii,*’ o le fa’ailo lea ua muta lona fa’amoemoe, a o le amataga o se fa’amoemoe fou e le gata mo ia, ae mo i latou o le a fa’alogo i le tala lea ua auina atu e tala’iina.

E le o le taimi muamua lea sa fetosoa’ina ai lagona o Maria. O Maria lea sa fa’amalolo e Iesu ina ua tulia temoni e 7 sa ia te ia. O lona alofa ia Iesu sa mulimuli ai ia te ia ma lana galuega. A o lea foi ua fa’atonu e Iesu, ‘*aua e te tago mai ia te a’u, ae alu i ou uso..*’ Tu’u Iesu ‘*aua le tago ia te ia, ae alu ona e i ai mea e silisili atu e mana’omia ona fa’ataunuu.*’ Ua latou aveese le Alii, ae e lei uma le tala ia Iesu; e fa’aauau pea. E i ai le mea sili i tua atu, ma o le tatou matafaioi, o le ave a o i tatou ma sootaga o le tuugamau tuufua, ma le faasalalauina o le tala i le lalolagi atoa.

Tatalo: Iesu le Alii o le ola, fesoasoani mai ia ou alu ma le talitonu, e fa’ailoa atu le tala lelei ia te oe le Alii toetu, **Amene.**

Aso Tofi – Iuni 27: “O le tatalo a le tinā o lou tinā” (*Grandma’s prayers*)

Tusi Faitau – 2 Timoteo 1:3-7

Matua – f.5: “*Ua ou manatua le faatuatua faamaoni ua iā te oe, sa mua’i i ai iā Loi le tinā o lou tinā, atoa ma Eunike lou tinā, o la’u taofi o lo’o iā te oe foi.*”

O loo faamanatu e Paulo ia Timoteo e fa’aaoga lona fa’atuatua e atinae ai meaalofa a le Atua o loo ia te ia. Sa ta’utinio foi e Paulo ia Timoteo, le tāua o le olaga fa’atuatua sa soifua ai le tinā o lona tinā ia Loi, ma lona tinā ia Eunike. O le tatalo a le tinā o le tinā o Timoteo, o loo atagia ai le uiga o le fa’atuatua e maua mai i matua. O le fa’atuatua foi lena o lea e naunau Paulo ia nofo i totonu ia Timoteo, ma lana galuega. O le soifua fa’atuatua o Loi ma Eunike, ua ave lea ma fa’amalosi ‘au mo Timoteo ma lana galuega.

Tatou te fa’atuatua ma le talitonu, o loo i ai nisi tagata o loo tatalo mai mo i tatou, ina ia tumau lo tatou ola auauna ma le ola taumafai. E ui ina tatou te lē aiga pe masani foi, ae fa’afetai i le Atua o loo mafai ona latou manatua i tatou i a latou tatalo, ina ia fa’atumauiina ai lo tatou fa’atuatua e feagai ai ma le galuega a le Atua. O le tapuaiga tatalo a nai o tatou matua, o le manuia lena o le galuega o loo tatou feagai ai.

Tatalo: Le Atua e, fesoasoani mai ia matou fiafia e tatalo mo le ‘au fa’atuatua, o loo aafia i faafitauli o le olaga, **Amene.**

Aso Faraile – Iuni 28: “Omai i lo’u aiga” (*Come home*)

Tusi Faitau – Galuega 16:14-15

Matua – ff.14b-15b: *“Ua tatalina e le Alii lona loto ia naunau i upu na tautala atu ai Paulo. Ua papatisoina o ia atoa ma lona aiga, ona ‘aioi mai ai lea o ia, o mai ia i lou fale.”*

O le fafine ua ia lagona le pa’i mai o le Atua i lona loto; o le tala lea ia Litia ma lona liliu atu i le ola fa’atuatua, i le aai o Filipi. O lenei tinā e ui ina fa’atauavaa lana galuega, ae ua ia lagona le tāua o a’oa’oga a Paulo e fa’atatau i le fa’atuatua ia Iesu. O le fa’ailogalelei lea mo soo se tagata, e lagona i lona loto le alofa o le Atua, ma mulimuli i ai. O le itu tāua o le tatalina o le loto a Litia, e lei tatalina o sona fia fa’alogo, ae na tatala e le Alii ona o lona silasila i le loto e naunau moni i upu o le ola e maua ai le fa’atuatua.

O le talitonu o Litia i a’oa’oga a Paulo, na avea ma la’asaga tāua na fa’amautū ai lona fa’atuatua, na papatisoina ai o ia ma lona aiga. O le fa’aילו lea e iloa ai, e amata atu i totonu o le aiga le ola fa’atuatua. Sau i le aiga e maua ai le fiafia ma le ola, ma mafanafana ai le mafutaga ma le Alii.

Tatalo: Le Alii e, o i matou o uso ma tuafafine i la le Tala Lelei. Fesoasoani mai ia matou iloa le tāua o matou aiga, **Amene.**

Aso Toonai – Iuni 29: “Fesoasoani mo le fesoasoani” (*Helping the helper*)

Tusi Faitau – Roma 16:1-2

Matua – f.2: *“Ina ia talia o ia e outou i le Alii, faapei ona tatau i le au paia, ia outou fesoasoani foi ia te ia i se mea a outou e aogā ia te ia, auā foi e toatele ua ia fesoasoani i ai, atoa ma au nei.”*

O le faatalaaula a Paulo i le Ekalesia i Roma, e momoli atu ai ona alofaaga ma fa’aילו atu ai le aogā tele o Fipe. E le gata sa fesoasoani Fipe i isi tagata, ae na o’o foi ia Paulo, sa fesoasoani i lana galuega. E le gata sa auina atu Fipe e fesoasani i le ‘au uso i Roma, ae sa fa’apea foi ona fesoasoani ane ai le ‘au uso ia te ia, ina ia maua ai pea le loto gatasi ma le fa’amoemoe e tasi e fa’asoa ai i manuia o le Atua ua latou maua e ala i la latou auunaga.

O le galuega a le Atua e mo’omia ai le ola fefaasoa’i. O a ni mea lelei ua tatou maua mai i le fa’asoa mai o isi, e tatau ona tatou fa’asoa atu. O le toatele o Kerisiano, e fiafia e fa’asoa atu ona e maua ai avanoa e fa’asoa mai ai. A o isi, e fiafia i le fesoasani mai o isi, ae augata e fesoasoani atu. Fefa’asoa’i fa’atasi ma le Atua, ona manuia lea o tatou faiva.

Tatalo: Le Atua e, fesoasoani mai ina ia matou fiafia e fesoasoani atu, ina ia maua ai le galulue fa’atasi ma le fefa’asoaai i tala e tau i lau afio, **Amene.**

(3) Faitauga mai ia Luka (*Readings in Luke*)

1 – Se ā la outou upu ia te a’u nei po o ai? (*Who do you say I am?*)

Aso Sa – Iuni 30: “Tumau i le Filemu (*Staying in the peace*)

Tusi Faitau – Luka 8: 26-39

Matua – f.35: “*Ua latou o mai lea e matamata i le mea ua faia, ua o mai ia Iesu, ua latou iloa atu le tagata, ua o i fafo ia te ia temoni, o loo nofo o ia i vae o Iesu, ua ofu o ia, ma ua atamai, ona latou matatau ai lea.*”

O le molimau a le ‘au faievagelia o loo tatala mai ai le avanoa mo i tatou e molimaaina le alofa fa’atasi mai o Lē na afio mai e aumaia le filemu, le fa’aleleiga, ma le toe fa’afouina – o Keriso lea. O lona fa’atasi mai ua mafai ai ona tatou feagai ai ma vaipanoa pogisa o le olaga, o nofoaga tiga, o lagona maasiasi, o mea tatou te ita ai, o manatu fa’aitu’au, ma talitonuga tuai o loo tamau ai i tatou i le tuana’i. E le faigofie le fa’amatuu atu o lagona ua leva ona tatou tauaveina mai le tuana’i.

A o le faitauga o lenei aso, ua tatou molimaaina ai le tagata sa ulufia e temoni, a o le mafuta mai o Keriso ma lana fa’amalologa sa faia, na ia maua ai le filemu moni. O le mafuta mai o Keriso, ua toe fa’afouina ai lona loto, ma aumaia ai o ia i le mafutaga vāvā lalata ma le Atua. E aumai e Keriso le filemu moni i o tatou loto, a o le tagata, o ia e tataua ona filifili e tumau ai, e ala i le fa’atumaina o lana mafutaga ma Ia.

O le ‘tumau i le filemu,’ o se filifiliga e faia e le tagata i aso uma ma taimi uma. E filifili le tagata e mafuta atu i le fa’atasi mai o Keriso, o Lē na te aumaia le fa’amalologa mo i tatou; na te aumaia foi le fa’aleleiga, aemaise ai le fa’amalosi – lea o le a tatou va’ava’ai ai i faitauga o lenei vaiaso.

Tatalo: Le Alii e, ia e aumai se taimi tāua e mafai ai ona matou mafuta ma lau afio, o le pogai o le filemu moni, **Amene.**